

# Passion

بالعربي

شغف

م. شيماء العقيلي



شغف

تنمية بشرية

م./شيماء العقيلي

محمد مجدي

هبة خليل

أ. عبد الواحد الحسيني

يناير ٢٠١٩

٢٠١٩/٢١٩٩

٩٧٨-٩٧٧-٦٥٣٤-٦٨-١

رباب الشهاوي

هند عبد الله (نور مانجا)

الكتاب

النوعية

اسم المؤلف

تصميم الغلاف

تنسيق داخلي

المراجعة اللغوية

الطبعة الأولى

رقم الإيداع

الترقيم الدولي

إشراف عام

مديرة النشر

طلب الكتاب

01022897649 - 01126652278

ويمكن طلبه عن طريق موقع جوميا من Elfoad Publishing Marketplace

## جميع الحقوق محفوظة



للكاتب ودار الفؤاد للنشر والتوزيع، وأي اقتباس أو تقليد أو إعادة طبع أو نشر أي جزء من هذا العمل، سواء إلكترونيًا أو فوتوغرافيًا أو أي شكل آخر دون تصريح كتابي موثق من الناشر، يعرض مرتكبه للمساءلة القانونية.

هذا الكتاب يحمل رأي ورؤية الكاتب وحده، ولا يمثل الدار أو أي من العاملين بها.

[Alfouad\\_publishing@hotmail.com](mailto:Alfouad_publishing@hotmail.com)

[facebook.com/fouadpublishing](https://facebook.com/fouadpublishing)

كيف تعرف شغفك و أحلامك وموهبتك؟  
رحلتي "الجزء الأول"، النسخة المعدلة من المستقبل

Passion

بالعربي

شغف

الكاتبة

م. شيماء العقيلي

Master Degree in Civil Engineering

Life & Business Coach & Mentor

Passion to Business Coach & Mentor

Specialist in Small Business start & Business Psychology

## بِسْمِ اللَّهِ الرَّحْمَنِ الرَّحِيمِ

( رَبِّ أَوْزِعْنِي أَنْ أَشْكُرَ  
نِعْمَتَكَ الَّتِي أَنْعَمْتَ عَلَيَّ  
وَعَلَى وَالِدَيَّ وَأَنْ أَعْمَلَ  
صَالِحًا تَرْضَاهُ وَأَدْخِلْنِي  
بِرَحْمَتِكَ فِي عِبَادِكَ  
الصَّالِحِينَ )

## من الكاتب؟

قبل ما تمشي في أي رحلة وتعرف طريقك للشغف وتتعرف على طريقي إزاي عرفتة؟ أقدم لكم في السطور الجاية مين معاكم في الرحلة.

معكم في الرحلة، شيماء العقيلي، مهندسة مدني وحاصلة على الماجستير في الهندسة المدنية، متزوجة ولديّ أطفال (اللهم بارك) بفضل الله، ربة منزل، وكنت أعمل في مجال الهندسة في إحدى الشركات الخاصة الكبيرة، ووصلت فيها لمناصب إدارية مهمة. حاولت أن أطلب من أولادي التميز لكن توقفت عند كيف أطلب منهم التميز وأنا لا أشعر به أو أملكه حتى بالطريقة التي تجعلني راضية؟! ولا أعرف له طريقا من الأساس؟! بدأت الرحلة من عدة سنوات تقريبا، الحمد لله مواصلة في رحلتي الخاصة، ومهتمة بشئون التغيير وتطوير الشخصية، مهتمة بالبيزنس وكيفية إيجاد فرص جديدة للعمل في الحياة للنساء؛ كيفية تغيير وتطوير الشخصية لتعمل في مجال البيزنس مع الفهم السيكلوجي الخاص بكل شخصية تسعى لممارسة البيزنس أو تمارسه بشكل فعلي.

حاصلة على دورات متعددة في البيزنس والإدارة، والإرشاد الأسري والنفسي، والصحة النفسية، حاصلة على اعتماد في مجال الكوتشنج، أعمل في Life & Business Coaching & Mentoring، وأعمل بشكل أدق في مجال Passion to Business Coaching & Mentoring. بشتغل في الكوتشنج (الحياة و البيزنس) و مساعدة الناس لمعرفة شغفهم و مناطق تفوقهم و تمييزهم، و أساعدهم على تطوير شخصيتهم للأفضل لممارسة البيزنس اللي يحبوا العمل فيه و البداية من خلاله.

أدير بفضل الله أكاديمية عقول، وفزت بها في مسابقة هدي في عام ٢٠١٤ كواحدة من أحد المراكز العشرة الأولى من ضمن تصنيفات لأكثر من ألف مشروع على مستوى الشرق الأوسط، ولها موقع على الإنترنت وصفحات على مواقع

التواصل الاجتماعي، وصل عدد المشاركات في الأكاديمية لأكثر من ٣٠٠٠ امرأة، وعدد المتابعين على مواقع التواصل الاجتماعي قارب أكثر من أربعين ألف متابع، وعدد التعاملات فيها يفوق ٢٠ متطوعة بفضل الله. شعرت بلذة البحث عما أحب، ففكرت أن أكتب عن كل ما أعرف في كتب صغيرة تساعد الغير أن يحاول أن يسترشد في الطريق، أحببت مجالي الجديد، Knowledge-educational "writer".

كمان بقدم محاضرات عن البيزنس والشغف وإزالة عوائق النجاح على المواقع المتعددة (أونلاين) وبالأخص Udemty. شرفوني في كتاباتي التي أقدم لكم فيها خلاصة ما فهمته على مدار السنوات الماضية، وأسأل الله السداد في الأمر، والتوفيق لكم في هذه الرحلة.

صدر لي أول كتاب اسمه "البيزنس إنسان"، الكتاب يقدم رؤية مختلفة لعالم البيزنس وكيف يمكنك تغيير وجهة نظرك نحو البيزنس وفهمه بشكل أوضح، ويمكن تحميله من الرابط التالي:

<https://goo.gl/7fAwSt>

شكرا لوجودكم معي في هذه الرحلة، و التي أشعر بتميزي فيها؛ لأنني أعلم في النهاية أنها رحلة تخص كل شخص، وعليه أن يرى ويفهم رحلته ويصبر عليها و يحب الرحلة الخاصة به هو شخصيا؛ لأن السعادة والعيش لن يكونا في نهاية الرحلة، ولكنهما سيكونان خلالها، وفارق كبير بين نهاية الرحلة وخلال الرحلة، أرجو أن تستمتع برحلتك الخاصة.

**التواصل مع الباحثة:** E-mail: Shaymaa1st@gmail.com

## إهداء

أهدي هذا الكتاب لبابا العقيلي وماما أسمة، أغلى الناس على قلبي، ربنا يبارك فيهم وعلمهم.

أهدي هذا الكتاب لزوجي محمود كامل وأولادي "مريم وعمر وأحمد وحمزة"، ربنا يحفظهم بفضله الكبير، ويبارك فيهم وعلمهم.

أهدي هذا الكتاب لأعز وأحلى أخوات وأقرب الناس للنفس من النفس "أسماء، ومحمد، وأحمد، وسالي، ومحمود"، ربنا يحفظهم من كل شر ويبارك فيهم وعلمهم.

أهدي هذا الكتاب للصديقات وللعاملات معي في الأكاديمية، ولأشخاص كان لهم فضل في حياتي؛ عرفت من خلالهم الطريق، من خلال معلومة، ومن شرح، ومن كلمة غير مقصودة غيّرت الدفة في حياتي للأفضل.

أهدي هذا الكتاب لكل شخص يبحث عن بوصلته وعن شغفه و سر وجوده في هذه الحياة.

أهدي الكتاب لبائعة الكتب في مكتبة ألف "أ" في شبين الكوم بالمنوفية، والتي وعدتها من ٣ سنوات بأن أصدر هذا الكتاب و هو جاهز منذ زمن و لكني ترددت كثيرا في إصداره و راجعت محتواه كثيرا جدا، أتمنى لك السعادة و شكرا لحديث دار بينا يوما ما.

ربنا يجمعني بكم في الدنيا والآخرة، في الفردوس الأعلى في صحبة سيدنا محمد صلى الله عليه وسلم.

## اعتذار واجب

الاعتذار دا مقدم لكل شخص قرأ الكتاب، وكان نفسه يكون باللغة العربية الفصحى، مش العامية زي ما أنا قدمته، طبعا شرف لأي شخص إنه يتمكن من اللغة العربية، لكن للأسف أنا لا أكتب جيدا بهذه اللغة العظيمة، وأتمنى أن هذا الأمر لا يكون عائقًا في أنك تقرأ الكتاب وتستوعبه.

ولو ما كنتش مقتنع إنني لازم أعتذر عن عدم إجادتي اللغة العربية، فأنا بقول لك وبوضح أنا ليه بعذر؛ لأن دا أبسط شيء ممكن أوصله للناس، ولو وردت كلمة في هذا الكتاب ليست هذه هي طريقة الكتابة الصحيحة لها أو ليس النطق الصحيح، رجاء تعلم الطريقة الصحيحة حتى لا تتوارث الأخطاء أجيالًا وراء أجيال. وهذا لا يعني أنني لم أحاول مراجعة الكتاب، بالعكس أنا حاولت مراجعته كثيرًا حتى يكون متقنًا وهذا من باب الإحسان والامتنان.

الاعتذار الثاني لو ظهر معلومات جديدة، ولم تجدها في الكتاب، فقد اجتهدت قدر ما استطعت أن أقدم المعلومات التي وصلت لها وقرأتها واستفدت منها حتى تاريخ إصدار هذا الكتاب، وفي النهاية لازم يكون فيه إيمان خالص، أن مفيش حد فينا يقدر يوصل لمعلومات صحيحة وكاملة ١٠٠%، "كلنا نحاول و نبذل جهدنا حتى نحصل على المعلومات الصحيحة والكاملة قدر الإمكان وقت التحدث وشرح وتقديم المعلومة"، وعدم قدرتنا علي الإمام بكل العلم وكل المعلومات، يكون مفهومًا من خلال الآية القرآنية { وفوق كل ذي علم عليم }، لأن العلم سيظل في حالة تطور شديد و مستمر، يغير وينكر نفسه و يطور نفسه، وكل يوم هناك فيه صحة و خطأ في نظريات و معتقدات و أفكار لم نكن نتوقعها مطلقًا، كل شخص متًا يملك جزءًا من معلومة، و علينا أن نتكاتف على جميع المعلومات وجميع الصور وليس الانتقاد وفضح الخطأ



فقط، ميزة العلم أنه غير ثابت، ومش مطلوب منا أننا نلم بكل المعلومات اللي في الكون، لكن مطلوب أننا نقدر ونفهم ما نمتلك من المعلومات ونقوم بتوصيلها للغير ومساعدته في إنارة الطريق له، و أنها تكون صحيحة قدر الإمكان وقت الحصول عليها ( لأن وارد بعد ٥ سنين، أو أقل يظهر فيه معلومات أحدث، تغير ما تم كتابته اليوم).

دائما نعتبر الاعتذار يتم تقديمه عمّا نخطئ فيه، لكن أحيانا الاعتذار يكون مقدما عن الشعور بالأسف ناحية شيء، أو شعور بالمساندة لأشخاص آخرين، أو على سبيل التنبيه لأمر ما يمكن ألا يتوقعه الطرف الآخر، واعتذاري هنا ليس عن مشكلة في الكتاب أو قصور في العلم، أو أن العلم يتطور، أو أنك لن تجد في الكتاب ما يفيد، ولكنه تنبيه لبشريتنا المميزة لنا، وأن نرضى بها، وأن نتعلم أن نكتب تنبها لمن يقرأ معلوماتٍ ما، إنه سيظل هناك قصور وظهور معلومات جديدة، ليس هناك في العلم مسلمات نهائية، لكن هناك تطوير.

وفي النهاية زي ما قلت داخل الكتاب: الكتاب مقدم للشخصيات المبتدئة في مجال البحث عن الشغف، وأسأل الله أن يجعله بداية موفقة، واختصاراً لمجهودك في البحث المتفرع، حتى لا تعيش مدة طويلة في دوائر البحث عن مجهول، كما عشت أنا، وعشان كذا أنا جاية لك من المستقبل وبكلمك عنه وعن ازاي تنجح في معرفته مثلما نجحت،

أتمنى أن الكتاب يعطيك القدر الكافي من معلومات كبداية لرحلتك القادمة و كبداية للانطلاقة الحقيقية التي تحلم بها.

شكرا لكم وأتمنى لكم رحلة سعيدة.



## نصيحة مخلص لك

النصيحة دي أنا بكتيها (لأنها أفادتني وإن شاء الله تفيدكم): خليك في حالة بحث مستمر وإطلاع مستمر، وانقض واهدم القاعدة اللي بتقول إنك تعلمت خلاص؛ كل يوم بيكون فيه جديد، ومش لازم يكون كل يوم، لكن على الأقل كل سنة بيظهر الجديد للناس، الجديد اللي كان حبيس المختبرات والتجارب وآراء الناس لفترة ما. بالمناسبة أنا دربت ستات تخطى عمرها ٥٥ سنة وأكثر عشان تعرف شغفها، "يعيش المعلم وهولسه بيتعلم".

لا تأخذ معلومة ثقة من أي أحد، لازم تشوف إيه مصادره، وتراجع وتفهم أنت كمان، لأننا كلنا لينا مصادر معرفية ومصادر أخرى مؤثرة في فهمنا للأمور وطريقة اعتقادنا ورؤيتنا لها، القاعدة الفقهية بتقول (استدل أولاً ثم اعتقد، لكن لا تعتقد ثم تستدل). يعني جمّع كل المعلومات الأول حول هذا الأمر اللي أنت عايز تعرفه، المعلومات اللي مع و اللي ضد الأمر، و افهمهم و اتعلم و استخلص منه الصح، مش تقول الكلام دا هو الصح و أي كلام ضده غلط، فكر الأول في الأمر وبعدين اعتقد فيه، عشان يغير حياتك.

لما تشوف أي كتاب، حاول تفهم هل الكاتب بيتكلم عن تجربة شخصية خاصة به؟ عشان دا يختلف تماماً لو كان يتكلم من زاوية علمية أو لها دراسات في العلم، اطلب مصادر الكتاب وراجع مصادر الكتاب الموجودة في النهاية.

لو أنت كاتب لازم كتابك يكون فيه مصادر ثقة تبحث فيها، وهذا هو الأفضل حتى لو كان يعرض تجربة شخصية، يمكن أنت ككاتب فهمت معلومة غلط أو الشرح مش مضبوط، أو شرحت رؤيتك الشخصية، أنت ليك بناءً على علمك فهم مختلف عنه، و يمكن يكون ليك رؤية مختلفة، فساعد غيرك يوصل للمصادر ويكون له رؤيته الخاصة به.

لا تأخذ أي كتاب مسلم به وأيضا هذا ليس معناه الشك المطلق في كل شيء، لكن الاستزادة من الأمر تجعل البحث في مصادره بأشكال متعددة أمر مهم، النصيحة دي أكثر للأشخاص اللي بيبحثوا فيه مجال شغف عندهم، يعني لو شغفك الطب يبقى تبحث أكثر، لو شغفك الحسابات، يبقى تفهم و تبحث أكثر، ميزة العلم أنه متطور، و يبحث عن الشخص الذي يبحث عنه " .. العلم يبحث عن الشخص الذي يبحث عن العلم".

ربنا يوفقكم، و برحب بكم على متن رحلة معرفة الشخص بنفسه وبشغفه، متمنية إقامة سعادة، ورحلة ممتعة وضحكة جميلة للجميع.

شكرا أنكم وصلتموا لحد هنا 😊



## كيف أستفيد من هذا الكتاب

بعد السلام والتحية لكل من يقرأ هذا الكتاب، الكتاب مش أول كتاب يتكلم عن الشغف، وإن شاء الله مش هيكون آخر كتاب، في ناس كثير مميزة بتكلم عنه، فيه أكيد كتب أخرى بتكون موجودة سواء علمنا عنها أو لم نعلم عنها شيء، لكن في الكتاب دا بقدم خلاصة لطريقي الشخصي اللي بدأت أمشي فيه بنفسي من مدة طويلة لمعرفة شغفي.

قرأت كتب تتحدث عن الشغف، بحثت عن دورات، تقريبا طرقت أبواب كثيرة بقصد أو بدون قصد خلال مدة ٥ سنوات وأكثر. دربت مئات السيدات من مختلف الأعمار حتى تعرف شغفها و تصل له وتحوله لبيزنس، و قصص النجاح بفضل الله متعددة، وكلها قصص جديدة بأن أقوم بتقديمها في كتاب آخر وأتحدث عنها بشكل مستفيض.

نعود لطريقي الخاص، حاولت أن أعرف ما هو الشغف؟؟ ماذا يعني؟؟ كيف أعرفه؟ وما كل هذه الضجة حول الشغف؟؟ هناك من يسألك ما هو شغفك وأنت لا تعرف، أو يكتفي بهز الأكتاف، ويقولك ماذا تحب في الحياة من الآخر؟؟.

من امتى كان عندنا القدرة علي الاختيار و البحث و القرار المنفرد؟!، عشان نعرف بنحب إيه؟ ونكره إيه؟؟ من امتى بنقدر نعيش بره الأمثلة المحلولة والإجابات النموذجية؟؟ من امتى كان الأهل و المجتمع و الناس بتسمح لينا نمارس ما نريد و ما نحب بدون وصاية أو أحكام مسبقة.

هنبداً سوا ونكمل مع بعض الطريق من خلال هذا الكتاب، مضطرة أحياناً أني أكتب باللغة العامية وأحياناً باللغة العربية، لأنني لا أدعي أنني مميزة في اللغة العربية، أميني أن الكتاب يكون ممتع لمن يقرؤه.

الكتاب يمثل GPS لطريقك نحو الشغف، و مرشد لك في هذا الطريق، وارد الطريق يكون فيه تحديات، أو مطبات أو حتى إشارات مرورية، ممكن يكون هناك طرق أقصر، حوارات داخلية أقوى، و خلافات، و اختلافات في وجهات النظر بينك و بين كاتب هذا الكتاب "اللي هو أنا"، احنا ماشيين في طريق مع السائق، أكيد فيكم ناس ممكن توصل أسرع و ناس ممكن توصل بدري، و ناس ممكن تستغنى عن GPS، و ناس ممكن تستغنى عن السواق، لكن الأكيد رغم كل هذا، ممكن تلاقوا كلمة أو جملة تمثلكم أو تعيشوا فيها و تفرق في حياتكم.

كُتبت و غيرت مئات المرات في هذا الكتاب، لأنني أحاول أن أختار له شكلا مناسباً، حتى يكون مثل المرشد الذي ينيّر الطريق للناس، و أن يكون منظماً و منسقاً لكل من يبحث عن معلومة، أتمنى أن يكون هذا الشكل مناسباً لكم. الكتاب عبارة عن مقالات مترابطة تفصلها العناوين الخاصة بكل مقال، أتمنى دا يسهل عليكم الطريق بفضل الله، و هناك التمارين الكثيرة التي ترشدك في الطريق، عليك أن تكتب و تمارس الكتابة في هذا الكتاب لأنه سيكون مرجعاً لك فيما بعد، يُفضل أن تظل نسختك معك بخط اليد، حتى تتذكر ما في نفسك و ما كتبته عن نفسك.

**ملحوظة:** الكتاب مناسب للناس اللي لسه بتبدأ الطريق لمعرفة الشغف، واللي مشيوا فيه كام خطوة صغيرة في البداية، لو سمحت، وقت قراءة الكتاب انسى كل شيء في حياتك، و اقرأ الكتاب بذهن صافي و متفتح. الانتقاد مسموح، ولكن قبل الانتقاد و التقييم، لي طلب بسيط؛ لازم حضرتك تعرف أنت في أي مستوي بالنسبة للكتاب، "بمعنى لو أنت خبير في الشغف، يبقى الكتاب غير مناسب لمستواك"، عشان يكون النقد منصف جداً ليك و ليا

و للكتاب، أنا عارفة إن مفيش نقد مقصود به الشخص، لكن الكتاب يعتبر ابن الكاتب المدلل، فلو محتاج تنتقد ابن الكاتب، أتمنى يكون على هيئة نصيحة اللي بتكون مغلفة بغلاف الهدية.

لو كنت في مستوى الخبير في الشغف، فالكتاب دا مش مناسب لحضرتك، ممكن تعتبر بعض ما فيه على سبيل التذكرة. لو كنت لسه بتبدأ الطريق، إن شاء الله الكتاب مفيد لك.

رجاءً اربط حزام الأمان واستخدم GPS كويس.

من هنا نبدأ الطريق..... على بركة الله.



# ما قبل البداية

## قبل بداية الرحلة

في البداية، أهم سؤال مع مين ناوي تمشي الرحلة؟؟؟ مينفعش تمشي الرحلة مع شخص لمجرد أنه قالك تعالى، قدمت نفسي في البداية، وبقولك لا تقلق هتمشي مع حد كان تائهاً قبل منك، وفضل يفتح ويطرق كل الأبواب، وفي كل الطرق والحمد لله وصل وبيعافري الطريق لسه، لكن بنسخة معدلة وبرؤية أوضح كثير.

الكاتبة، هي النسخة المعدلة منك بعد ما عرفت شغفها، تقدر تقول كدا إني جياالك من المستقبل الخاص بك عزيزي القارئ عشان أختصر سنين من المحاولات، و أحاول أساعدك، دا يعني أنك هيكون ليك تجربة خاصة بك، لأنك لازم تمر بتجربتك الخاصة بشكلها الكامل، لكن لو بتخوض التجربة ومعاك مرشد، و أدوات مناسبة دا هيسهل عليك الأمر أكثر من لو أنك بتخوض التجربة ومفيش إنسان معاك ولا مرشد ولا أدوات.

الشغف دلوقتي أصبح موضوعة، كلمة الكل عمال يردد فيها، ويقول لك لازم يكون عندك شغف Passion، وناس كتير أصبحت تضيفها في كلامها، ومدربين إن عاجلا أو آجلا هيظهروا، ويتكلموا عن الشغف، و ناس تشتغل فيه ك coaching وفي التدريب علي الشغف واكتشافه. وناس أخرى تسألك بامتعاض هو أنت كبيركدا، ومش عارف إيه هو شغفك؟؟

ودا كله شيء كويس إنك تلاقى ناس مختلفة تفيدك في المجال دا، وتلاقي بدل الدليل الوحيد في الطريق (المرشد الواحد في الرحلة) تلاقى ١٠ مرشدين للطريق، وبدل الطريق الواحد تلاقى ملايين الطرق، ولكل مرشد، ولكل دليل، ولكل طريق مميزاته وعيوبه، أهم شيء تعرف تمشي في الطريق وتستمتع به



"هتسمع كلمة تستمع دي كثير"، و تعرف تجارب الناس و تخوض تجربتك بشكل كامل وواعي.

بس قبل ما تروح لازم كمان تفهم الأساسيات لرحلتك عشان لما تدور على مرشد تلاقي حد مناسب، ولما تلاقي طريق تقدر تقيمه بشكل جيد قدر الإمكان، مش تروح تركب مع مرشد وتاخذ عربية ليموزين وتمشي في طريق في الصحراء القاحلة و تدفع دم قلبك في جلسات مع كوتش أو شخص ما، وانت فقط ممكن تكون محتاج تمارس شغفك من غرفة مكتبك و أنت معاك ورقة وقلم بس.

قبل الرحلة لازم تكون فاهم أن معرفة شغفك لها علاقة بمعرفة نفسك (في تخيلي و من خلال ما قرأت)، لازم كمان تتعلم تفهم نفسك و تقرب منها خلال الوقت دا، مهما جبت مليون دليل و مليون مرشد عشان يساعدوك في الرحلة، بدون ما تكون مصاحب نفسك وواعي بها و فاهمها و أنت ماشي، مش هتوصل لشيء. بطل تهرب من نفسك عشان تقدر توصل، الطريق مش وردي، طريقك كله ضباب بشكل كبير، و الرؤية مش واضحة جامد، لكن من المميزات، انك كل ما تمشي خطوة في الطريق، الخطوة اللي بعدها بتظهرلك، فحاول تمشي و لا تغضب من أي خطأ ممكن يحصل في الطريق؛ لأنه طريق، و وارد كل شيء فيه، حتى قطاع الطريق وارد وجودهم عليه، فلازم نتعلم أننا نفهم طريقنا قدر الإمكان عشان نقدر نمشي فيه صح، و نفهم كل ما يمكن أن يحدث علي الطريق في رحلتنا.

الشغف هيتم شرحه بشكل أكثر تفصيلا في الفصول القادمة، بجانب نقاط لازم تخلي بالك منها تسهل عليك الطريق،.....



## أنت وسواق التاكسي والرحلة

تخيل لو صحيت الصبح بدري، وفتحت باب الشقة، ونزلت بملابس البيت بدون ما تغيرها، ومش غاسل وشك، وحالك حال واحد نايم وماشي بشبشب الشقة، وقمت وقفت تاكسي، وقلت: تاكسي!!

وبعدين التاكسي وقف،،،،،

السائق: نعم يا فندم!!

وأنت بتركب علي عجلة من أمرك وبتقوله اطلع يا أسطى!!!

السائق سألك باندھاش (بسبب منظرک وطريقتك): حاضر يا باشا، حضرتک رايح فين؟؟

أنت (رديت): معرفش!!

السواق باستغراب: يعني إيه متعرفش يا حضرت؟؟ طيب هتروح لمين؟؟

أنت: معرفش!!

السواق كان هادي حبتين، قالک: يعني إيه متعرفش يا باشا!! طيب أمشي من أي طريق؟؟

أنت: معرفش!!

السواق: يا باشا.. الناس بتقول يا فتاح يا عليم يا رزاق يا كريم على الصبح!! يعني إيه متعرفش الطريق ولا فين؟ ولا رايح لمين؟

أنت قطعت كلامه وقلت له: رايح أدور علي نفسي بره يمكن ألقاها؟؟

سؤال: تخيل السواق، كيف يصفک؟؟ أكتب الوصف الي أنت متخيله؟؟

سؤال: ممكن توصف نفسك وإحساسك؟؟

---

---

سؤال: لو هتدور علي نفسك، هدور عليها فين؟ وناوي تبدأ منين؟

---

---

## البحث في الشارع

تخيل مرة ثانية، مرة واحد ضبيع مفاتيحه في غرفته الضلمة، وبعدين خرج بره الغرفة، ونزل الشارع الزحمة تحت البيت، وقعد يدور تحت عمود النور، عدى عليه واحد صاحبه، وسأله: بتعمل إيه عند عمود النور؟

قام رد أخينا وقاله: بدور على مفاتيحي، ضاعت مني!!

صاحبه قاله: ضاعت فين؟

رد أخينا وقال له: ضاعت في غرفتي المظلمة فوق في البيت!!!

صاحبه قاله: يعنى ضبيعت المفاتيح فوق ف غرفتك، وانت بدل ما تحاول تلاقيها هناك، أو تلاقى نور تنور بيه غرفتك عشان تعرف تدور كويس، استسهلت نور العمود اللي تحت البيت ونزلت تدور تحته في الزحمة وسط الناس بعيد عن المكان اللي ضاعت فيه المفاتيح!!

سؤال: تفتكر ممكن نوصف صاحب المفاتيح اللي ضاعت بإيه؟

---

سؤال: تفتكر صاحب أخينا "صاحب المفاتيح اللي ضاعت" ممكن يوصف صاحبه بإيه؟

---

سؤال: هل انت بتعمل كدا في حياتك؟

---

سؤال: افتكر موقف عملت فيه كدا؟

---

دورت في مكان غلط عشان أسهل!، دخلت كلية غلط عشان أسهل!، اشتغلت في مكان و أنت بتكرهه عشان أسهل!، أو عشان تجيب فلوس أسرع!، صاحبت زميل غلط لمجرد انه أسهل!، أتجوزت حد و أنت مش بتحبه لأن لازم نعمل كدا؟! و لأن الطريق كان أسهل!، خلفت عشان لازم نعمل كده و كل الناس بتقول اننا لازم نعمل كدا!

الموقف الأولي: أكتب موقف حصل معاك إنك استسهلت و اخترت غلط، و أوصف شعورك

---

إحنا هنا في الكتاب بندور على شغفنا أو بالأحرى بندور علي نفسنا، و من خلال الكتاب هنعرف الأدوات التي نحتاج لها، نعرف رفقاء الطريق، نفهم أمور كثير مختلفة، قبل ما نستسهل وندور في مكان غلط.

## النمر والصقر، قصة حلم وعمل وشغف

القصة دي سمعتها في إحدى حلقات اللايف الخاصة بدكتور عمرو الفص، هو أنا لم أسمعها بشكل كامل قبل كدا؛ لأن الضيف حكي بشكل مختصر جدا، لكن أنا حاولت أمسك الخطوط العريضة، وأضفت نقاطاً للقصة من خيالي الشخصي و تفكيري أنا و ناتج رؤيتي للرحلة بشكلها الكامل من خلال تجربتي الشخصية، يالا نسمع القصة سوا.

كان فيه صقر لطيف بيحلم يلاقي نفسه، و يلاقي قوته، شاف أن قوته دي مجهولة وهو مش عارفها، وكان عنده حلم جواه مش بيحكيه مع حد، فمشي في الغابة الأولى (رقم ١)، لقي الأرنب يسبح في البحر، وقف وسأل الأرنب، الصقر سأل وقال: أرنوب أنت بتعمل إيه في المياه؟  
أرنوب رد وقال: أنا بعموم؟!

الصقر قاله وهو مستغرب: وهو فيه أرنب بيعوم؟!  
أرنوب رد بحسرة: المدير اللي بيدير الغابة عايز كدا؟! و اللي عايشين في الغابة شايفين أنه رأيه صح، أكيد يعرف حاجات أكثر وأفضل منا!  
الصقر مشي مرة أخرى، لقي الزرافة تتسلق الشجرة، جاله حالة ذهول و استغراب شديد، وراح للزرافة وقالها: بتعملي إيه يا زرافة؟  
قالت له: أنسلق الشجرة!!

الصقر رد باستغراب وقال: هو فيه زرافة ممكن تطلع الشجرة؟! و تنط من شجرة لشجرة؟

ردت الزرافة: مدير الغابة عايز كدا، و اللي في الغابة شايفين أنه أكيد رأيه صح!، ولأنه أكبر أكيد فاهم أكثر وعارف أكثر!

طار الصقر شوية و لقي السمكة بتنط على الحشيش، سألها الصقر بتعملي إيه، أنت أتجننتِ يا سمكة؟

قالت له: بشوف شغلي اللي وكله لي مدير الغابة؟ وليه بتقول كذا؟

قالها الصقر: أنت ممكن تموتي وأنت برّه المياه!!

قالت له: آديني بحاول، بروح أخذ غُطس وارجع أكمل شغلي، أكيد هتعود على الوضع دا، هو صحيح هياخد شوية وقت و مجهود كبير قوي فوق تحملي، بس مدير الغابة و الناس اللي فيها بتقول إن دا الصبح و مع التعود الأمور هتتظبط! لحد هنا و الصقر مقدرش يكمل!!

وقال دي غابة صعبة جدا، أنا عارف أني قوي، و حلمي الكبير أني أبقي نمر، و النمر بالنسبة ليّ مثل أعلى، و شايف أن النمر أفضل من الصقر كثير، ليه مبقاش نمر؟ أنا هروح لقطيع لنمور و أعرض عليه إنني أكون معهم و ضمن القطيع بتاعهم، و أشتغل معاهم.

ساب الصقر الغابة دي وراح لغابة تانية (نسمها غابة رقم ٢)، وراح لقطيع النمور في الغابة (رقم ٢)، و قال لهم أنه ممكن يساعدهم يصطادوا و يجيبوا أكلهم بشكل أفضل مقابل أنه يعيش وسطهم؛ لأنه مش شايف نفسه صقر، شايف نفسه نمر زيهم.

النمور شافت الصقر، على أنه مجرد طريقة صيد جديدة جدّا، أنه يطير من فوق و يقولهم فين الفريسة؟ و بكدا حصتهم في الصيد ممكن تزيد، و أخذوا الصقر على قد عقله!، لأنهم فاهمين أنه في النهاية هو صقر و له صفات مختلفة عن أنه يكون نمر، بس مش عايزين يخسروا صفقة هتفرق في صيدهم و كمان هتخلي كمية الصيد تكون أكثر.

كل يوم الصقر يدلهم، و النمر تصطاد و آخر اليوم يحطوا له نصيبه على جنب؛ لأنه مش هيقدر يقف وسطهم و يأكل زهم، هو صقر و هم نمر في النهاية.

الصقر قعد فترة كدا، و سأل نفسه، طيب هو أنا فرقّت إيه عن الناس اللي كانوا في الغابة (رقم ١)، هم أتبعوا كلام المدير اللي قالهم انه عارف أكثر منهم و هو اللي فاهم، و أنهم مش فاهمين!، و أنا مارست اللي أنا شاطر فيه، بس بطريقة مش مناسبة و مع قطع النمر اللي أنا اعتبرت نفسي واحدًا منهم، بس هم عمرهم ما شافوا دا لأنّي في النهاية صقرو و هم نمر، شفت مهاراتي أقل من مستواها، و حلمت حلم مش مناسب لي بالمقارنة بما امتلكه من قدرات و من أفكار و خبرات خاصة بيا كصقر، صحيح الحلم لازم يكون غير منطقي لكن عشان تحققه لازم تمشي في أهداف منطقية حتى لو هتحاول ترفع مستوى الأهداف بنسب حتى تصل.

أنا لو كنت اتفقت معاهم على أي صقرو و ساعدتهم يصطادوا كنت فرضت شروطي، لكن أنا روحت و قلت لهم اعتبروني زي أي نمر منكم و بكدا قللت من قدراتي و انتصاراتي لأنّي لم أرضَ بها، و لم أقدرها، مكنتش شايف شخصيتي أو نفسي، إيه اللي فرق بيّني و بين اللي كانوا في الغابة (رقم ١)، هم كانوا بيعملوا كدا؛ لأن في حد ثاني هو اللي بيقولهم اعملوا كده و غالبا الاحتياج و سوق العمل في الغابة، لكن أنا لما اخترت اللي عايزه، عملته بمزاجي، لكن هو مكنتش مناسب ليّ، عشان كنت بهرب من أي صقرو مش راضي بكوني صقر. لازم أعرف نفسي و أقدرها صح، و هنا قرر الصقر، أنه يشوف نفسه بحقيقتها و يحترم كيانه و شخصيته، و يسافر لغابة جديدة، و نزل إعلان عن الغابة (رقم ٣)، و قال أي حد عايز يمارس اللي يحبه و يعيش بطريقة و يحترم اختلافه و اختلاف الآخرين و يحترم شخصيته و نوعها و



يحترم شخصيات الآخرين، و يتعاونوا مع بعض من خلال مبدأ (فوز- فوز لجميع الأطراف يتفضل، أن الكل يساعد بعضه و كلنا نكسب)، يتفضل يشرفنا و يسكن معنا في الغابة (رقم ٣ )، و بعد فترة بدأت الحيوانات و الطيور تجيله و تتعلم من تجربته التي مر بها، و يعيشوا تجربتهم الخاصة في اكتشاف أنفسهم، و هو كمان حب تجربته رغم صعوبتها و رغم الوقت التي مر به عشان يتعلم يفهم و يحترم ما يمتلك.

سؤال: هل مريت بتجربة أنك عملت شيء عشان الناس بتقول كذا رغم أنك مش مقتنع؟ و أوصف شعورك ناحية التجربة..

---

سؤال: هل فيه وجه شبه بينك و بين الصقر؟

---

سؤال: تفتكر أنت عايش في غابة رقم كام دلوقتي؟

---



## الجمال وأمه والسؤال اللي مش بيتسأل

قصة الجمال، شفها من زمان يمكن سنة ٢٠٠٨، وفهمت المعنى المقصود بشكل عام، لكن لم أدركه بشكل مناسب حتى مررت بالتجربة بشكل كامل لمعرفة شغفي. أحكي لكم القصة فيما يلي:

كان فيه جمال بيسأل مامته وبيقول: ماما.. يا ماما حبيبتي.. يا ماما ممكن أسألك سؤال؟

مامته قالت: اسأل يا حبيبي!

الجمال: هو احنا ليه عندنا رموش طويلة على عيوننا؟

مامته قالت: عشان لما نمشي في الصحراء، الرمل ميدخلش فيها و العيون متتهدلش.

رجع الجمال يسأل مامته و يقول: ماما.. يا ماما حبيبتي.. يا ماما.. ممكن أسألك سؤال؟

مامته قالت: اسأل يا حبيبي!

الجمال: هو احنا ليه عندنا سنام فيه مياه على ظهرنا؟

مامته قالت: عشان لما نمشي في الصحراء، نلاقي مياه مخزنة في جسمنا ومانعطش.

رجع الجمال يسأل مامته و يقول: ماما.. يا ماما حبيبتي.. يا ماما.. ممكن أسألك سؤال؟

مامته قالت: اسأل يا حبيبي!

الجمال: هو احنا ليه عندنا خُف والأرجل عريضة جداً كدا؟

مامته قالت: عشان لما نمشي في الصحراء، رجلينا متغرزشي في الرمل ونعرف نمشي.

رد الجمل وقال: ماما.. يا ماما حبيبتى.. يا ماما.. لما كل الحاجات دي عشان لما  
نبقى في الصحراء نستعملها، ممكن أعرف احنا قاعدين ليه في حديقة  
الحيوان؟

سؤال: تفكر إيه قصد الجمل الابن من الأسئلة؟

---

---

---

سؤال: هل فيه وجه شبه بينك وبين الجمل في القصة؟

---

---

---

سؤال: ليه تكون مؤهل عشان تكون في وضع أفضل بسبب مهاراتك و  
قدراتك، وترضى بالمستوى الأقل مما تمتلك؟

---

---

---

ليه تنسى قدراتك و مهاراتك و ما تمتلك؟، ليه مش بتستغل ما تمتلك أحسن  
استغلال؟، ليه نجري ورا التعليم باستمرار ولا نطبق ما تعلمناه؟!  
ملحوظة على جنب: الناس اللي هتقول معني كدا إن إنشاء حديقة حيوان فيها  
مشكلة!! للتوضيح حديقة الحيوان لازم تكون من جنس بيئة الحيوان عشان  
يقدر يظهر أفضل مهاراته و ما يمتلكه، و عشان اللي يشوفه في حديقة الحيوان  
يشوف الحقيقة و يفهم طبيعة الحيوان و يقدره.

# الشغف و تعريفاته

## ما هو الشغف؟

كأمر مرة صحيت من النوم تعبان ومرهق وقرفان، و مش عايز تروح الشغل؟؟؟  
كأمر مرة سألت نفسك: هو أنا جاي أعمل إيه في الدنيا دي؟؟ هو أنا اتخلقت  
ليه؟؟؟.

بالنسبة لي، أول مرة سمعت عن كلمة شغف و شغوف، كان فيه برنامج اسمه  
(قال الفيلسوف)، برنامج كان بيتذاع في الراديو، كنت مداومة على سماع هذا  
البرنامج في صغري، ولم أعرف معنى كلمة شغوف؛ لأن المقدمة كانت بتقول:  
"كان لي صديق فيلسوف..... بأقوال الحكماء شغوف".

ولم أفهم ما معنى الشغف؟ أو بالأحرى كلمة شغوف، لكن فهمته من خلفية  
الكلام على أنه شديد الاهتمام بالشيء، أو مولع به، وكنت أربط الشغف  
بالحكمة دائماً، فالحكماء هم الشغوفين فقط، ولا يوجد أشخاص آخرين  
يعيشوا مثل هذا الشغف المحبب الذي يمتلك عليك نفسك وكل ما فيك.

ومع مرور الوقت وتردد كلمة الشغف كثيراً، وبحثي عنها في رحلتي الخاصة،  
تغيرت القناعة عندما فهمت أن الشغف عند أغلب الناس، ولكن هناك من  
ردم على الشغف كأنه ردم على بئر الماء، فيحتاج إنه يحفره مرة ثانية، ويمكن  
أن يمتد الحفر لأشهر أو سنين عشان يسترجع بئر الماء، ومنهم من ردم علي  
الشغف كأنه ردم علي بحيرة كبيرة، فأخفى جزءاً منها وظل هناك جزء بدون  
ردم فاستغله وانطلق من الجزء الواضح من شغفه.

ومنه من ردم عليها تماماً و يكاد يستحيل استرداده، ومنهم من لم يولد به،  
حتى نرى تعدد النعم التي أنعم الله بها علينا، و نفهم أن لكل كلمة تعريفاً  
يناسب رحلة صاحبها.

يعني فيه شخص كان شغفه الرسم و الأهل قالوا مينفعش و خلوه يبطل يرسم من سنين طويلة، وعشان يرجع يمارس الرسم هياخد وقت، و فيه اللي شغفه كان الكتابة، و المجتمع قاله المفروض تكون دكتور في الأول و بعدين أبقي مارس الكتابة، و لما كبر بقي يمارس الكتابة جنب الطب، و هكذا و فيه اللي شغفه اتردم و معدش عارف هو إيه أصلا؟ و فيه اللي بهرب من شغفه؛ لأنه مش عارف يمارسه!

هناك تعبير شهير للأمهات والآباء، "اشتغل يا بني في حاجة بتأكل عيش"، يوجد الكثير من الناس يعتقد أن الشغف مش بيأكل عيش حاف حتى "للأسف". لو يبقى شغفك حاجة بتحها، تخيل كدا لو عملت حاجة واحدة بس في اليوم تكون بتحها و تكون شغفك- يومك هيكون ازاي!! طيب لو هتكسب منها مرتبك و أكل عيشك، هيكون شعورك ازاي!! طيب هيكون شعورك بالإنجاز شكله إيه بعد كل مرة تشتغل في شغفك، تخيل كدا!!!

طيب هل معني كدا إني مش هزهق من شغفي؟ دا حتى بيقولوا في الأمثال القديمة " اللي ياكل سكر كثير نفسه بتموع"، و تبقى عايزة الحوادق و تأكل ملح، الشغف لو تعاملت معاه علي أنه شيء ممكن أعمله و أنا بحبه و اشتغل فيه وبس، تبقي أكيد محتاج تتذوق/تنوع في الحوادق، بسبب كثرة الحاجات المسكرة اللي أكلتها، لكن لو تعاملت معاه انك خلال الرحلة بتعرف نفسك و بتتعلم جديد، و هتعيش عالم من التغير المستمر، و بتعمل ما تحبه عشان فائدة ليك و لأسرتك و للمجتمع من حولك، و كمان عشان الشغف يعني حالة من حالات التجديد و التغيير، و دا شيء أساسي و مميز لرحلتك- يبقى أكيد رحلتك تختلف.

سؤال: وماذا عنك؟؟ كام مرة سمعت عن الشغف!!

---

---

سؤال: طيب عارف يعني إيه شغفك وإزاي ممكن يغير حياتك؟؟

---

---

كام مرة ناديت طفل و هو بيمارس شغفه؟؟ شغف الطفل هو لعبه، كل لعبة يمارسها الطفل تضع لمسة بداخله، وبعد فترة الطفل يستريح للعبة معينة ويظل يلعبها (وهنا أنا بتكلم عن الأطفال التي نشأت في جو طبيعي أسريًا)

سؤال: هل عارف هوايتك اللي بتخلي الضغوط عليك خفيفة وكل ما تشعر بالضغط وإن أعصابك فلتت منك، تقوم تمارس هذه الهواية مباشرة؟؟؟

---



## الشغف وتصنيف المهام

في البداية عايذة أوضح أن فيه تعريفات كثيرة للشغف، و مش تعريف واحد فقط لا غير، و في الصفحات التالية هيتم عرض التعريفات المختلفة عشان نكون عارفين احنا بنبحث عن إيه؟!

لو عرفت المعنى هيسهل عليك البحث بطريقتك، و لو عرفت المكونات و الطريقة الخاصة بالشغف، هتقدر تعمل الخلطة بنفسك بعد ما تفهم إزاي ممكن تتعمل؟ أحيانًا تعريف الشغف هو طريق الوصول لمعرفته، هناك طرق وصول مختلفة للشغف، و بذلك هناك تعريفات متعددة للشغف كما سنرى في السطور القادمة.

اغلبنا بنصحى الصبح مش عايزين نروح الشغل؟!، أو مش عايزين نعمل المهام اللي علينا؟!، أحيانًا بنلاقي مهام خفيفة على قلوبنا (بس إحنا مش عارفين إيه السبب؟)؟!، و أحيانًا مش بنكون عارفين هي سهلة ليه؟!، لأننا مش بنسأل أو مش بنقف لحظات نفكر في المهام دي، و ليه سهلة علينا؟ خلاص بنكمل ونعملها بدون ما نسأل نفسنا؟!

وفي مهام تانية بيكون ضرب النار والتعب أهون من عملها!!، أو إننا نتظاهر أحيانًا بالمرض أو بالبرد، واللي بيكون أهون علينا من أننا نعملها، وساعات نفس المهام دي لما بنحط عليها شوية تحاييش (الكلمة معناها شوية إضافات و نكهات) زي مثلا، إننا نتقاسمها مع أصحابنا، أو نعملها وإحنا بنمارس حاجة بنحبها مثل إننا نمارسها مع رياضة أو إحنا بناكل حاجات نحبها- بتكون المهام دي تغيرت من وجهة نظرنا إحنا، وأصبحت متوسطة السهولة ويمكن أدائها، و الوقت كمان بيكون كويس و الأمور مش صعبة قوى، وبنعمل المهمة مع شوية جهد و شوية نكهات.



وفي مهام تالته مهما عملنا المستحيل، حتى لو حاولنا نحلها بالبسبوسة والكنافة و نضع نكهات لها، (مستحيل، أبداً!!!)، مفيش شيء يينفع معها، ممكن نهرب منها بالمشوار، ممكن نرميها على أي شخص ثاني، يبقى لازم نعرف إن في حاجة اسمها "التصنيف للمهام".. دايمًا اتعلم تعمله عشان تفرق بين أنواع المهام.

في حالتنا هنا فيه تصنيف ظريف وبسيط جدًا في شكله متناسب مع الشغف والمهام التي نمارسها في حياتنا، وهو كالتالي:

شيء بحبه أوي- مهمة سهلة جدًا

شيء مش بحبه خالص – مهمة مستحيل أعملها

شيء متوسط لو عملت بعض الإضافات أو النكهات هتقبله وأعمله و مش هياخد مني وقت كبير- هياخد مجهود زيادة – مهمة متوسطة السهولة.

توضيح من خيبرتي: بخصوص فكرة التصنيف، فيه ناس بتشوف التصنيف على انه غباء، وناس بتشوف أنه شيء مهم، ودا بسبب إننا من كتر ما بنصنف كل شيء بنعمل أحكام على كل شيء، و نقوم بالحكم مسبقًا على الأشياء مباشرة من خلال التصنيف، يعني لو بنت اسمها تفيدة مثلاً، يبقى ليها تصنيف معين في دماغنا، بنت اسمها اشكيناز يبقى في تخيل خاص بشكلها و شكل عائلتها، وفيه ناس شايفة التصنيف دا حاجة محصلتش؛ لأنه بيسهل حياتها، الأصل في هذا الأمر أن التصنيف اتوجد عشان يساعدنا إننا نرتب حياتنا و لكن ليس موجودا لإطلاق الأحكام أبداً، و لكنه ينفع أحيانًا عندما تقرر قرار ناتج تصنيفك له، بالابتعاد عن الأشياء المضرة زي النار مثلاً، لو كانت نار مولعة في مكان ما قريب منك، تصنيفك للمكان انه خطرو لا بد من الابتعاد و مساعدة الناس حتى لا تتعرض للحرق. عشان كذا اتعلم تعمل تصنيف مفيد يساعدك، و اتعلم تستخدمه صح، لكن لا تستخدمه في إطلاق

الأحكام المسبقة؛ لأنك هتخسر كثير بسبب الأحكام؛ فالتصنيف خاصية موجودة لمساعدتنا ومساعدة الغير وليس لهدم العلاقات. التصنيف شيء الإنسان يفعله باستمرار، بوعي أو بدون وعي منه، خليك واعي وأنت بتعمل التصنيف عشان تعرف تسهل حياتك وتفهم طريقك، ولا تطلق الأحكام.

سؤال: اكتب شيء بتحبه جداً ومش بتزهق منه أو من عمله؟

---

---

سؤال: اكتب شيء مش بتحبه وصعب تعمله، بس لو عملت معه شيء إضافي تفرق معاك، زي مثلاً لو عندك إيميلات كثير، أو اتصالات كثير لو عملتها وأنت بتمارس السباحة أو لما ترسم، هتحس أنها مبقتش ثقيلة على قلبك؟ اكتب الشيء وإيه نوعية الإضافة اللي ممكن تخليك تحبه وتعمله؟

---

---

سؤال: اكتب شيء مش بتحبه أبداً، ولو حصل وشخص طلب منك تعمله، بتجري منه بالمشوار ومعدكش استعداد تعمله مهما حصل؟

---

---

من التمرين ده هنفهم إن تعريف الشغف بناءً على الكلام السابق هو عبارة عن مقدار حبنا لعمل شيء ومدى سهولته بالنسبة لينا، هو المهمة أو الشيء أو الموضوع السهل علينا نعمله.

سؤال: تفتكر حاجة سهلة و بتحبها قريبة من نفسك؟ (لو مش عارف أسأل  
اللي حواليك عن هذا الشيء)

---

---



## الشغف وما أحب وما أكره

مادام اتكلمنا عن الشغف و المهام و تصنيف المهام، من ناحية الخفيف و القريب لنفسنا و المهام اللي ثقيلة و بنكرها، يبقى الشغف ممكن يكون له مفهوم بسيط تاني، ما أحب عمله و ما لا أحب عمله، ما أحبه و ما أكرهه.

سؤال: أكيد كل شخص فينا عنده ما يحبه و ما يكرهه في الحياة، تفتكر أنت بتحب إيه في الحياة (أفعال زي مثلا، أشاهد، أطبخ و هكذا حتى لو كان الفعل دي الحلقة "التأمل" في السقف) اكتبه؟

---

---

سؤال: لو مش عارف إيه اللي بتحبه؟ اكتب إيه اللي بتكرهه؟

---

---

سؤال: بعد ما تكتب اللي بتكرهه، هات عكسه و اكتبه عشان تعرف بتحب إيه؟

---

---



## تعريف الشغف بالعربي

عندما أقول تعريف الشغف باللغة العربية، أقصد التعريف اللغوي لكلمة الشغف وهو: "الغِلاف الرقيق المحيط بالقلب، ويحميه رغم رقيقته، يعني أنت شغوف بشيء وبتحبه لدرجة أنه دخل، وعدي من الغلاف دا وامتلك قلبك، وبقي هو غلاف قلبك"، ومنه شغاف القلب.

ذكرت مرة في القرآن الكريم في سورة يوسف، { وَقَالَ نِسْوَةٌ فِي الْمَدِينَةِ امْرَأَتُ الْعَزِيزِ تُرَاوِدُ فَتَاهَا عَنْ نَفْسِهِ قَدْ شَغَفَهَا حُبًّا إِنَّا لَنَرَاهَا فِي ضَلَالٍ مُّبِينٍ } (٣٠، سورة يوسف).

ودي يقصد به أنها أحبته لدرجة ملكت عليها كل قلبها، وتسلسل هذا الحب من خلال الغلاف الرقيق المحيط بالقلب وامتلك مجامع القلب كله. أقرب منظر لهذا الغلاف، لو بتمسك قلب فرخة أو أي حيوان بتلاقي غلاف رقيق جداً، شيء خفيف وشفاف جداً ورقيق لدرجة كبيرة جداً حتى ليغطي القلب.

سؤال: إيه الشيء اللي بتشعر أنك بتحبه وبيدخل لقلبك جداً بشكل كبير؟

---

---

سؤال: هل فيه شيء أو أشياء تعتبرها أنها امتلكت قلبك جداً؟

---

---



## تعريف الشغف بالإنجليزي

كلمة شغف باللغة العربية تُترجم باللغة الإنجليزية لكلمة Passion  
Passion ترجمتها بالعربي هو "ممارسة الحب / العلاقة الحميمية الخاصة مع  
شخص تحبه جدًا و تسمح له بذلك؛ لأن المفروض أن هذه العلاقة خاصة  
جدًا و ممارستها تدل علي الحب بين الأزواج، أو محاولة ربط العلاقات بود و  
حب، وهنا نعتبره " الزوج أو الزوجة طبعاً" وأكد طبقاً لما أقره الله ورسله في  
الحلال. غالباً يتم استخدام كلمة الشغف للتعبير عن الحب الجارف بين  
الرجل و الست و خصوصاً ممارسة العلاقة الخاصة بينهم، والتي يُفضل أن  
تنبع من حب شديد ورغبة شديدة في هذا الأمر. إذن لا تتعجب إذا بحثت عن  
تعريف كلمة الشغف Passion و وجدت صوراً و مقالاتٍ كثيرةً للتعبير عن  
العلاقة الخاصة بين الرجل و الست.

ولها معنى مكمل طبقاً لموقع ويكيبيديا باللغة الأجنبية، الشغف هو " المشاعر  
القوية تجاه شخص أو تجاه أمر أو تجاه شيء تريد أن تنفذه بشدة رهيبه، وهو  
ناتج عن مشاعرك تجاه شخص ما، شيء ما، أو أمر ما".

أذن تعريف الشغف العام: " هو عبارة عن قوة المشاعر/ العواطف اللي  
بتحركنا تجاه شخص أو شيء أو طريق/ أو طريقة عمل شيء".

طيب لو أخذنا بالنّا إنّنا في التمرينات اللي فاتت ذكرنا حاجات بنحبها،  
وحاجات مش بنحبها، وحاجات لو ضفنا عليها بعض النكهات أو الإضافات (زي  
الأكل كدا) أو دمجناها مع حاجة حلوة ثانية أصبح عندنا القدرة على عملها  
وتأدية المهمة.

يبقى إذن الشغف أمر يتعلق بالمشاعر و العواطف و الرغبة الشديدة لعمل  
شيء، أو لمساعدة شخص أو الوجود معه، أو أنك تفهم طريقة عمل شيء

بتحبه، كالشغف لفهم التفاصيل، علي سبيل المثال طريقة صنع الصواريخ و القطارات، وما إلى ذلك.

اذن هل تستنتج أن الشغف ممكن يكون من خلال مشاعر حب أو مشاعر كره؟؟ ممكن يكون شغف بمشاعر إيجابية و شغف بمشاعر سلبية؟؟، مشاعر بناء للنفس، مشاعر هدم للنفس، مشاعر بناء للغير، ومشاعر هدم وانتقام من الغير.

سؤال: رأيك إيه؟ اكتب توقعاتك قبل ما تنقل الصفحة الي بعدها؟

---

---

سؤال: تفتكر إيه الشيء الي بتحب تعمله و تشغُر معه إنك عايش في عالم آخر زي الطفل لما تنادي عليه، وتلاقيه مش سامعك و مش بيرد عليك، و حتى لما يرد عليك، تشعر أنه جاي من عالم ثاني؟

---

---

---



## الشغف الإيجابي والسلبي

من كلامنا اللي فات، هل ممكن نفهم كدا إن فيه شغف إيجابي و شغف سلبي؟ فيه شغف يملأ العقول و القلوب و النفوس بمشاعر إيجابية و عواطف إيجابية، و فيه شغف يهدم النفس و يهدم الغير؟ فيه دكتور اسمه Dr. Vallerand، درس الشغف على مدار ما يفوق ٢٥ سنة، و درس تأثيرات كتيرة جداً خاصة بالشغف، و خصوصاً الفروقات بين الرجال و النساء، و الشغف و علاقته بالعمل و ممارسة المهام، تقدر تعمل بحث (سيرش) على النت و تلاقي الكثير من الأبحاث، و في النهاية قدم لنا هذا العالم تعريفاً للشغف، و تقسيمًا يدل على أنه هناك شغف إيجابي و شغف سلبي أو كما قام بتسميتهم كالتالي:

- الشغف الإيجابي / Harmonious or positive passion (you)
- الشغف السلبي / Obsessive passion (others)

سؤال: تفتكر إيه هو الشغف الإيجابي؟

---

سؤال: تفتكر إيه هو الشغف السلبي؟

---

سؤال: بناءً علي فهمك و تخمينك، تفتكر بتعيش في أي نوع من أنواع الشغف؟

---



## الشغف الإيجابي Positive Passion

الشغف الإيجابي Positive Passion تعريفه من خلال ما كتبه Dr. Vallerand (التعريف ليس نصًّا): "هو ما قمت بممارسته كشخص؛ لأنك ترغب فيه و تحبه، ولأن القرار نابع من ذاتك أنت، و ناتج اختيارك الحر للأمر بدون أي ضغوط، و هذا يؤدي في النهاية لتفوقك كشخص بناءً على رغبتك و بناءً علي ما تريد"

مثال: كان نفسك تدخل كلية الطب عشان تكون طبيب متميز، و دخلت كلية الطب عن رغبة شديدة، أو كان نفسك تدخل كلية لغات، و فعلا دخلتها عشان تدرس لغة معينة؛ فهذا ناتج حبك لهذا اللغة، أو قررت ممارسة الخياطة كمهنة و قمت بتطوير نفسك و دخلت كلية معينة تساعدك في المجال، كل هذه الاختيارات تمت بناءً على رغبتك الخالصة لها، و اختيارك الحر لها بدون ضغط خارجي من الأهل، و المجتمع و المجموع، و ما إلى ذلك، من العوامل الخارجية المؤثرة، و ناتج وعيك الشديد بما تحب و ما ترغب فيه، و بناءً على فهمك الطريق و مصاعبه و معافرتك المستمرة للنجاح فيه، إذن أنت تمارس الشغف الإيجابي.

المرتبط على هذا النوع من الشغف، هو المشاعر الايجابية من النجاح و الرضا عن النفس نتيجة المحاولات التي يمكن أن يكتب لها النجاح أو الفشل، و في الوقت ذاته تُقبل الإخفاقات في المحاولات.

ملاحظة من الكاتبة خلال عملها في الشغف: هذا النوع من الشغف يتضح أنه إيجابي طوال رحلة الوجود فيه، بمعنى أنك لو اخترت نوعًا معينًا من الشغف و اشتغلت به، فإن مشاعرك من أول بداية العمل فيه واستمرارك فيه، لو كانت مشاعرك خلال هذه الفترة تساعدك علي الوعي و النضج الإنساني و

الإبداع و التنفيذ، وأن أغلبها مشاعر إيجابية أكثر منها سلبية- إذن نعتبره شغفًا إيجابيًا،

غالبًا يكون هناك حزن داخلي لو وجدنا أحدًا في مجالنا الذي نحبه أنجح منا، لكن هذه المشاعر لا تستمر كثيرًا، و السبب أن الشخص لما يركز في شغفه بياخذه لعالم من المحاولة المستمرة للتركيز و الإبداع فيما يحب من أجل ذاته كشخص، و ليس التركيز على ما يفعل الآخرون أو نجاحهم، و دايمًا شايف نجاحه و نجاح الآخرين بشكل طبيعي ؛ لأنه مبدع فيما يفعل، يطور نفسه و شغله و يتعلم من الآخرين، و ساعتها هيسعي إلى الأشخاص الناجحين في مجاله و المتقدمين عنه ليكونوا أصدقاء له، و يتبادلوا المساعدات و الخدمات عشان الكل ينجح، و أيضًا هيطلب منهم يكونوا مرشدين (Mentors) له علي الطريق، في مجال شغفه، و نتيجة كذا تكون الأيادي الممتدة للمساعدة أكثر من الأيادي الممتدة للهدم.

لا أزعُم أن العالم هيكون مثالي، و الناس هتكون سعيدة لبعضها البعض بشكل خُرافي كما نخُلم في المدينة الفاضلة و مفيش إحساس بالضيق، لكن المنافسة بناءً على المشاعر السلبية زي الحسد و البغض و الحقد هتقل بنسبة كبيرة جدًّا. أغلب المنافسات هيكون فيها إبداع و نزاهة نسبيًا، تخيل لو عندك مجتمع الأطباء مثلاً تتم ممارسة مهنة الطب عن حب للمهنة و اختيار حر لها، الوضع سيكون مختلفًا بشكل أكثر من الوضع الحالي؛ لأن هناك إبداعًا كبيرًا ممن يمارس المهنة ناتجًا عن اختياره الحر، وهو أكبر من الشخص الذي تم إجباره ليكون طبيبًا.

سؤال: تفكر من خلال ما سبق، ما هو شغفك الإيجابي؟

---

---

## الشغف السلبي Obsessive Passion

تم تعريف الشغف الإيجابي فيما سبق، و أعتقد أنه ممكن نخمن ما هو الشغف السلبي، الشغف السلبي Obsessive Passion، قام Dr. Vallerand بتعريفه كما يلي (التعريف ليس نصًّا): "هو ما قمت بممارسته كشخص تحت ضغط رغبات الآخرين و المجتمع، و البحث عن إرضائهم لتقبلك مجتمعيًا كواحد منهم رغم عدم رغبتك في ممارسة هذا الأمر / هذا الاختيار، و كرهك الشديد أو حتى رغبتك الحيادية في ممارسته"

مثال: كان نفسك تدخل كلية التجارة لعشقك للتجارة، و تحت ضغط مجموعك المتميز، أصر الوالدين أنك لازم تكمل في طب استخسارا للمجموع، أو حتى تكون شبه الفلاني أو العلاني، قراك لممارسة مهنة معينة تحت تأثير أنها تعطى أموال أكثر أو احتياجك للأموال، مما جعلك تهمل ما تحبه، و تحت ضغط من الأهل حتى تحقق الأموال الكثيرة، ضغط سوق العمل و ما يوفره من فرص لنوعيات عمل معينة و محددة، ضغط المجتمع و تسمية كليات القمة والقاع، ووظائف الصفوة، و غير الصفوة، وهكذا.

كل هذه الاختيارات تمت بناءً على رغبة غيرك و محاولاتهم المستمرة للضغط تحت مسمى أنا بفهم أكثر منك؛ لأنني أكبر منك، أو لأن المفترض "أنا أعرف مصلحتك أكثر منك"، أو "أنت عيل و لسه مش فاهم"، أو لأنك "مش فاهم الدنيا"، أو لأنك "لو كنت تحب أمك كنت سمعت كلامها"، و مشيت في هذا الطريق؛ لأنه الأجدر و الأنفع و الأصالح لك. الاختيار هنا اختيار بضغط خارجي من المجموع و الأهل و المجتمع و الجميع من حولك، و ما إلى ذلك من العوامل المؤثرة أو ناتج عدم الوعي بما تحتاجه و ترغب في وجوده في حياتك.

توضيح من الكاتبة: لو مشاعرك من أول ما تبدأ الرحلة في ممارسة الشغف سلبية وظلت هذه المشاعر طوال الرحلة كما هي لم تتغير، يبقى أنت عايش في شغف سلبي، ولو مشاعرك في البداية اختلفت عن مشاعرك طول ممارسة هذا الشغف، سيكون المسعى حسب نوع المشاعر المستمرة أكثر، يعني لو كانت المشاعر المستمرة طول الممارسة لهذا الشغف سلبية يبقى الشغف سلبي، ولو اتحولت لمشاعر إيجابية طول أغلب اوقات الممارسة يبقى شغف إيجابي.

في حالة الشغف السلبي، معظم الناس في هذه الدائرة تعيش حالة من التنافس الشديد، بناءً على مشاعر سلبية، ناتجة عن محاولة الهدم المستمر لنجاح الآخرين إذا لم يستطع تحقيق نجاح مرجو لنفسه، يحاول الشخص أن يثبت نجاحه من خلال إثبات فشل الآخرين وليس من خلال محاولة نجاحه هو بنفسه. دايمًا يعلن عن فشل الآخرين عشان يقول "أنا أحسن منهم؛ لأنني معملتش زهم"، ودا لأنه لا يملك نجاح خاص به بشكل يكون مناسب له أو يجعله يشعر بالتميز، ويحاول تنفيس غضبه في الغير؛ لأنه في لحظات لم يكن قادرًا على المواجهة واختيار ما يريد.

عالم السلبية يزيد من التنافس الشديد المقترن بمشاعر سلبية زي الحقد والغضب وعدم رضا عن النجاح أو عن الأداء. في هذه الحالة تركيز الشخص يكون على عيوب الناس في مجاله أكثر من تركيزه على إبداعه هو شخصيًا؛ ودا لأن إبداعه الشخصي ممكن ميكونش متوفر؛ لأنه مش مجاله أصلاً، ودايمًا بيكون تركيزه على هدم الغير وعدم مساندته للغير، ولا يركز هذا الشخص على تطوير نفسه ووعيه.

سؤال: هل مررت بتجربة شغف سلمي؟

---

---

سؤال: تذكر مرة عملت شيء و كان من اختيارك و قام الجميع بتأنيبك أو انتهز فرصة فشلك فيه و قام بالتوبيخ و التأنيب بحجة لو كنت سمعت كلامنا كنت كسبت؟

---

---

سؤال: تذكر مرة عملت شيء و كان من اختيارك و نجحت فيه؟

---

---

نصيحة على جنب: عند تقديم النصيحة لشخص أو مساعدته على اختيار قرار، لا بد أن تفهم أن معظم الناس تنتظر منا الدعم لاختياراتها فقط، كل ما عليك هو سرد المميزات و العيوب لهذا القرار و اترك صاحب الشأن هو الأجدر بالاختيار و هو المسئول عن نفسه، لا يوجد في الحياة قرار صحيح و قرار خاطئ، نسبة وجود هذا التصنيف لا تتخطى (١٠%) من قرارات حياتنا على أحسن تقدير، الرقم تقريبي من خلال مشاهداتي في الحياة، معظم القرارات تخضع لتصنيف و سؤال محدد و مهم. لما تحاول تاخذ قرار، تسأل نفسك "هل أستطيع تحمل توابع هذا القرار أم لا؟ هل أستطيع التأقلم مع النتائج إذا كانت في صالحني أم لا؟ هل أستطيع التأقلم مع النتائج لهذا القرار إذا لم تكن في صالحني؟" الإجابة في النهاية عندك؛ لأنك صاحب القرار.

يحتاج الناس للدعم النفسي و الكلام المحفز؛ لأننا في غالب الأمر نعيش مع صوت داخلي مدمر لنا، يجعلنا نتوقع الألم و الفشل باستمرار، فعلينا أن نجد من يدعمنا خارجيا من أقرب الناس في ظل محاولة أن نجعل الصوت الداخلي إيجابيًا معنا حتى نتقدم و ننجح، و ذلك عن طريق تدريب الصوت الداخلي ليكون إيجابيًا.

سؤال: تتذكر مرة كنت تحتاج للدعم في قرار ما؟

---

و من خلال ما سبق، نجد أنفسنا نخترع عالم الشغف الإيجابي، و من خلال الشغف الإيجابي، لما تكون تتحدث مع أشخاص آخرين عمّا تحبه و قررت أن تفعله.

سؤال: تفتكر بماذا شعروا في هذه اللحظة: أقصد لحظة شرحك لشيء بتحبه؟

---

دا يقودنا لتعريف آخر للشغف، و هو أنك ممكن تعرف ما هو شغفك؟ لما تنقل مشاعرك عن هذا النوع من الشغف (الأمر الذي تتحدث عنه) للناس، و أنت تتكلم عنه بشكل مُعدي لهم يخلي جسمهم يقشعر من الحماس، و يكون عندهم الرغبة الشديدة لعمل ما تقوله و انهم ينفذوا الموضوع معاك.

## الشغف وظاهرة (Mirror-Neuron)

مما سبق، نجد أن الشغف يمكن تعريفه أنه هو الشيء اللي بتحبه بشدة لدرجة أنك بتنسى وقتك وتنسى الدنيا معه (نظريا، خليك فاكر كلمة "نظريا" عشان محتاجين نوضح الموضوع دا فيما بعد)، وبيكون كل تركيزك مع الأمر دا لدرجة انك لا تشعر بالوقت، زي مثلا لما بتقضي وقت مع الأطفال، أو تقعد تفك كل جهاز حدة حدة عشان تعرف طريقة عمله، أو بتحب الحفاظ، بتحب القراءة لدرجة قوية جدًا، وهكذا.

فيه تفسير تاني لمعنى الشغف، عشان تعرف ما هو الشغف؛ لازم تفكر فيما يلي "ما هو الشيء اللي ممكن تتكلم عنه بقوة لدرجة تحمس شخص غيرك أنه يبدأ العمل في هذا الشغف (اللي أنت بتحبه) ويكمل معاك الطريق في عمل الشيء اللي بتحبه". علي سبيل المثال، في بعض الأحيان تتكلم مع حد مثلا عن أكلة معينة وتلاقيه يقولك أنا جسي قشعر من طريقتك، ووصفك وحسيت أني عايز أقوم حالا أعملها معاك وناكلها سوا؟؟.

فيه ساعات وانت واقف تحكي عن حاجة قدام أصحابك، وهم يسمعونك بتلاقهم زي ما بنحكي مندفعين معاك، ومركزين أوي وتحمسوا لشيء جدًا، وزي ما بنقول ف المثل ( عاموا على عومك) كانوا في قمة الانسجام جدًا معاك، وقدرت توصل لهم إيمانك بالشيء، وحماسك لهذا الشيء، قدرت تخلمهم يؤمنوا بيه ويشوفوا الشيء اللي أنت بتعرضه مميز جدًا، ويشعروا انك شخص مميز تتكلم عن عالم من السحر. مثلا لما تتكلم عن التاريخ أو عن الحروب، اللي قاعد معاك يقولك مثلا "يا عم حسستني أني عايز أقوم أحارب وانتصر دلوقتي".

### ده بيقال عليه ظاهرة (mirror-neuron).

تعريف هذه الظاهرة: "أنها ظاهرة كدا بتشعُر فيها انك اندمجت مع الشخص اللي بيتكلم وبتقلده بشكل قوي؛ لأنه قدر يخلي مشاعره تجاه شيء أو شخص أو عملية أو تفاصيل و ما إلى ذلك، تنتقل لك، و توصلك بكل سهولة وبدون تعب وحسيت فيها كأنك عايش تحت سيطرة سحر مشاعره أو عواطفه، وتلاقي أنك تأثرت جداً بكلامه و جسمك قشعر و عايز تعمل معه المستحيل عشان تساعدك يعمل اللي بيحبه".

زي مثلاً لما أختك تقولك "أنا حبيت حبيبتك من كلامك عنها"، كدا أنت قدرت تنقل مشاعر حبك لحبيبتك لأختك وهي كمان تأثرت بذلك و حبت حبيبتك. لو حصل و تكلمت في موضوع كدا، وحصل للناس اللي حواليك في وقت كلامك ظاهرة (mirror-neuron)، اعرف انك بتكلم في إحدى الموضوعات اللي انت شغوف بها.

ابدأ جمع الموضوعات دي حتى لو كانت بسيطة من وجهة نظرك، عشان مهمة جداً تقودنا في طريقنا لرحلة استكشاف الشغف.

سؤال: تفكر موقف حصل معاك كدا فيه؟

---

---

---

سؤال: إيه الموضوع اللي حكيت عنه، و الناس شعرت بهذا الشعور؟

---

---

---



سؤال: أسأل الناس اللي حواليك، وقولهم " يا جماعة، هل مرة حكيت عن شيء وأنتم تأثرتم به جدا"، وشعرتوا بالاندماج معايا؟

---

---

---

يبقى الخلاصة في تعريف الشغف مما سبق: " إن الشغف عبارة عن المشاعر سواء الايجابية أو السلبية اللي تقدر تنقلها لمن حولك وانت بتعبر عنها والمشاعر دي ممكن تكون تجاه شيء ما أو شخص ما أو عملية ما أو أي شيء أنت مؤمن به وتمتلك مشاعر تجاهه".

توضيح من وجهة نظر الكاتبة: التعريف السابق تم استخلاصه من الصفحات السابقة، والأفضل إعادة صياغة التعريف بحيث يكون التعريف مقتصرًا على المشاعر الإيجابية فقط.

سؤال: تفتكر بعد التعريفات اللي فاتت عرفت شغفك؟

---

---

---

سؤال: هل لو سألت عامل التنظيف (الكثّاس) أو لو سألت الشخص اللي يلّمع زجاج ناطحات السحاب، هي النظافة شغفك عشان كدا بتشتغل فيها؟؟

---

---

---

بالتأكيد هي قول لأ من وجهة نظري، و ممكن يبصلك بنظرة غير مناسبة بالمرة.

السؤال اللي فات من وجهة نظر القارئ ممكن يهدم اللي كتبته و تعبته فيه و  
قعدت اشرح فيه عن الشغف، و يقولك ماهو فيه ناس معندهاش شغف، أو  
يقولك الشغف كلمة موجودة نظريا عشان نضحك على الناس، أو الناس  
عايشة من غير معرفة الشغف، ليه المفروض نعرفه؟؟  
سؤال: دا ينقلنا لمعنى مختلف عن الشغف، تفتكر إيه هو؟

---

---



## الشغف والإحسان والتطوير

الشغف مرتبط بينا و مرتبط بسر من أسرار وجودنا، الشغف مش مجرد فقط مشاعر لشيء أو لشخص أو لعملية ممكن تخلينا نعا فرعشاها، الشغف يلزمه الكثير والكثير حتى يستمر، الشغف كلمة تمثل لي ما هو أكبر من فكرة المشاعر المتقدمة اللي ممكن تظهر وتلمع، و بعدين لأي سبب تختفي، الشغف هناك الكثير والكثير مما يساعد على استمراريته ووجوده.

الشغف مش مجرد مشاعر تظهر وتنطفئ وبس، دي عملية مستمرة من خلال عوامل مختلفة، لازم نفهم أن الشغف دا شيء موجود جوانا، و بنمر من خلاله بأشكال مختلفة؛ لأنه يعبر عن جزء من أسباب وجودنا هنا علي الأرض (الأمر دا يخضع للفلسفة بشكل كبير، وإن شاء الله هيتم مناقشة الأمر لاحقاً). الشغف جزء من المنطقة التي تميزنا؛ المنطقة المميزة لنا بتكون ناتجة عن طبيعة و نوع شخصيتنا و ما نتعرض له و تعرضنا له في الماضي، و ما نمارسه بوعي و بدون وعي، درجات النضج الإنساني داخلنا بالإضافة لكل العوامل المحيطة بينا اللي نعرفها و اللي ممكن منعرفهاش، و خبراتنا عن كل مرحلة تمر بينا تجعل عندنا اختلاف لنظرتنا في الحياة تجاه أنفسنا و تجاه الناس من حولنا و تجاه كل شيء.

و من خلال كل ما رأيت سابقا و فهمته من كثرة متابعة الشغف و محاولة فهمه بعمق، وجدت فكرة الإتيقان و الإحسان و التطوير لشيء أو لأمر أو لعلاقة ما، يتم اعتباره تعريفاً لفكرة وجود الشغف و هذا تم استنباطه من حديث الرسول صلى الله عليه وسلم (إن الله يحب إذا عمل أحدكم عملاً أن يتقنه)، و دا يوصلنا لنقطة فاصلة في الأمر، اللي يحب شيء هيتقنه و هيحسن و يطور فيه، و رأس الأمر هو الإحسان و الإتيقان، فإذا وجدت نفسك محسناً و متقناً في

شيء- اكتبه و خليك متواصل مع نفسك حتى تقوم بتجميع كل الأشياء التي تتقنها.

سؤال: اكتب أكثر شيء تشعر أنك محسن فيه ومتقن له؟

---

طبيب هل لازم أحب أمر ما عشان أتقنه؟ هل لازم يكون فيه مشاعر مسبقه؟ في البداية، المشاعر والعواطف لها أشكال وجود وزوايا متعددة لرؤيتها حسب عوامل مختلفة و حسب الأشخاص و الأزمنة و الأماكن، زي مثلا أن أحيانا الحب له تعريفات مختلفة، و زوايا رؤية مختلفة و أشكال مختلفة، ليس الحب فقط ما يجمعنا في العلاقات لكن هناك أشكال متعددة من المشاعر منها الحب و الود و الرأفة و ما إلي ذلك من أنواع المشاعر المختلفة لا يمكن حصرها هنا.

يعني العلاقة بين الزوج و الزوجة لها أشكال مشاعر مختلفة في كل مرحلة، و كل زمن، و كل يوم، و حسب تغير الشخصيات محل المشاعر، و وعيهم و نضجهم، و سرعة اختلافهم، و تطويرهم، و تقبلهم و فهمهم لاحتياجات الآخر، و أمور أخرى لا يمكن حصرها أو عدّها، و هكذا بالنسبة للعلاقة بين الابن/الابنة والأب، و بين الابن / الابنة والأم، و بين الأب و أولاد العم، و بينك و بين الأشخاص من نفس الديانة، و بينك و بين الناس من البشرية و المختلفين عنك في الدين، علاقات لها أشكال مشاعر مختلفة، فعندما نمارس شيئًا، أحيانًا يكون هناك رابط من المشاعر بيننا و بين الآخرين، لكن أحيانًا لا نستطيع تسمية هذا الرابط أو تسمية هذه الأنواع من المشاعر؛ لأنها مختلفة و متعددة بطريقة مربكة أحيانًا، أسهل تسمية تعارف عليها الإنسان هي التعود، و يعتبر الإنسان أن مشاعر التعود شيء مش لطيف؛ لأنه يعني أنه لم

يعد هناك أهمية للشخص أو الشيء، حتى مشاعر التعود هي مشاعر تم بناؤها عبر عدد من الساعات والأيام والسنين، والوصول لشكل تفاهم مختلف و أداء مختلف للعمل بشكل جيد ومناسب.

أحيانًا تبدأ المشاعر ثم تكون الممارسة للأمر، وأحيانًا تكون الممارسة للأمر ثم تنتج المشاعر عن هذه الممارسة، فيه ناس بتشتغل في شغل ما أو في عمل ما، و مع الإتقان للشيء بتلاقي سعادة داخلية جواك بتجعلك تستمر بلا كلل أو ملل في عمل نفس الشيء وتطويره باستمرار.

لو وقفت للحظة وسألت هل دا شغفك؟ ممكن الشخص يقولك لا؟! ممكن يقولك أنا بعمله عشان أكل العيش ودفع الفواتير وأربي عيالي، لكن هو حرفيا متقن للأمر بشكل كبير، وعنده مشاعر للأمر لكنه لا يعرف ما هي التسمية المناسبة لهذا النوع من المشاعر.

كل مرة نتكلم فيها عن الشغف، لازم ناخذ في عين الاعتبار اختلاف الشخصيات حتى في ممارسة الشغف وتأثرها به، في ناس كل حياتها هي النظام، لما تلاقي شيء و تتقنه و تعرف النظام الخاص به، بتكون في قمة السعادة الداخلية؛ لأن دا مناسب لشخصيتها، و في شخصيات مجرد وجود روتين و نظام يجعلها تتوقف عن ممارسة ما تحبه؛ لأن شخصيتها ضد الروتين.

كمان درجة وعي الشخص لما هو فيه، و دي من العوامل المؤثرة جدًا في معرفة و فهم الشغف، يعني مثلاً بتلاقي في بعض الحالات، ناس بتشتغل كعمال نظافة أو بتشتغل في محل كنتاكي أو ماكدونالدز، شخص يعيش ويموت و هو نفس العامل على الكاشير، لكن فيه أشخاص اعتبرت أن فترة العمل كبائع هي فترة مؤقتة و ينتقل لمكان آخر و شخص يترقى و يختلف حاله و شخص يقف ترقيه عند درجة معينة و هكذا، الوعي أحد مكونات الشغف و وجوده في

حياتنا (الوعي أحد أهم مكونات المنطقة المميزة لنا)، الوعي هل هذا ما أريد في عمري كله، أو أنا هنا لمرحلة مؤقتة، فكرة تقبّل التغيير والبحث عن فكرة فارقة.

عشان كذا رأس الأمر إتقانه والإحسان فيه والتطوير داخليًا للنفس وللشخصية والانتقال بالعقل لمراحل وعي وتطور مختلفة، كمان فهم فكرة الشغف ضمن مجالها وعدم تحميلها فوق ما تحتل و فهم الفرق بين الشغف ومنطقة التمييز الخاصة بكل شخص.

إذن أحيانا الشغف هو الإتقان والتطوير فيما تعمل، والممارسة الجيدة فيه، وبذلك تكون حاصل على لقب خبير، وهذا يؤدي بنا لفهم أنه معرفة الشغف لا تعني مطلقا إهمال سنوات من العلم والدراسة لشيء ما لمجرد أنك اكتشفت أن الشيء دا ليس شغفك، أو لمجرد أن شخص سألك وفجأة بدأت تبحث عمّا تحب، وعشت لحظات من الألم؛ لأنك شعرت أنك عايش في حياتك طبقا لكلام الآخرين وافتراضاتهم؛ لأن منطقة تمييزك تجمع الشغف تحت مظلتها بجانب الدراسة والخبرات ونوع الشخصية وعوامل مختلفة كثيرة، إن شاء الله سيتم تقديمها بطريقة منفصلة.

يعني مثلا، شخص درس الطب وكان فاكّر أنه بيحبه، وبعد سنوات من الممارسة وقف وسأل فين شغفي؟ فاكشف أن شغفه هو الكتابة.

هنا ينتقل الشخص لمرحلة وعي تساعد أنه يفهم أن أصبح عنده نقلة مختلفة في عالم جديد طبقا لتغيير يشمل حياته، هنا ممكن يستفيد من شغفه وخبراته، في أنه يكون مثلا كاتب أبحاث علمية أو طبية، أو يستفيد من عالم الطب في عالم الكتابة ومن أشهر الأمثلة لذلك الدكتور أحمد خالد توفيق – رحمه الله- فالطب من الممكن أن يكون شغفه والكتابة من الممكن أن تكون شغفه فقام بالدمج بينهما..

و من الممكن أن دكتور أحمد خالد توفيق مارس الطب بسبب أنه ساعده كشخص على مساعدة الناس ولكن شغفه الحقيقي في الكتابة، فدمج بين شيء درسه ولم يكن من شغفه مع شيء هو شغفه، ولكنه أحسن فيهما. و من الممكن أن الطب كان شغفه في مرحلة ما، و اكتفى منه و شبع من هذا الأمر، و دمج بينه و بين الكتابة التي يحبها، و يمكن أن الطب بالنسبة له كان اكتساب أكل العيش، و الكتابة شغف، و مهما كان الأمر فقد نتج عن اكتشاف الشغف و المنطقة المميزة، كاتب غير و أثر في جيل و أجيال كثيرة، و هذا من الإحسان و الإتقان و التطوير.

توضيح: شرح هذا المثال من وحي تفكير الكاتبة، و ذلك لوفاة صاحب الأمر رحمة الله عليه، و كان من أحلامي مراسلته و لم يتسن لي الأمر، المثال فقط لتوضيح فكرة الشغف و الإحسان و التمييز و التغيير في الحياة، والذي أحياناً يحدث بغير ترتيب منا كأشخاص و عوامل مختلفة جداً.

إذن الشغف ممكن أن يتم تعريفه على أنه "قدرتك على عمل الشيء أو الدمج بين أشياء متعددة مهما بلغت درجة اختلاف هذه الأشياء / الأمور، و بلوغك درجة الخبير فيها ناتج إحسانك للشيء و إتقانك فيه و وجود الحد الأدنى من المشاعر التي تجعلك ممارساً للأمر". و هو يجمع بين حبك للأمر و علمك و خبرتك في مجالات الحياة التي عملت و تعلمت عنها و فيها، و أخلاقياتك لممارسة هذا الأمر، ينتج من خلال هذا شغف عمل و شغف طريق مهم من خلال قوة الإتقان و الإحسان و التطوير و المثابرة و الصبر على العمل.

و دا يوصلنا لتعريف آخر للشغف، هو أنه الشيء الذي من الممكن أن تتقنه بشكل جيد جداً، لدرجة تجعلك تتخيل أن كل الناس تستطيع أن تعمل ما فعلت بكل سهولة، في حين أن الناس من حولك بتستغرب هو أنت عملت دا ازاي!!؟

سؤال: تفتكر ما هو الشيء الذي يتحدث الناس عن إتقانك له؟





## الشغف والإتقان والنضارة

لما تسمع العنوان، تشعر باستغراب هل فيه علاقة بين الشغف والإتقان و النضارة؟ الحقيقة فيه مشهد عالمي غالبا هتلاقيه في أفلام كثير؛ أحد الممثلين، واضع النضارة الخاصة بالنظر علي دماغه، وهو مصر على أن النضارة تايهة و ضايعة منه و مش عارف يلاقها، و بعد شوية يظهر حد يقوله النضارة علي دماغك سلامة نظرك، يقوم الممثل يتحسس رأسه و يلاقي النضارة، ويستغرب بالنظرة المشهورة؛ ازاي النضارة كانت معاه كل الفترة دي وهو مش عارف؟!

أحيانا الشغف بيبكون حاجة أنت بتعرف تعملها، و من كتر ما أنت شاطر و مميز فيها، مفكر أن الناس كلها بتعرف تعملها، و أن الناس كلها شاطرة فيها. و هنا تكمن الخدعة في أنك من كتر إتقانك للأمر استسهلته و أصبحت تفعله مثل شرب كوب من الماء بشكل سهل و يسير، و تعتقد أن الناس تقدر تعمله بكل سهولة، لكن الحقيقة أنه صعب جدًا على الناس اللي حواليك أنها تعمل اللي أنت بتعمله، زي مثلا اللي بيعمل تزيين للكيكات، أو اللي بيعمل تنظيم لحفلات في البيت و حاجات كثير متنوعة من هذا القبيل، داخليا بيبكون فاكرو إن كل الناس شاطرة في نفس الشيء اللي هو شاطرفيه.

إذن الشغف: (هو الشيء اللي ممكن تتقنه بشكل جيد جدًا، لدرجة تجعلك تتخيل أن كل الناس تقدر تعمل ما فعلت بكل سهولة، في حين أن الناس من حولك بتستغرب هو أنت عملت دا ازاي؟! و أنت بتكون مستغرب ازاي الناس بتسأل عن كيفية عمل الشيء)!!

إحدى صديقاتي كانت بتعمل ديكور للكيكات، ولما بتيجي تشرح لي ازاي عملت الكيكة، كانت بتكلمني بكل ثقة على أنني فاهمة هي بتحكي إيه، و ازاي ممكن نعمل ديكور للكيكة- رغم إنني أصلا مش فاهمة هي بتحكي في إيه؟!- ولما أقول

لها، واو عملت دي ازاى!! بتبصلي باستنكار:"دا سهل جداً، ازاى بتسألني عنها!!  
وازاى مش عارفاه؟!!"، هي كانت بتمارس شغفها وأنا نهيتها لكدا.  
لذلك هنا تحتاج لوجود أسئلة تساعدك في حلها الناس اللي حواليك عشان  
تقولك مكان النظارة فين؟ وتفكرك بها، كلما وقعت داخلها وقلت أنك مش  
مميز.

سؤال:اسأل الناس اللي حواليك، إيه هو الشيء (الأشياء) اللي أنت مميز فيه /  
بتعرف تعملها؟

---

سؤال:إيه الشغلانات / الأعمال و الوظائف اللي ممكن تشتغل فيها؟

---

نخلي بالناس من نقطة: صاحب النظارة كان هيعرف مكان النظارة لوحده،  
لكن هياخد منه وقت سواء كان وقت طويل أو وقت قصير عشان يوصل لمكان  
النظارة، الناس اللي برّه هتساعدك لكن رأيها مش أساسي و مش هو النهائي؛  
لأنك في النهاية صاحب القرار أنك ترفع إيدك وتلمس النظارة وتستخدمها، أو  
أنك تاخذها وتضعها في علبة في مكان بعيد أو حتى إنك ترميها وتكسرهما.  
أين كان رأي الناس في الأمر، في النهاية أنت اللي هتقرر، رأيهم هنا مجرد  
استرشاد فقط ليك ومساعد، لكن من غير رأيهم هتقدر تعرف مكان الشغف،  
لكن الوقت احتمال يطول كثير، لكن يفضل تشوف رأيهم في اللي بتقدر  
تعمله، يمكن يسهل عليك الطريق وتلاقي النظارة بشكل أسرع، وياريت يكونوا  
ناس ثقة و ذوي خبرة و ناس ناجحة ومرت بتجارب نجاح، و كمان فيه حب

وثقة وألفة بينكم. أعود متسألش شخص واحد فقط، لازم تتنوع و تسأل  
أشخاص مختلفين لأن الاختلاف يساعدك تكتشف نقاط مختلفة.

سؤال: تفتكر الناس شايفاك إزاي؟ أسألهم عن أحلى ٥ حاجات فيك؟

---

---

سؤال: إيه أكثره صفات مميزة ليك؟

---

---

## الشغف وسبب وجودنا & Reason to live

بتصحي الصباح، وبتسأل نفسك نفس السؤال: هو أنا موجود ليه هنا في الدنيا دي؟ أحيانا بتحس أنك لو عارف ليه؟ وإيه السبب من وجودك؟ ممكن تحارب الدنيا عشان خاطره، بس عشان مش عارف ليه؟!، حاسس أن في حاجات كتير بلا معني عندك.

فيه ناس كتير عندها اكتئاب أو حزن داخلي و يمكن إحباط شديد؛ لأن معندهاش داخليا سبب تعيش علشان، ساعات بنشعر بأننا نحتاج لسبب واحد فقط يخلينا نكمل في الدنيا رغم صعوبتها وتعياها اللي بنشعر به، رغم الألم والتعب والخلافات.

هنا أنا مش بتكلم عشان حد يرد ويقول إننا موجودين عشان نعبد ربنا كما ذكر ربنا سبحانه وتعالى في كتابه الكريم، كلنا عارفين الرد دا ومتأكدين منه، بس العبادة المطلوبة إيه هي؟ إيه نوع العبادة المطلوبة مني كشخص؟ ازاي أعرفها وأوصلها، إيه نوع الرسالة أو الأثر اللي المفروض أسببه في الدنيا؟، إيه هو الشيء اللي يوصلني لرضا ربنا وإني أكون أدبت الأمانة من خلال استخلافي في الأرض.

العبادة المعروفة زي الصوم والصلاة والعبادات والفروض والنوافل والسنن كل دي مش محل خلاف أبدا، ولا محل نقاش لأننا المفروض نعملها، لكن أنا بتكلم عن إعمار الأرض والخلافة فيها، كل واحد فينا مُستخلف في الأرض لأن له دور وله نقطة أو (منطقة مميزة) هو شاطر فيه، حتى لو كان من نفس الشخص ملايين زي شاطرين في نفس النقطة أو في نفس المنطقة المميزة، زي النجوم في السماء، كلها نجوم ومع ذلك اختفاء نجمة هيكول مؤثر؛ لأن الدائرة الخاصة بضوء هذه النجمة مهما كان صغير هيضلم أكيد، و مش

هيوصل اللي بيحتاج له، تخيل لو كل نجمة قالت أنا ماليش لازمة و مش مهمة، هتكون إيه النتيجة؟

صحيح اختفاء نجمة واحدة مش هيخلي نظام الكون يقع أو يدمر من جهة عقلنا وتفكيرنا.. احنا عارفين ليه؟ لأن الإنسان لا يدرك التغيير وشكله إلا إذا كان دي السمة العامة في المكان.

يعني لو نجمة واحدة قالت أنا مش هظهر ثاني و ماليش أهمية في الحياة وأنا مش مهمة و قررت تختفي، الإنسان صعب يلاحظ دا، لكن لو كل النجوم في منطقة ما، أجمعت علي أنهم مالهمش أهمية و مش لازم يظهرُوا؟! (حتى لو نص نجوم هذه المنطقة قالوا الكلام دا، وكان دا تفكيرهم)، الإنسان هيدرك و يفتقد وجودهم، رغم أن الموضوع بدأ بنجمة واحدة فيهم قررت أنها مش مهمة، و باقي النجوم بدءوا بعدها باتخاذ القرار وتنفيذه.

لو الشمس غابت و لم تظهر أبدا، كلنا هنفقد الموضوع دا، و فيه أفلام اتعملت عن كذا فعلا، طيب لو شعاع ضوء من الشمس قرر إنه مالوش أهمية و مش هيظهر و اختفى، تفكر الإنسان هيشعر بغيايه؟

أكيد لأ، و لو أشعة ثانية شافت أن الشعاع لما اختفى محدش حس به و تسلل لداخلها إحساس إنها مش مهمة هي كمان، و قررت إنها تختفي في منطقة كاملة زي مصر و لا ماليزيا و لا أمريكا، هيحصل إيه؟

الناس هتلاحظ الاختفاء دا، يبقى قرار أن الشخص مش مهم، قرار مشكلته تكمن أنه لو تسلل للجميع ساعتها فلن تجد أحداً يقوم بمهمة التغيير داخله لينطلق التغيير في العالم.

كلمة Ikigai، دي كلمة يابانية تعني السرور و وجودنا في هذه الحياة، السبب اللي بيعطي لحياتنا و وجودنا معني، و الهدف من وجودنا، لو اكتشفنا ذلك

هنعيش في سعادة؛ لأن هيكون فيه سبب تشعر أنك مهم و موجود عشانه، و  
هتصحى كل يوم و أنت بتحارب من أجله.

دا مبدأ ياباني، وله كتب متعددة تشرحه، و من خلال هذا المبدأ يشرح لك أن  
سوجودك هتعرفه من خلال بعض الأمور التي يجب أن ترد عليها و تسأل  
نفسك هذه الأسئلة التالية.

What do you love?

ماذا تحب؟

---

What are you good at?

ما هو الشيء الذي تجيد فعله، أو الشيء الذي ممكن تكون شاطر فيه؟

---

What can you be paid for?

إيه الشيء الذي ممكن يتم الدفع ليك، فتأخذ عنه مال؛ لأنك شاطر فيه و  
تجيده؟

---


What does the world need?

ما هو الشيء الذي يحتاجه العالم منك و من خلال ما تجيده و ما أنت بارع  
فيه و ما تستطيع تقديمه للغير؟

---

# Ikigai

A JAPANESE CONCEPT MEANING "A REASON FOR BEING"



SOURCE: dreamstime

TORONTO STAR GRAPHIC

تعليق من الكاتبة: في الصورة تم كتابة أن الشغف هو الهواية، والحقيقة أن دا خطأ، الشغف ليس هو الهواية، الهواية تُعتبر جزءاً من الشغف، ومن معرفته وليس العكس. والشغف يُعتبر جزءاً من المنطقة المميزة لدينا، وجزءاً من سرتواجدنا على الأرض وليس هو السبب الوحيد لوجودنا على الأرض.

نقطة مهمة جداً: يوجد فرق بين شغفك ومنطقة تميزك التي من خلالها تستطيع معرفة الشيء الذي أنت موجود لأجله (سبب وجودك في الحياة)، معرفة الشغف جزء من معرفة سبب وجودك، وليس هو كل شيء في الأمر، من خلال رحلتي في معرفة الشغف ومعرفة نقطة تميزي وما هي المنطقة التي أحبها، عرفت أن سبب الوجود في الحياة ينقسم لعدة أمور إذا تم معرفتها

بشكل واضح وفهمها بشكل متناسق وترتيب القطع فيها بشكل متناغم؛ مثلما ترتب قطع puzzles، تحصل علي شيء مميز يخصك أنت كشخص ويجعل لك بصمتك الخاصة التي تحلم بها.

\* في كتاب آخر (إن شاء الله)، سيتم عرض هذه الأمور مع شروحات لها، و تقديمها بشكل مبسط حتى تصل لنقطة تميزك

نعود مرة أخرى لموضوعنا (Ikigai)، لو قدرت توصل لمعرفة ما تحبه، وما أنت بارع في عمله، و ما يمكن أن تقدمه كخدمة و كمنتج يستفيد منه الآخرون و العالم من حولك، ويتم الدفع لك من خلاله- فستصل لنقطة تميزك و سبب وجودك في هذه الحياة؛ لأنك هتشعر أنك مميز و تمتلك السبب الكافي لتقاوم كل رغبة من رغبات الإحباط و التكاثر و ستجد المحفز؛ لأنك تمتلك سببًا وجمها للحياة؛ و أيضًا لأنك تعمل فيما تحب و تقوم بدفع فواتيرك و تستطيع تحقيق معيشة مناسبة لك، حتى لا تكون مُجبرًا علي العمل في مجال أو مكان لمجرد أنك تريد دفع فواتيرك و أنت تكره هذا المجال أو هذا المكان، مما يُسبب عبئًا إضافيًا فوق أعباء الحياة و عبء مواجهتها أيضًا، مرهق أن تكون في مجال أو مكان غير مناسبين لك و لشخصيتك.

و لو لم تمارس الشغف كعمل و تدفع منه فواتيرك، فإن معرفتك له و ممارسته في أوقات تختارها تجعلك مستريحًا و نفسك مختلفة و يكون قرار ممارسته أو عدمه قرارك الشخصي الخالص الذي تتحمل تبعاته بشكل كامل. لهذا نسعى لمعرفة الشغف؛ لأنه سهل أن نعرف ما نجيده، لكن ما نحبه، من الممكن أن يكون صعبًا معرفته، و ليست الصعوبة بسبب أننا لا نعرف، ولكن لأننا نعاني ضغوطًا كثيرة في صغرنا و في حياتنا، نعاني مخاوف و انتقادات كثيرة، نعاني تسارع خطوات التكنولوجيا، نعاني أمورًا متشعبة تمر علي أجيالنا تجعل الأمور صعبة بما فيه الكفاية من نواحي متعددة.



غالبًا لما نفكر نعمل حاجة بنحها أو ناخذ قرار ما، هتقابل أمثلة و كلمات زي كذا: "متعملش دا، الناس تقول علينا إيه؟"، "دا مش بياكل عيش؟"، "أتعلم حاجة تجيب فلوس وبعدين أبقي أعمل اللي بتحبه"، "هتفضحنا، و يقولوا علينا إيه؟".

الكثير منا عاش في صراعات المجموع الكبير، و أحلام الآباء و الأمهات، و ماذا يريد الآخرون؟، حتى عندما تُقرر أن تختار شيئًا تواجه نقدًا و تحكمًا في قراراتك تحت مسمى "أنا أعرف أكثر منك"، "أنت عيل و مش فاهم"، "طول عمره غبي، و مش بيعرف ياخذ قرار"، أنت عمرك ما اخترت صح". و أشياء كثيرة لم نقف يوما لنعرف ماذا نحب، و هل هذا ما نريد أم لا؟ هل ممكن أن أبدأ من جديد؟ هل هناك سعادة و توازن و حياة جميلة رغم الصعوبات؟ مليون سؤال و لا يوجد ردود شافية من داخلنا.

من خلال معرفة الشغف، و أمور أخرى متعددة ستجد منطقة تميز خاصة بك، ولكن البداية مهمة في معرفة ماذا تحب و ماذا تتقن؟، و ما هي خبراتك و ما هو مستوي وعيك و تفكيرك و معتقداتك، و كل ما يخص شخصيتك و تفكيرك، الشغف هو البداية.

## لماذا نسعى لمعرفة الشغف؟

طيب هو إحنا ليه عايزين الشغف؟ إيه نوع المشاعر اللي عايزين نعيشها من خلال الشغف؟

عشان تعمل شيء ف الحياة، بنحب يكون شيء حلو، و الأفضل لو تكون بتحبه عشان تقدر تتقن فيه، البني آدم لو عاش في دائرة لذة، و في عالم قُرة العين، فمهما حصل هيمر بلحظات سعيدة و لحظات تعيسة و لحظات حزينة، لكن في مجمل حياته هيعيش في سعادة مختلطة بأوقات من الشكوى؛ لأنه عنده سبب كافى يكمل عشانه و يعيش في الدنيا و يمتلك حاجة بيعها و يمارسها، الشكوى عنده أصبح لا محل لها من الإعراب؛ لأن اللذة و الاستمتاع طاغية على جزء كبير من عالمه، إلا إذا كان شخص شكاي بطبعه و دا البُعد عنه غنيمة.

و لأن مع ممارسة ما تحب درجات الوعي تختلف بشكل كبير، رؤيتك للأمور تختلف، ممارستك ما تحب لن تمنع المشاكل لكن مواجهة المشاكل في شيء بتحبه و مؤمن به تختلف تماما عن شيء أنت لا تحبه، و لا تمتلك أقل قدر من المشاعر ناحيته، بالإضافة إلى أنك تشعر بالسوء من ممارسة هذا الشيء المتعب أيضا.

سؤال: يبقى حاول تعيش و تكون في دائرة اللذة و عالم قرة العين لك، فتفكر إيه الشغلانة/ العمل أو ما هو الشيء اللي ممكن تمارسه و يجعلك عايش في عالم من اللذة و المتعة و الاستمتاع؟

---

---

يعني إيه دائرة لذة؟: يعني شيء يكون جميل، وقت حلو، لحظات حتى لو كانت صعبة، بيبكون فيها أمل وحب ومودة، وعكس دائرة اللذة هي دائرة الألم، فلو أخذنا بالناس من كلام الرسول (صلي الله عليه وسلم) كان بيقول "جُعِلَتْ قَرَّةُ عَيْنِي فِي الصَّلَاةِ"، يعني الصلاة دائرة لذة وحب واستمتاع ولذة القرب من الله، هل دا يعني أن الصلاة سهلة وحاجة بسيطة وشيء سهل عمله؟ لأ، طبعاً؛ لأن ربنا سبحانه وتعالى ذكر في القرآن الكريم { وَأْمُرْ أَهْلَكَ بِالصَّلَاةِ وَاصْطَبِرْ عَلَيْهَا لَا تَسْأَلُكَ رِزْقًا نَحْنُ نَرْزُقُكَ ۗ وَالْعَاقِبَةُ لِلتَّقْوَى }، سورة "طه"، الآية (132)، لكن رغم تعبها، فإنه الشيء الذي كان قُرّة عين للرسول الكريم.

يبقى محور كلامنا عن الشغف بالمشاعر الإيجابية، مش الشغف بالمشاعر السلبية، الشغف اللي لمسك من خلال التعريفات السابقة.

من خلال تعريفات الشغف السابقة، هتلاقي تعريف لمسك وجعلك تشعر إنك قادر على إنك تعيش من خلاله و من خلال فهم هذا المعنى. اكتب أكثر تعريف للشغف حسيت نفسك فيه؟

---



---

**سؤال:** لو عارف سبب يخليك عايز تعرف شغفك، اكتبه.

---



---

الأسباب دايماً بتخلينا نحاول، لو عارف سبب يجعلك تحاول أن تعيش، عليك أن تكتبه، لو عارف سبب يجعلك تكمل طريقك اكتبه واحتفظ به، عشان لو مشيت ف الطريق وتهد فيه مستقبلاً، تلاقي السبب اللي يخليك تحاول مرة أخرى وتكمل مهما حصل. أنا هكتب جزء من أسبابي الخاصة اللي خلّطني عايزة أعرف شغفي، هشاركها معكم:

١. لأنني معنديش استعداد أعيش في مشاعر سلبية ونكد، يكفي عمري اللي ضاع في نكد وتعب.

٢. الحياة مرة واحدة بنعيشها، مش تجربة هكررها في عمر ثاني وزمن ثاني.

٣. طول ما أنا عايشه هخلي كل يوم تجربة جديدة و محاولة جديدة حتى اسعد بها

٤. عشان اعرف رسالتي في الحياة، أنا جاية الأرض عشان رسالة عايزة اعملها، ويكون أدائي للرسالة محطة وصولي لرحلتي الأخيرة وهي الفردوس الأعلى، أسأل أن يؤمن به الله علينا جميعا.

٥. عايزة أعيش شغفي و اعمل منه بيزنس ناجح

٦. عايزة أكون مميزة في شيء حتى لو كان فيه غيري مميز، عايزة أحس تميزي الخاص

٧. تحقيقي لتميزي ه يكون سبب أن أولادي يحاولوا يكونوا مميزين

٨. أكون قدوة لمن حولي و يمكن محاولاتي تكون سبب نجاح حد أو بداية طريق شخص ثاني يحاول هو كمان و يكون عنه لحظات حلوة في حياته.

أسبابي كتير و كل ما كنت بقع في الطريق كنت بلاقي الأسباب اللي تسندني و تخليني أكمل.

سؤال: اكتب أسبابك ليه عايز تعرف شغفك؟

---

---

---

الأسباب كتيرة وكل واحد فيهم عايز توضيح مفاهيم كلنا، أو أغلبنا، عايشها غلط، طيب لما هو الموضوع لذيد كدا، ليه مش بنحاول فيه ونمشي فيه بكل سهولة؟

مش انت فهمت إن الشغف إنك تعمل الشيء اللي بتحبه، أو تعيش مع الناس  
اللي بتحبها، وتمشى ف طريق وتعرف رسالتك، طيب الموضوع سهل ولذيذ  
جداً!!!!، طيب ليه مش بنعمله؟، تفتكر ليه مش بنعمله؟، و ليه انت مش  
بتعيش شغفك إذا كان الموضوع بالسهولة دي؟  
اكتب أسبابك

---

---

رحلتنا مع الشغف عبارة عن عربية احنا بنقودها أو بالأحرى دماغنا بتقودها،  
ولازم نملأها بنزين ونضبطها ونعيش فيها حياة حلوة، لأن العربية في النهاية هي  
احنا وأفكارنا وشغلنا وعقلنا وكل ما نمتلكه.

تعليق من الكاتبة: الزمن القادم، من المهم فيه أن تعرف ما هي منطقة  
إبداعك وتميزك وكيف تتفوق فيها وتكون متميز، حتى يكون لك بصمتك التي  
تحبها، لا يهم مدى حجم هذه البصمة ولا مدى استمراريته التي تتوقعها مع  
الزمن، لكنها ستكون موجودة في داخل كل شخص وصلت له من خلال  
إبداعك وتميزك وتفوقك، لا يوجد وقت زيادة في الحياة للعيش ضمن  
مستويات الضغط والقلق وعمل مالا نحب، أو الاستمرار فيما لا نستطيع  
إتقانه علي المدى البعيد، الإتقان يعطينا الإحساس بالتميز والخبرة والثقل، و  
كذلك نحب الأمر باستمرارية إتقانه، وتربية النفس وتعويدها على الاستمرارية  
فيه أمر مهم جداً.

كل شخص غير وجه العالم، غيره بأمر بسيط، كان يتقن و يحب ما يفعل،  
حتى لو كان الحب هو الترتيب الثاني و ليس الأول في العمل. الكلام دا منطبق  
على الزمن القادم والأزمنة السابقة.

# رحلة شغفك، كيف تكون؟

## الرحلة و من أين تبدأ؟

انت عايش فين؟ ده أول سؤال لازم تكون عارف إجابته. انت عايش فين من شغفك، عايش في دائرتك، ولا في دائرة شخص آخر لا يخصك دائرته من الأساس؟ وهل دائرة الشخص الآخر فيها شيء يشبه لك، ولا لا؟

سؤال: توقعاتك إيه؟ انت عايش في حلمك ودائرتك و أي شيء يخصهم، ولا انت عايش في دائرة حد آخر وحلمه؟ يعني أنت بتمارس ما تعمل عشان حد فرضه عليك، ولا عشان هو اللي بييجيب فلوس وبس ولا عشان أنت بتحبه؟


---

للتوضيح مش عيب نتشارك حلم مع حد ثاني؛ يعنى لو انت شغفك تعليم الناس، وقابلت شخص عنده نفس الشغف و بيمارسه و نفس نوع الوظيفة بتاعتك، دا مش معناه انك عايش في حلمه، و حتى لو تم التعاون بينكم و عملتوا مشروع واحد سوا، أنتم كده عايشين في حلمكم ودائرتكم، و دا يساعدكم، هل فيه في الدنيا أفضل من حد يسندك و يعينك و يساعدك في نفس الرحلة و يصبرك عليها و يمر بنفس الصعوبات، و يكون فاهم أنت بتحكي عن إيه و مقدر الأمر و صعوبته، و مقدر ما تمر به أنت كشخص؟!

لكن لو انت شغفك التعليم و بتشتغل دكتور أو محاسب (على سبيل المثال)، وعايش في عالم مختلف عنك، و أنت بعيد عن هذا العالم، يبقى انت كدا مش عايش في دائرتك ولا في حلمك، حاول تعرف أنت بتحبه إيه؟ و شغفك فين؟ و حاول توصله قدر استطاعتك و خلي بالك نفسك؛ ففي صاحبك في الطريق، اتعلم تحبها و تواجهه و تقوم بعمل توجهات لها و تفهمها، شخصيتك، مهم تفهمها و تعرف نقاط ضعفها وقوتها.



رحلتنا زي اللي في الصورة، أنت واقف عند نقطة (A)، و عايز تروح لنقطة (B)، هتعمل إيه وتروح هناك ازاي؟



نبدأ رحلة بتحديد إحنا عايشين فين؟ هل احنا عايشين في المنطقة المعروفة فيها شغفنا ولا عايشين في منطقة الراحة الخاصة بشغفنا أو بشغف حد ثاني؟  
إيه الكلام اللي يلخبط دا، أيوا، هي دي الرحلة، لازم تعرف فيها التالي:

- هل أنت عايش في منطقة شغفك ولا لأ؟
- هل أنت عايش في شغف وحلم حد ثاني ولا لأ؟ وليه عايش هناك أصلا؟ عشان الفلوس، ولا المجتمع، ولا المجموع الكبير، ولا عشان دا أمر أبوي..... إلخ.
- هل أنت عايش في منطقة الراحة بتاعتك ومش عايز تخرج تطور شغفك وتنتقل لنقطة جديدة في حياتك وتعرف الناس وصلت فين؟
- هل أنت عايش في شغفك فعلا، ووقت الانتقال والتغيير حان وأنت رافض وتمسك بمنطقة الراحة بتاعتك الخاصة بشغفك؟

أسئلة كثيرهنعرف الإجابات الخاصة بها في خلال رحلتنا، و من خلال رحلتي الي مشيتها من فترة طويلة، وكان الرفض و الحيرة و المقاومة والقبول و أمور متعددة، و أيضا تنوع المحاولات ما بين الفشل و النجاح و العجز أحيانا هم أكثرسمة مميزة لها.

رحلتي بدأت بصدمة في مجال عملي اللي بحبه، بتدمير حلم كنت بنيت عليه كل حياتي، عقلي لم يستوعب هذا الانهيار الشديد، وانطلقت من خلال فكرة إيه الشيء اللي بحبه و نفسي أشتغل فيه؟، ما دام أنا اتصدمت في المجال اللي بحبه و اختارته عن كامل رغبة مني؟ هل أنا دخلت الهندسة عشان بحبها (رغم أنني حاربت عشان يتم تنفيذ رغبتى و أدخلها؛ لأنني بحبها جدًا، هل وقت التغيير جه عشان أنتقل لشيء ثاني و مجال ثاني؟ هل أنا اخترت من الأول غلط؟ هل أنا ندمانة؟ هل ممكن أكون بحب الهندسة و تغيير حياتي دلوقتي نتيجة صدمتي، و يمكن مجرد حالة من الزهق و هتخلص؟ طيب هل أستحمل و أكمل ولا لأ؟ طيب هو أنا عايزة أتخلّى عن المجال ليه أصلا؟ عشان مصدومة، ولا عشان كدا خلاص حان وقت التغيير؟ طيب الناس هتقول إيه لما تلاقي مهندسة بتشتغل في وظيفة أو شغلانة تانية غير مجال دراستها، كوتش في البيزنس مثلا؟ طيب بابا و ماما و المجتمع هيقول إيه أصلا علي؟ طيب هعرف نفسي و أقدمها للناس و أقول إيه؟.

طيب هو أنا شاطرة في إيه أصلا؟ طيب ممكن أشتغل في إيه؟ و هل ممكن أشعر بسعادة بعد ما الهندسة بقت محل تعب بالنسبة لي؟ طيب هل الهندسة مرحلة و خلصت ولا أنا اللي زهقت من شغلي و بس؟ فلو غيرت، ممكن بعد فترة أرجع ثاني للهندسة؟ مليون سؤال مروا علي عقلي، كنت كل يوم بحاول القى حل أو رد يشفي عقلي و نفسي و يخليني أفهم هو إيه اللي بيخليني مش

قادرة أرد على الأسئلة و أقطع كل الشكوك جوابا، و كمان مش قادرة أعمل قراريريحي.


جه عليّ وقت كنت بسأل الناس "قولوا لي أنا شاطرة في إيه؟ هو أنا بحب إيه؟ هي إيه قدراتي و نقاط قوتي؟ هو أنا ممكن اشتغل إيه؟"، في لحظات صعبة كتير كنت بقول كلمة واحدة، "عايزة حد يقولي إنتي ينفع تشتغلي الشغلانة الفلانية، و أنا و الله، مش هعترض و هروح أشتغلها علطول، لأن أكيد هم عارفين شخصيتي أكثر مني"، أنا تعبت من البحث عمّا يميزني، و مبقتش عارفة أوصل لشيء، و خصوصا لو كنت بتمر بأزمة منتصف العمر كمان، اللي فيها بتقف قدام المرايا و تسأل نفسك هل هو دا اللي كنت بحلم بيه؟ هل هو دا الطريق اللي عشت أول عشرين سنة في عمري أتمنى أوصل له؟ هو أنا فين من أحلامي، هو أنا شكلي اتغير كدا ليه؟ هو دا اللي كنت عايزه؟ هو آخر ١٥ أو ١٠ سنين من عمري عملت فهم إيه؟ ولا راحوا فين مني؟.

أرسلتُ لشخصية معروفة، و كمان قدرت تعرف شغفها و النقطة المميزة لها، أو المنطقة المميزة لها بشكل أدق، و سألتها "لو عملت اختبار الشخصية الفلاني، و عرفت أنواع الوظائف المناسبة لي، هل تقدري تختاري لي حاجة من خلال خبرتك و تقولي لي أشتغل في الشيء دا، و أنا و الله همارسه علطول، لأنني من الآخر تعبت و مبقتش عارفة أنا عايزة إيه؟ و خايفة أختارو يحصل معايا زي ما حصل و زهقت و اتصدمت من الهندسة، و يمكن خايفة بعد ما أمشي في الطريق أندم أو يكون فيه طريق أحسن من كدا، و أضيع فرصة اختياري للطريق الصح"، ردت عليّ "محدث في الدنيا هيعرف يرد علي أسئلتك إلا أنت..، و انتهت رسالتها علي كدا.

ساعتها، كانت أكبر لحظة مظلمة عدتُ عليها، الدنيا انهارت بالفعل، حاسة أنني تعبت، و مش قادرة أكمل، و مش لاقية حد يقولي اعملي كذا، أو إيه الخطوات

اللي ممكن تنقذني من التعب الداخلي و الصراعات اللي جوايا؟ كنت عايزة حد يقولي، الطريق فيه كذا، و كذا، و أنت اتعامللي بطريقتك، و هتزهقي و تغيري الطريق مرات كتيرة، اصبري، و كملّي و متتعبيش، و أنا كل عدد من السنين هنغير مجالاتنا و نغير حياتنا؛ لأن خبراتنا و شخصيتنا و كل ما نمتلك بيتغير و بيختلف طبقا للي عدينا فيه قبل كذا، و طبقا لتجاربنا و لحظات بيتغير وعينا فيه، الحياة سر جمالها في التغيير اللي إحنا بنعمله و نصنعه و اللي أحيانا بيكون مفروض علينا نتاج ما قمنا باكتسابه طوال الرحلة، كنت عايزة حد يقولي استمتعي أكثر بمعالم الرحلة عشان تتبسطي، كنت محتاجة حد يفهمني إيه العقبات؟ و المشاكل الخاصة بالطريق؟ فيه تفاصيل بتساعدك على الطريق، لكن فيه ناس كثير بتنسى تحكيمها عشان نتعلم منها. أنا في الكتاب بحاول أعرض جزء من الرحلة و التفاصيل اللي متوقع تمر بها، و إن شاء الله، يكون فيه استكمال لباقي الرحلة في كتابات أخرى.

## Comfort zone vs. Known Zone



الشكل رقم 1: الدائرة العامة لتغير الإنسان وتغير شغفه و حياته و ما  
يمارسه من عمل

يمكن هنا بقديم تصور مختلف شوية عن المتعارف عليه من قبل للمفاهيم، و هذا لا يعني أن رؤيتي صحيحة في المطلق، أو خطأ في المطلق، لكن هذه الرؤية صحيحة من خلال تجربتي الشخصية وتجربة من قمت بتدريسيهم، و من خلال القراءة و التجارب، وجدت إن هذه الرسمة معبرة من وجهة نظري أكثر عن الرحلة.

من وجهة نظري إن هذا الرسم يعبر عن مدى الانخداع الذي نمر به و لا نكتشفه إلا حين يحدث زلزال يغير مجرى الحياة، أو أن يكون عندنا درجة وعي تجعلنا نراجع كل خطوة في حياتنا ونسأل أنفسنا، هل هذا ما أريد؟ هل هذه رغبتي؟ هل أنا على الطريق الصحيح؟ و نراجع طريقنا باستمرار كل فترة، أو نكتشفه في لحظات ما قبل الموت، "أيوا، وارد جداً أعيش عمري كله متوهم شيء و لا اكتشف الحقيقة إلا قبل الوفاة؛ وهذا لأنني لم أراجع حياتي و خطواتي، ولم أقف لكي أسأل نفسي وأناقشها".


نحصل على نفس النتائج لكنها مختلفة بدرجات من خلال ممارسة الشكل العام لهذه الرسمة، نبدأ الطريق، من خلال توجيه أحد ما لنا أو نقوم بتوجيه أنفسنا، نعيش في مرحلة من الكد و التعب و الإرهاق، الفارق هل هذا باختيارنا أم بسبب ضغط مباشر أو غير مباشر من أنفسنا أو ممن حولنا و من المجتمع، ثم ندرك الطريق ونتقنه، ثم ننتقل ونعيش في الطرق التي أتقناها، و يحدث زلزال التغيير و الوعي في أي لحظة يعيد الكرة من أول و جديد.

القلق والخوف الوحيد في الأمر يكمن إذا لم تمر بهذا الزلزال أو التغييرات أولاً تدركها، و أن يكون موعد هذا التغير هو وقت الوفاة، الندم لن يفيد؛ لأنك كررت حياتك بشكل كبير، بمعنى آخر كررت يوم واحد في حياتك لمدة ٧٠ سنة (إذا كنت ستموت عند عمر ٧٠ سنة-ربنا يديكم الصحة و السعادة) مع اختلاف بسيط في التفاصيل، عليك أن تراجع يومك و هل هناك الجديد في كل يوم، و تحرص على رفع درجة وعيك باستمرار، و تعلم أن الاستمتاع و محاولة أن تكون نفسك و محاولة الفهم لطريقك و الاستمتاع به من أساسيات إحساسك بوجودك في الحياة.

هوضح أكثر ليه جمعت كل النقاط في هذه الرسمة، و التي من الممكن أن تسبب عدم وضوح لفهمها، المخططات التالية ستشرح الأمر بشكل أكثر

وضوحاً، المخطط السابق هو عبارة عن مجموع المخططين التاليين، ومن المهم أن نفهم أننا نمر بها خلال رحلتنا في الحياة مع اختلافات خاصة برحلة كل شخص فينا لكي نعرف ما نحب، وما هو شغفنا، وما هي نقطة تميزنا.


الشكل رقم 2: تعش في منطقة تميزك، شكل حياتك وماذا إذا حدث زلزال تغيير؟



نقطة توضيح: لماذا لم تظهر نقطة وقرار عدم التغيير هنا؟ لأن غالباً بحثنا عن أنفسنا وعمّا نحب وعمّا نريد، يجعل درجة الوعي عالية جداً، ويجعل

هناك محاولات مستمرة لقبول فكرة التغيير و المحاولة للتغيير، حتى لو لم تنجح بشكل كامل.

الشكل رقم 3: تعيش في منطقة تخص غيرك، شكل حياتك و ماذا اذا حدث زلزال تغيير؟



سيتم شرح الأشكال السابقة بشكل مجمع كامل كدورة متكاملة ثم بشكل تفصيلي أكثر لاحقاً في الصفحات القادمة.



## شرح الشكل رقم ٢

كما هو واضح من الشكل و الاسم، لو بدأنا من منطقة الراحة الخاصة بنا، فإننا نعيش في منطقة راحة لنا، و هي منطقة محبة لنا، ثم يحدث زلزال تغيير.

(أمثلة لزلزال التغيير: ظهر مستجدات في حياتنا مثال أننا نرى أن الخبراء هم الصبح فقط"، وأن رئيس القسم هو الخبير في الأمر و يظهر معيد يعرف معلومة أو يعلم شيئاً أصح و أفضل، و أحيانا صراع الأجيال بين الخبرة و بين توافر المعلومات بكثرة"، أو اكتشفت خطأ في اعتقاد عندي "أني مش هنجح لو عملت الخطوة الفلانية: مش هنجح لو فكرت انزل ادرس للناس فأكتفي بالكتابة فقط"، أو افكرت أنني هفضل في المنطقة مسافة كبيرة "مثال شهير للاعب كرة القدم فاكّر إنه هيفضل في الملاعب لفترات طويلة بدون اعتزال"، أني أكون براجع نفسي و خطواتي باستمرار، إنه يحدث عندي تغيير في معدل الوعي و النضج الشخصي، ابتلاء أو فقد أو حوادث لناس مقربين، أشياء كثيرة ممكن تسبب زلزال التغيير)

بعد ما يحدث زلزال التغيير، تعيش في منطقة صراعات و تشمل مراحل كثيرة؛ منها مقاومة التغيير ورفضه، و مشاعر مستمرة للقلق و الخوف و تساؤلات مثل هل أنت علي الطريق الصحيح ولا لأ؟، مشاعر محاولة الرجوع لوضع الأمان و الإبقاء عليه و التمسك به، و تكون ظاهرة بوضوح في منطقة الضباب، القلق من الناس من حولنا، و كمان بنسمع كلمات أحياناً تكون غير مشجعة علي قبول التغيير و أحيانا تكون مشجعة، و يظل الأمر مؤلم بشكل كبير؛ لأنه قائم على الصراعات و عدم الاتزان.

ثم مع الوقت و المحاولات الواعية ننتقل لمنطقة جديدة و هي منطقة التغيير و ما بعده، و التي نبدأ في إتقان جديد لعادات و لنمط حياة جديد و قبول فكرة

التغيير ومحاولة الاستمتاع بها، ونعيش هدوءًا نسبيًا في المشاعرو الصراعات لفترة ما، ثم نتقن نمط الحياة ونكرره حتى نصل لاتزان كبير في مشاعرنا و صراعاتنا، و ننتقل مع الوقت لمنطقة الراحة الجديدة ونستقر فيها. و يبدأ الزلزال يضرب المنطقة ونعيد الكرة (الدورة) من الأول مرة ثانية.

### شرح الشكل رقم ٣

كما هو واضح من الشكل والاسم، لو بدأنا من منطقة الراحة الخاصة بنا و هي منطقة لا تخصنا بشكل كبير و من الممكن أن تكون منطقة حلم و شغف و تميز تخص شخصًا آخر و احنا عايشين فيها بشكل جزئي أو كامل، و رغم ذلك نعيش في هذه المنطقة و نعتبرها منطقة راحة لنا حتى لو كانت منطقة نجبر أنفسنا عليها أو يُجبِرنا عليها أحد، و مع الوقت يكون هناك استقرار فيها، لأنه من كثرة التكرار يحدث التعود و الركون للراحة، ثم يحدث زلزال تغيير.

من أشكال الإجبار الذي نمر به أحيانًا سواء كان الضغط من أنفسنا على أنفسنا أو من الخارج علينا: ضغط المجموع و الثانوية العامة و هنتغل إيه؟ و الناس هتقول إيه لو دخلت الكلية الفلانية؟ أو لو حببت أمارس الشغلانة الفلانية؟ و أحيانًا هذا الضغط يكون باختيارنا؛ مثال لذلك أحب الرسم و أقرر دراسة الصيدلة أو الطب؛ لأنها كليات قمة و أنا مُصرو مقتنع بذلك، أو لأن الدخل المادي كبير؛ أي الخضوع لسوق العمل و احتياجاته.

ملحوظة: مش معنى كدا إني مع أو ضد هذا الكلام، أنا بعرض فقط ما يتعرض له الناس و أنا واحدة منهم في الحياة و في اتخاذ القرارات و في اتباع ما يحبوه و ما يشعروا إنهم مميزين فيه.

ثم يحدث زلزال التغيير أيا كان سببه، (تم عرض أشكال من زلزال التغيير سابقا)، الأشكال كثيرة جدًا لزلزال التغيير.

فنتقل للمنطقة الضبابية، وهنا يحدث أكثر من سيناريو، وأكثر من قرار، وأكثر من قصة للحياة، المعلوم أن هذه المنطقة يحدث فيها صراعات داخلية وخارجية ونفسية وعدم استقرار، وأيضًا لا نعلم ما ينتظرنا.

السيناريو الأول: يقرر الشخص مهما حدث ومهما كانت المعاناة في التغيير، أن يظل يصارع ليحافظ على منطقة الأمان والراحة الخاصة به، مهما كان الأمر مكلفًا ومؤذيًا له ولغيره، وبذلك يصارع الشخص طول الوقت للبقاء في منطقة الراحة و يظل منتقلًا بين المنطقة الضبابية ومنطقة الراحة، ولا يحدث استقرار مطلقا رغم محاولاته المستميتة للحصول على الاستقرار؛ لأنه يرفض أو يخاف من فكرة التغيير.

السيناريو الثاني: ينتقل للمنطقة الضبابية ويحاول أن يجبر نفسه على عمل ما يفترض أنه الصبح طبقا للنظام السائد في المجتمع، والتفكير مهما كان الأمر مكلفًا، مثلا لو كان رئيس الحسابات في إحدى الشركات وهو فرض عليّ بنفسه دخول هذا المجال؛ لأنه يتوقع وجود دخل عالي، ثم حدث زلزال تغيير وتولي شخص أصغر منه في العمر بقليل وحاصل علي الماجستير في الحسابات ووظيفة رئيسه المباشر(رئيس لرئيس الحسابات في الشركة) هنا وجود الشخص الجديد والصغير في السن قام بتفعيل زلزال في حياة رئيس الحسابات، ويدخل رئيس الحسابات في صراعات ومقاومة لما يحدث ودا شيء طبيعي جدًا، فيقرر إنه لازم يدرس ماجستير ودكتوراه ويحصل علي دورات متقدمة في الحسابات حتى يتفوق على الشخص ويرتقي أكثر منه أو تكون له فرصة في شركة أخرى، رغم أن الأمر كله كان إجبارا واختيارا لا يتناسب مع الشخص من البداية.

مثال آخر بنت دخلت كلية الآداب و درست الجغرافيا رغم أنها لا تحبها ولا يوجد حد أدنى للمشاعر الإيجابية بينها وبين ما تعمل، كل ذلك حتى تحصل

علي وظيفة و تجد أنه من الصعب الحصول على وظيفة فتبدأ في الحصول على الماجستير والدكتوراه حتى تجد وظيفة.

وتنتقل لمربع التغيير الناتج عن الضغط على المشاعرو النفس؛ لأن دا الأفضل من وجهة نظرهم أو تحت زعم إنه مش معقولة أهدرسنوات الدراسة الأربعة و أبدأ من جديد ثاني، و هو العمر فيه كام سنة عشان ابدأ من جديد، و يبدأ يوصل لمنطقة الراحة الجديدة و يحافظ عليها، و يحدث زلزال التغيير وهكذا. السيناريو الثالث: إن ممكن لما يدخل المنطقة الضبابية، يبدأ يشعر بالوعي و يمشي في طريق الوعي بالنفس و يبحث عن نفسه و عن شغفه و منطقة قوته و تميزه الخاصة به و عمًا يحبه و يكرهه، و ينتقل لمنطقة الشكل رقم (٢) بدل ما يكمل دوران في شكل رقم (٣).

إذن الشكل رقم ٣، يدل علي أن الشخص عايش في عالم ناس غير نفسه و غير مناسب لنفسه و يكون القرار يا إما انه هيفضل يلف في نفس اللفة مع اختلاف ما يريد فيه حتى يمشي تبعًا لنظام وضعه أشخاص آخريين، يا إما يقرر أنه ينتقل للشكل رقم (٢) و يبحث عن نفسه و عمًا يميزه و يضع نظام خاص به.

فيما يلي نقدم شرحًا لكل منطقة بشكل أكثر تفصيلًا مع الأمثلة المناسبة للأمر.

## المنطقة الأولى

### Comfort Zone/My Special Zone / Someone Else Zone/ Known Zone

ممکن تكون عایش فی منطقتک وبتحہا أو فی منطقة شخص آخر عشان المال أو قيود الآباء و الأمهات و المجتمع و هكذا، و فی النهاية المنطقة معروفة بالنسبة لك، تعلم الطرق فيها و تفہمها بشكل كبير، أنت خبير فی كيفية التعامل مع المنطقة و تعيش فيها منذ فترة، و خبير فی الحصول على مكاسب منها سواء مالية أو غير مالية،

(My special Zone/ Someone else zone / Known Zone/comfort zone)، المنطقة دي تحديدا تعني المنطقة المعروفة، منطقة الأمان؛ يمكن لأنها معروفة للكل، كل واحد عارف هو عایش فين دلوقتي. يعني لو أنت مهندس، فأنت بتشتغل حاليا فی الهندسة، لو دكتور كذلك، لو محاسب أيضًا و هكذا و عارف المنطقة و تقريبا بتحصل على منافع مالية أو غيرها من هذه المنطقة.

يمكن لأنها تعبر عن طريقك بشكل جيد بعد ما وصلت له و أتقنته، و بالنسبة لك أغلب طرق العيشة و الحياة فی المنطقة تكون معروفة، مين الناس المفيدة لك فيها؟، ما هي طرق العمل فيها؟، طرق الكسب منها أصبحت معروفة ليك أو لغيرك من كثرة ما قمت بممارستها، و ارد تكون المنطقة دي منطقتك بعد ما أتقنت شغفك و عرفت شغفك أو أحد أنواع شغفك و عملت فيه و قدرت تتقنه و تحوله لمنطقة لكسب معيشتك و حياتك، و وصلت لمراحل إتقان و خبرة عالية فيها، و و ارد تكون دي تكون منطقة غيرك أو دائرة غيرك و انت عایش فيها باختيارك أو بغير رغبتك، بناء على رغبة حد غيرك، فی النهاية أنت فی هذه المنطقة خبير فيها و عرفت طرق العيشة و الكسب منها.

عيوب هذه المنطقة: إنك ممكن تنخدع فيها، وتفضل مكانك لمجرد شعورك إنك وصلت (دي في حالة إنك عشت بشغفك و عرفت معنى لحياتك في هذه المرحلة العمرية من عمرك)، و ممكن تعيش فيه خوفا من فكرة التغيير بمصاحبة الجملة الشهيرة: "بعد السن دا ممكن أبدأ من جديد؟" أو تكون شايف إنك وصلت للقمة في المجال ولم يعد هناك أي قمم مميزة أخرى لكي تتسلق وتتطور.

زي مثلا أنت دكتور، ودخلت الطب عشان مجموعك و حرام يضيع، أو عشان دي رغبة الأهل، أو أن الأب دكتور كبير و هيسيب دا كله لمين؟ أو يمكن لأنها منطقة معروفة مش هتتعب فيها كثير، و كمان بتجيب فلوس، ومن الآخر مريحة، أيًا كان السبب، كلنا لينا أسبابنا الخاصة. تفتكر المنطقة الحالية هي منطقة شغفك؟

---

تفتكر أنت عايش في منطقة حد ثاني؟

---

أمثلة لكل حالة من الحالات التي تم تقديمها في الشرح، عشان الأمر يتضح أكثر بشكل مرتب:

١. انت عايش في دائرة غيرك: يعني عايش في مكان يخص حد ثاني سواء برغبتك أو عن طريق الإجبار الخارجي، أمثلة لكدا:

- لو كان قرارك: وانت صغير كنت بتشوف أفلام على التلفزيون، و في الأفلام دي كل أصحاب الشركات الكبيرة كان أصلهم مهندسين، حدث رابط داخلي عندك، إنك عشان يبقى عندك شركة كبيرة لازم تكون مهندس، فقررت إنك تكبر وتدخل كلية الهندسة، ولما دخلتها حسيت

بصعوبة وانت مش حابب الاختيار، لكن انت بتعافر برغبتك عشان عايز توصل إن يكون عندك شركات، و بعد فترة من الزمن تكتشف أنك كنت عايز تدخل الهندسة مش عشان دراسة الهندسة نفسها، أنت عايز تدخلها عشان عندك رغبة في تعلم الإدارة مثلا (في هذه اللحظة يحدث زلزال التغيير؛ لأنك اكتشفت ليه كنت بتعافر عشان تدخل كلية الهندسة وإن مكنش لازم تعمل كل دا عشان تتعلم الإدارة فيه طرق أسهل بكثير من كدا).

● لو كان غصب عنك: مثال، ممكن يكون والدك أو والدتك دخلوك كلية الطب، عشان ابن عمهم اللي اشتغل في مستشفى استثماري كبيرة، وعنده فلوس كثير، ودخلوك غصب عنك وانت مش حابب كدا، أنت لم تفشل في الطب، أنت نجحت لكن مش النجاح و التميز اللي أنت بتحبهم و الخاصين بك ومش شايف نفسك فهم، كدا انت بتلعب في دائرة وحلم غيرك غصب عنك، و مع الوقت (ستظل تشعر بالحنين لطريق آخر حتى لو كنت لا تعرفه، حتى يحدث ما يضغط عليك داخليا، و أن هذا المكان ليس مكانك، و عليك أن تبحث عن مكان تميزك الخاص)، حاجة أشبه بالنداء الداخلي.

٢. انت عايش في دائرتك وحلمك: طبعا دا شيء مفهوم جداً، وارد وانت صغير كان حلمك الفعلي وشغفك و أنت عايش فهم فعلا لما كبرت و حققته.

● مثال: أنت كان نفسك تكون دكتور، ولما كبرت مارست المهنة عن حب و أتقنت فيها وبتعافر بقوة الشغف ومستمر لحد ما وصلت لدرجة خبير، ودرجة متقدمة في حلمك وشغفك وعملك كأنك تستمتع بقوة

يبقى وارد الدائرة دي تكون دائرة شغفك بعد ما وصلت لدرجة الإحسان والإتقان فيها، ووارد تكون دائرة غيرك اللي عايز تعيش فيها باختيارك أو غصب عنك بقرار من حد يمتلك قوة القرار بالنيابة عنك، ووصلت لدرجة من الخبرة والإتقان فيها تجعلك متعايشًا معها.



## المنطقة الثانية

### Transition Zone/ Unknown Zone/ Fogy Zone

المنطقة دي منطقة ضبابية جداً، منطقة انتقالية، هذه المنطقة مشتركة بين الشكل رقم ( ٢ ) و الشكل رقم (٣): لأن سواء كنت بتبحث عن شغفك وعن هدفك في الحياة فعندك صراعات داخلية و خارجية، و إذا كنت بتعيش في مجال بتحبه أو عالم لا يخصك من الأساس، فأنت عندك صراعات داخلية و خارجية مع اختلاف نسب هذه الصراعات و نسبة ظهورها أو سماحك لها أن تظهر أو لا، و طرق معالجتها و التخفيف منها، و أيضا هيئة ظهورها عندك، محتاج في هذه المنطقة أن تمشي فيها الخطوة بخطوتها، و شرح المنطقة دي يظهر في الحالات التالية:

- ١- الحالة الأولى: هي إنك مش عايش في حلمك، أو مش في دائرتك؛ سواء برغبتك أو بالإجبار، زي ما تم شرحه في المنطقة الأولى، انت في الدائرة دي بتبدأ في البحث عن حلمك أو شغفك اللي بتحلم تعيش فيه، أكيد هتكون منطقة مش معروف ملامحها قوي ليك؛ لأنك لو عارف الملامح كنت هتروح وتعيش في شغفك أو حلمك أو المنطقة اللي أنت مميز فيها.
- ٢- الحالة الثانية: لو انت عايش حلمك وشغفك تلاقيك عايش في حالة استمرارية من البحث عن التطور وعن الأفضل، ثقتك إن فيه الأفضل ف اللي انت بتعمله بتخليك تفكر، وتفضل في حالة بحث للتطور، ودي مش مُريحة للناس الأكثر خبرة، واللي عايشة في المنطقة المعروفة و مش عايزة تخرج منها مطلقا، و بتحارب كل شخص يبدأ في محاولة التغيير و التطوير، على سبيل المثال: زي ما بيحصل في حالة دكتور جديد في مجال

القلب، ويبدأ يعمل أبحاث، يبدأ في البحث عن تطوير و تغيير في مجاله،  
ويطرح أطروحات يبدأ الشغل عليها، ويلقي إن مش كل أفكاره مُرحب بها  
من الدكاترة الكبار والخبراء في المجال، وهكذا صراع أجيال في عمله أو في  
المجال اللي بيحبه بين الخبرة وكثرة المعلومات مع صغر السن، وصراعات  
كثير حتى تثبت إنك جدير بهذا الأمر. يعني ممكن تكون المنطقة دي  
منطقة صراع لو كنت خبير في المجال وظهر حاجات جديدة من ناس  
صغيرة في السن تشعر بالرفض تجاه الأمر (حاجة زي صراع الأجيال؛ لكن  
دا صراع لأن الجديد بهدم معتقداتك القديمة)، و ممكن أنت اللي تكون  
بتحاول تتطور و تغير.

٣- الحالة الثالثة: إنك عايش في حلم حد آخر، و بتحاول تسلك الطريق  
الخاص بهذا الشخص كما فعل هو، مثال لو أنت مهندس و دخلت كلية  
الهندسة بغير رغبتك، فأنت بتدخل منطقة انتقالية تحاول إجبار نفسك  
علي تقبلها و العيش فيه و التعايش معها.

طريقة ظهور هذا المنطقة بتكون من خلال:

- اكتشفت أنك مش عايش حاجة بتحبها ( ودا ممكن يحصل في أحد  
الحالات التالية زي أزمة منتصف العمر، استريحت ماديا، و أصبحت  
السعادة عندك غير مرتبطة بزيادة المال، و بدأت تسأل هو أنا جاي هنا  
ليه في الدنيا؟ أو الشعور بعدم الراحة فيما تعمل لأنك مجبور عليه، أو  
حالة غير معلومة أو مفهومة سببها أشبه "بالنداء الداخلي"... إلخ)
- حد هدد منطقة الراحة بعد ما كنت مفكر إنك هتفضل فيها لأطول فترة  
ممكنة (أمثلة لكدا، اشتغلت في شركة و استقريت فيها و تم الاستغناء عن  
خدماتك، كنت لاعب مميز و حصل إصابة ما وأجبرتك انك تعزل للعبة

اللي بتحياها، أو كنت مفكر أنك هتستمر أكثر من أي حد في مجالك، و حدث شيء قالك "يجب عليك التوقف الآن"، كنت دكتور جراحة شاطر، وحصل ليك مرض أو تعب جعلك تتوقف،... إلخ)

- التغيير الإجباري في الحياة، أحيانًا التغيير لا يكون لمجرد أننا نبحت عنه، و لكن لأنه ملزم و ضروري و إجباري، الشخص أحيانًا بينسى ذلك، و يعتقد الواحد منا أنه هيظل في نفس الوضع لفترات أطول من باقي الناس (من أشهر اللقطات لذلك، هو الانتقال لمرحلة عمرية و تسميتك بطنط و عمو، مما يجعلك تشعر أنك تريد أن تتأكد هل ما تقوم به يصلح لهذا الزمن، أو عليك الانتقال و التحديث و تُقبل الاختلاف و التغيير، و من أمثلة ذلك أيضًا، لاعب كرة القدم لا بد أن يعتزل عند عمر معين، مهما قاوم هذا الوقت و استمر فيه، لا بد أن يعتزل، الانتهاء من الدراسة، تعتبر من أشهر الأمثلة أيضًا، مثل الانتهاء من الدراسة الجامعية أو الانتقال للدراسة الجامعية).

- تغيير معتقدات داخلية في عقل الشخص، و دا يستلزم تغيير في وعي و نضج الشخص نفسه، بيتعرض له.
- وجود صراعات بين القيم و المبادئ و المعتقدات و الحياة و العمل و كل ما يمارسه الإنسان داخل الإنسان نفسه.
- حالات مختلفة ناتج الفقد أو الحوادث، أو غير مفهومة ناتجة عن كلمة أو حديث مع شخص أشعل فتيل التغيير.

## المنطقة الثالثة

### May be high Riziq Zone / Change Zone

المتعارف عليه أن هذه المنطقة هي منطقة وصول لشكل ما من خلال الاستقرار الجزئي لما نفعل، الضباب أقل ما يكون، و نصل بعد هذه المرحلة، لمرحلة Comfort Zone، من وجهة نظري، المكان دا بتوصل ليه وتعيش فيه فترة من الزمن سواء كانت طويلة أو قصيرة؛ لأنه منطقة ما بعد التغيير، وتعيش فيها فترة ناتج تعبك؛ إما في مرحلة بحثك عن نفسك وإما في مرحلة تطويرك لنفسك؛ أو لأنك بدأت تعرف وتعتاد الطرق وأتقنها في اتباعك للنظام السائد. نقدر نقول أن المنطقة دي وصلت لها عشان هي شغفك ولقيته، و بدأت ممارسته وعرفت طرق الكسب من خلاله.

أو وصلت لهذه المنطقة عشان أنت بقيت عارف الطرق الخاصة بالعيش في شغف حد ثاني، و حققت فيها فوائد زي وجود الفلوس اللي تسد فواتيرك و الكماليات التي تطمح لها، و جعلت من الحياة استقرار يجعلك تعيش علي الحافّة، و ستجد نفسك دائما على الحافّة، لا أنت سقطت من على الحافّة، و لا أنت استفدت من وجودك على الحافّة (أحيانا هذه المنطقة تكون أشبه بالرقص على السلالم بطريقة مريحة ولكنك لم تصل لمستوي الاحتراف و لا تريد الخروج منها...إلخ).

مميزات هذه المنطقة إنك فيها بتعيش طريقك وبتعرفه وبتتميز فيه، و ممكن تبدع فيه، و لأنها منطقة تغيير فسوف تنقلك لمنطقة الراحة الخاصة بك عن طريق كثرة التكرار و اكتساب الخبرات.

في حالة إنك كنت عايش في منطقة حد ثاني، بتكون عرفت كل الطرق التي تجعلك تكسب وتعيش على الحافّة، و استفادتك من الأمر بطريقة مرضية لك

رغم أنها أقل من قدراتك؛ لأنك لا تقف لتسأل هل أنا هنا لأن هذا ما أريد؟ و هذا يُعتبر من عيوب المنطقة.

كنت سمعت من دكتور عمرو الفص، high risk is leading to High riziq، أعلى مخاطرة هتاخذها تعطيك أعلى رزق بفضل الله؛ لأنك حاولت و تعبت و اشتغلت و اجتهدت، وتحولت حياتك للعيشة في شيء بتحبه، طيب كل ما كنت قريب من شيء بتحبه، نحسب أنك هتفضل تشكر ربنا إنه أتاك من فضله الواسع، وإنك اشتغلت في اللي بتحبه، طيب لو حصلك أزمة هتحاول تبني من الأول و جديد في شيء بتحبه؛ لأنك مررت بتجربة التغيير و تعلمت منها.

التكرار للمحاولات و إعادة العمل باستمرار و تحسين و تطويرك لطريقك حتى تصل لشكل يناسبك و يناسب شخصيتك، هيخليك تنتقل للمنطقة الأولى اللي هي " المنطقة المعروفة - Known Zone "

زي الطفل الصغير لما يبجي يتعلم المشي، هو الأول كان بيزحف، في بداية تعلم ابنك الزحف كانت منطقة تغيير "Change Zone" اللي ابنك اتعود عليها، واللي أعطته رزقًا و مكسبًا ما، بالنسبة لهذه المرحلة؛ لأنه قدر أنه يلعب و يستكشف اللي قدر يوصله و هو بيزحف، لكن ميتفعش يستمر فيها كثير رغم أنه أتقنها و بقت بالنسبة له منطقة معروفة " Known Zone"، لازم يتعلم المشي و دا معناه التغيير و انتقاله لمنطقة المجهول "Risky Zone" اللي من خلالها بيتعلم المشي بالنسبة له، و لما بيتعلم المشي مع كل مرة بيقع و يتخبط و يقابل مصاعب و أنت بتقلق عليه و رغم كدا، أحيانًا تبتمس أنت كأبوه أو أمه أو أخواته و تقوله حاول و تشجعه، شاطر، تشجيعك له بيخليه يتعلم المشي و هو مستمتع؛ لأنه إنجاز، و لأنك كنت مستمتع مع ابنك ما أخذتش بالك إنه أتعلم المشي عن طريق إنه شافك و أنت بتمشي و كمان كنت بتشجعه (خلي بالك أن الزحف و المشي هو عبارة عن انتقال من حالة أن شخص عنده عدم

حركة بشكل كامل "باعتذر في اللفظ جدًا - الحالة أشبه بالشلل الكامل لشخص-" لكي ينتقل لشخص قادر علي الحركة بشكل كامل، مع الأخذ في الاعتبار أن الطفل دا بالنسبة له أول مرة يمارس المشي، فتخيل كم المجهود المبذول عشان يعرف يلف يمين أو شمال مثلا، و عشان يقدر يتقن حركة الدوران وهو بيمشي.

ملحوظة علي جنب: أراهن أنك مركزتش على الناس و هي بتجري، الناس بتعلم المشي و تركز في منطقة الراحة؛ لأن غالبا معندهاش شيء بيحصل يستدعي إتقان الجري، مما يجعلنا ننسق بين أعضاء جسمنا وأحنا بنجري، أو حتى و أحنا بنمشي، حاول تتأمل الناس و هي بتجري، هتلاقي طريقة الجري طفولية جدًا في بعض الأحيان (أغلب الوقت)، هتشوف الشخص (سواء كان راجل أو ست) عمرهم الزمني ٥٠ سنة مثلا، و بيجري بطريقة طفل عنده ٧ سنوات، "فقط تأمل"، عشان تعرف إن الشيء لو أصابه تغيير وتهديد لمنطقة الأمان، الشيء بيتغير، لكن لو دا محصلش هيفضل رغم إنه كبير في السن عند آخر مستوى مارسه الشخص بالفعل، أنا مش بتكلم عن الأشخاص الأوليمبية أو اللي بتمارس الجري باستمرار.

مرحلة Known Zone، هل عشت في هذه المرحلة من قبل؟

---

مرحلة Unknown Zone، هل عشت في هذه المرحلة من قبل؟

---

مرحلة Change Zone، هل عشت في هذه المرحلة من قبل؟

---

انت ف أي مرحلة دلوقتي؟؟؟

---

أحيانا نحتاج لنصائح حتى نتخطى هذه المراحل بشكل سهل وسلس:  
**نقطة نظام:** مش معنى وجود نصائح أو تجارب من الآخرين إنها تقلل مدة وجودك في هذه الدوائر، وجودك واستمرارك فيها أو عدم استمرارك، "طول مدة وجودك أو قصرها"، دا شيء راجع لقرارك أنت، و هل قمت باتخاذ خطوات تساعدك علي الخروج أولاً؟.  
يمكن النصائح فقط تكون موجودة عشان تساعدك على الدوران في هذه الدوائر بشكل سلس وفهم ما ستمربه.

- بحثك عن شغفك، حتى لو كان فيه مليون مدرب يساعدوك، بدون ما تقعد وتواجه نفسك، و تحاول تبذل مجهود، مش مفيد، من الآخر أقعد وواجه نفسك و حاول باستمرار عشان توصل.
- دور على حد يرشدك ف الطريق؛ عشان هو على الأقل هيكون سابقك بخطوة أو اثنين، ويمكن ١٠ خطوات فيعمل حاجة معاك اسمها shortcut way يعني يعطيك المختصر من خبرته و يساعدك بخطوات عملية و يكون أفضل لو مختص عشان خطواته تكون عملية قابلة للتنفيذ، كأنك مطلع أيقونة برنامج على سطح مكتب

الكمبيوتر بتسهل لك دخول البرنامج؛ مش بتقعد تبحث عنه في كل مكان في البرامج جوا الجهاز نفسه.

- أي نصيحة تاخدها لا تطبقها بشكل أعمى، فكر في مدى كونها مناسبة ليك و لطريقك و شخصيتك، وطور فيها بدمجها مع ما تعلم و ما تعلمته من خبرات الآخرين، اكتب مميزات وعيوب وتبعات التطبيق، لا تهمل أي نصيحة في نفس الوقت، حاول تعملك طريق خاص بك من خلال نصائح الناس السابقين في الأمر.

- محتاج إنك تفكر بشكل إيجابي لو مشيت ورا طريق، وطلع مينفعش أو طلع مش ممهد، هذا الأمر تحصل منه علي خبرة قوية وتغيير، وهتستفيد جداً، لا تغضب لو حدث ذلك، بالمناسبة: لو مشيت في طريق وطلع غلط، في المختبرات العلمية والأبحاث بيعتبروا دا نجاح، لكن له شكل مختلف؛ لأنك مادام عرفت أن الطريق دا غلط، يبقى أنت مش هتجربه تاني و بكدا اختصرت واستفدت بتجربة جديدة.

- لازم تقعد وتعرف بعض المعاني و التعريفات لهذه المصطلحات بالنسبة ليك، زي الفشل و النجاح، و العجز و الشغف و المشاعر، و ما إلى ذلك.

- حاولت تكتب الإجابات عن الأسئلة التالية، إمتى تكرر التجربة؟ و إمتى هتغير طريقك؟ أهم العقبات اللي غيرك قابلهما في الطريق عشان تكون مستعد؟.

- عمرك ما هتعرف إذا كنت عايش في شغفك أو في رحلة حد تاني غير لما تقف و تسأل و تحاسب و تراجع نفسك، حاول تعمل كدا بشكل دوري.



- غالبا الناس بتعيش في تجارب ناس أخرى بلا وعي؛ لأن النجاح يبهرها، وأيضا قوة شغف الشخص الآخر تجذبها، يعني لو شافوا مدرب تنمية ذاتية ناجح، كل الناس عايزة تكون زيه، لو طلع كوتش في البيزنس ناجح، كل الناس عايزة تعمل زيه، تمهل و اختبر الطريق خليك واعى. دكتور عمرو الفص كان بيستعين بجملة الراحل توفيق الدقن "لما كل الناس هتكون فتوات، أُمّال مين اللي هينضرب"، و دا معناه إنك متنهersh بقوة شغف حد، حاول تفصل انهيارك بالشخص و تلاقي طريقك بحيادية
- لو طلعت عايش في شغف و الرحلة مش بتاعتك (عادي.. دا ممكن يحصل)، قف و حاول أن تبدأ طريقك أنت، أنت أولى الناس بمعرفة و احترام رغباتك و قدراتك، و أنك ترسم طريقك الخاص.
- دور على حد مر بنفس التجربة اللي أنت عايز تمر بها، وافهم منه إيه العقبات، إيه مميزات التجربة و إيه هي عيوبها، مثلا لو انت مهندس ودخلت الهندسة عشان عايز تبقى رسام شوف حد مر بتجربة الانتقال من الهندسة للرسم، وافهم منه انتقل ازاى، لو انت دخلت آداب و كان حلم حياتك تدخل طب، شوف حد مر بنفس التجربة و حاول تفهم الصعوبات والأفراح والأحزان وكل شيء عن رحلته، و ادمج ما تراه في صالحك من نصائحه مع ما في رحلتك.
- لو ملاقتش حد مر بنفس التجربة، اتعلم قاعدة مهمة اسأل و ابحث و دور على جوجل و في كل مكان ممكن يعطيك طريق توصل للإجابات. بالمناسبة أتعلم تطرح السؤال الصح عشان تاخذ الإجابة المناسبة (تعلم "كيف تسأل"، لأنها مهارة مكتسبة بالمناسبة)

- مهم جدا تفهم المشاعر التي هتقابلك في حياتك، كمان مراحل التغيير مهمة؛ لأن غالبا بنقاوم التغيير في البداية وبيحدث احتكاك كبير جداً، و نستمر كذلك لفترة و ننتقل لمراحل التقبل و الفهم و العمل و الاستمرار و مراحل متعددة، فهمك لنفسك و لمشاعرك و عواطفك هيفرق كثير.

كدا عرفنا نحدد دوائر الطريق و كمان إيه اللي هنمر به خلال الرحلة الخاصة بينا في الحياة سواء كنا عايشين في شغفنا أو كنا عايشين في شغف حد غيرنا، كده عرفنا احنا فين، أقعد مع نفسك و افهمها و افهم طريقك.

## نقاط تساعدك على رحلة الشغف وتغيير درجة الوعي بداخلك

## الإجابة النموذجية والقرار الصحيح

مفيش شيء في الحياة الحقيقية اسمه إجابته نموذجية أو مثال محلول، فيه شرح فقط لطريق أو طريقة ما، و توضيح لأهم المعالم الخاصة بالطريق، يمكن اللي اخترع الإجابة النموذجية و المثال المحلول كان شخص نيته حسنة، إنه يشرح لنا طريق معين أو مثال معين عشان نفهم منه الطريقة أو كيف يتم فعل ذلك، لكن الناس أخذته شيء مُسلم به، و أساسي، لدرجة أن فيه ناس أعرفهم كتير (يمكن أنت كقارئ و أنا ككاتبة كدا)، مستحيل يصدقوا إن المثال المحلول و الإجابة النموذجية ممكن يطلعوا غلط.

كل سؤال أو تدريب هتلاقيه في الكتاب، أكتب حله بجدية، و حاول مهما اعتقدت جوا نفسك إن إجاباتك ممكن تكون غلط، أو أن فيه إجابة محددة الكاتبة عايزاها، (الكاتبة تُريد منك أن تكون علي طبيعتك و تكتب ما بداخلك)، حاول أنت و فكر بعقلك أنت، اكتب اللي انت شايفه. متوقفش عقلك عشان شخص، و لا عشان حل نموذجي، و لا عشان إجابة صحيحة نهائية؛ لأنهم أشياء مش موجودة أصلا، عقلك ربنا خلقه عشان يفكر، و يحاول، و يفهم، و يفلتر الصح من الغلط، و يفضل يحاول مهما حصل طبقا لشخصيتك و حياتك و ظروفك و العالم الخاص بك، و طبقا لكل ما مربك. امجي من عقلك شيء اسمه الإجابة النموذجية، مفيش في الحياة و لا الكون كله إجابة نموذجية / أو مثال محلول، لو أراد الله أن يخلق لنا الإجابة النموذجية، لكان التغيير و التطوير و الاختلاف مش من سنن الكون. و لا إيه رأيك؟؟ ( اكتب رأيك )

---

---

---

كل ما عليك هو إنك تحاول تعرف الطريق، وعندك وعى، وإدراك كافي وتحمل للمسئولية كافي عشان تكمل الطريق، والرحلة في الكتاب، والحقيقة مفيش برضو حاجة اسمها إجابة صحيحة ١٠٠%، وإجابة خاطئة ١٠٠%، ولا قرار صائب ١٠٠%، ولا قرار خاطئ ١٠٠%.

نسبة القرارات التي يمكن تصنيفها علي أنها قرارات صحيحة وقرارات خاطئة يمكن لا تتجاوز (١٠%) من حياتنا طبقا لما واجهت في عملي، هناك تصنيف آخر للقرارات، فيه قرار هتقدر تشيل تبعاته وقرار مش هتقدر تشيل تبعاته، لازم تفهم أن لكل شيء تبعات، كل ما عليك إنك تقرر مع نفسك، هقدر أشيل تبعات قراري ولا لأ؟؟!! قررت إنك تدرس كلية وأنت مش بتحبها، قرارك هنا له تبعات، لازم تعرفها وتسأل نفسك هل أنا هقدر أتحمّل تبعات هذا القرار أم لأ؟ كل الناس منتظرة تحصل علي كل المعلومات عشان تقدر تأخذ أصح قرار و تسميه القرار الصحيح، حتى لو كان القرار من وجهة نظرك صحيح ١٠٠%، هيكون له تبعات إيجابية وتبعات سلبية، هل هتقدر تتعايش مع التبعات؟. مفيش معلومات كاملة أبدا، وكل ما هتنتظر عشان تكون عندك كل المعلومات عشان تأخذ قرار، يبقى هتعيش عمرك كله و مش هيكون عندك تحرّك ولا تطوير في حياتك، لكن عليك النظر للقرار علي أنه قرار له تبعات، والسؤال هل أستطيع تحمل تبعات هذا القرار أم لا؟ عمرك ما هتعرف الطريق صح ولا غلط، غير لما تجرب، ولو جربت و طلع القرار صعب و مكنش المفروض تأخذ هذا القرار، هتستفيد، و تتعلم من التجربة، و مش هتمشي فيه تاني، و هتقدر لو ظهر لك العلامات اللي شفتها قبل كده في الطريق، مش هتأخذ الطريق دا و هتبحث عن طريق مختلف، و هتحدد طريقك الجديد وبشكل أوضح. و هتفيد غيرك و مش هيضيعوا وقت من وقتهم. كمان هتقدر تنقل خبراتك لغيرك و تساعد علي تخفيف الطريق.

## غير تفكيرك، تغير حياتك

كان فيه فيديو منتشر علي الواتس و الفيس و كل مكان تقريبا من فترة طويلة، مفاده، أن لو كل الحروف الأبجدية (A to Z) أخذت أرقام مقابله لها، زي  $A=1$  &  $Z=26$ ، و بدأنا كل كلمة نحولها لأرقام، فكلمة Knowledge معرفة مثلا هتاخذ ٩٦%، و كلمة attitude هتكسب و تبقى ١٠٠%.

كلمة attitude ممكن نعرفها علي أنها عبارة عن سلوكك و تفكيرك و معتقدك و توجهاتك ناحية أي موقف، تفكيرك ناحية الأمر واللي منه بننطلق ناحية ليه اتصرفت كدا في الموقف. يعني لو ١٠٠% غيرت سلوكك و تفكيرك و معتقدك ناحية شيء ما، هتقدر تغيير الكثير من حياتك و تقدر تغيير الشيء. ممكن تشوف أكثر عن الفيديو في الرابط دي:

[https://www.youtube.com/watch?v=RrdHkYw\\_7bg](https://www.youtube.com/watch?v=RrdHkYw_7bg)

محتاجين نفهم أن لما مثلا بنفكر في قرار ما تجاه شيء، عقلنا تقريبا بيكون واخذ القرار مسبقا، بناءً علي المخزون السابق من خبراتنا و مشاعرنا و أفكارنا و معتقداتنا و الصور السابقة من الأهل و من حولنا، و ما مرينا فيه من لحظة الولادة و ما مرينا من أحداث سواء كنا و اعيين و مدركين لها أو لا، كل مكونات عقلنا بشكله وقت اتخاذ القرار و لحد ما وصلنا لعمرنا الحالي.

علي سبيل المثال لا الحصر، لو بنت مترددة تشتغل أو لا، و كانت أم البنت و هي صغيرة كانت بتشتغل، و كانت مهمة و قادرة توفق بين البيت و بين الشغل، و بين شغلها و بين تربية هذه البنت، صراع البنت هنا هيكون هل هتنجح زي أمها و لا لأ؟؟ هل فيه لازمة للشغل و لا لأ؟؟ عشان متكونش في مقارنة مع أمها، بس هي داخليا واخدة قرار بالشغل بنسبة كبيرة؛ لأن النموذج اللي شافته في حياتها كان ناجح ( دا الشيء اللي مش واضح لحد، أنها جوا نفسها واخدة

القرار بنسبة كبيرة جداً، لكن مش معطية لنفسها فرصة تركزم مع نفسها) لكن اللي واضح لها وللناس كلها من حوالها أنها مترددة. دا معناه أن العقل تقريبا يكون واخد القرار بنسبة كبيرة، و احنا مش عارفين و الرؤية مش واضحة لينا؛ لذلك أحياناً نحتاج لكوتش ليجعل رؤية القرار واضحة (الكوتش لا يوجهنا لقرار، لكن يجعل الرؤية أوضح، و يجعلنا نتواصل مع أنفسنا بشكل أفضل عن طريق طرح الأسئلة المناسبة، و أيضاً، يساعدنا في متابعة وضع أهداف و طرق تنفيذ لهذه الأهداف).

فيه نقطة كمان، لازم نعرف أن النظرية بتقول "غير فكرة هتغير سلوك"، تغيرك للفكرة عن شيء ما، هيغير طريقة نظرتك و تعاملك مع الشيء و يغير سلوكك ناحيته. رغم أن دا مش سهل بالشكل المكتوب، إلا أنه يستاهل أننا نحاول معه و نقلع فكرتنا القديمة من جذورها، و نزرع فكرة جديدة حتى تصل للعمق جداً و تمد جذورها مكان الفكرة القديمة، و دا حتى نصل لتغيير سلوكياتنا و تغيير حياتنا، قراك النهاردة هو اللي هيغير بكرة بتاعك، الماضي بتاع امبارح وقراراته، هو اللي خلاك وصلت للنهاردة اللي أنت عايش فيه. يبقى عشان نكون متفقيين و نساعد بعض، خلينا لما ناخذ قرار نسأل نفسنا الأول هل فيه قرار أنا بميل له أكثر من الثاني؟؟!!، هي إيه الفكرة اللي مسيطرة عليّ وقت اتخاذ القرار؟؟ و إيه مشاعري/ عواطفي تجاه الأمر؟؟ و ليه بصيت كدا و ليه الزاوية دي تحديد؟؟ و هل فيه زوايا تانية للنظر في الأمر؟؟. افكر موقف كنت متردد بشأنه؟ و ليه أخذت القرار دا، و إيه الفكرة اللي كانت مسيطرة عليك وقت اتخاذ القرار؟؟!!

---

---

## المشاعر والعواطف

دائما بنسمع عن كلمة مشاعر ونسمع كلمة عواطف، لكن هل نعرف أن فيه فرق بينهم؟!، فيه فرق كبير بين المشاعر emotion و العواطف feelings، و دا مهم جدًا لازم نعرفه، فيه كتب أجنبية بتحكي عن الأمر كثير، لكنه مش مجالنا هنا، باختصار شديد، المشاعر بتاعتنا ممكن تكون لحظية و ناتجة عن استثارة حالية زي الغضب و الفرح، يعني مثلا تكون غضبان جدًا فتعاقب حد بيحبك وتجرحه، أو تكون في قمة الفرح اللحظي فتوعد وعد متقدرش تنفذه. العواطف هي الشيء اللي عنده حالة ثبوت لمدة طويلة، وأصل جوا الإنسان، مش متقلب زي المشاعر، زي مثلا عاطفة الأمومة، ممكن الأم تكون غضبانة ومشاعرها نائرة ناحية الابن فتعاقبه، لكن حقيقتها أن عواطفها متجهة ناحيته وبتحبه.

عشان تحس الفرق بينهم بشكل ظريف، لو حد قالك "تعال، و سلم على الحاجة مشاعر!"، ساعة ما تسمع الاسم هتحس أنها حد صغير متقلب المزاج شعنونة شوية، لكن لو حد قالك "تعال، و سلم على الحاجة عواطف!"، ساعة ما تسمع الاسم، هتشعر بالهدوء و الرصانة في صاحبة الاسم. ليه بنتكلم عن المشاعر و العواطف؛ لأنه مينفعش فجأة تقول أنا بحب الشيء دا و هو شغفي غير لما تتأكد و أنت بتمارسه، هل ممارسته ناتج مشاعر و لا ناتج عواطف؟؟، لازم تمارسه بشكل مناسب و أقرب للصحيح عشان تقدر تحكم على الموضوع هل هو ناتج انهيارك بحد و لا دا فعلا شغفك، و لا أنت بتمارسه عشان زهقان من شغفك الحقيقي، وهكذا، لازم نفهم الفرق عشان نعرف نحكم صح على نجاح أو فشل التجربة.



مثال: طالب في ثانوية، جه اختار النشاط الدراسي ( موسيقى، ولا رسم، ولا زراعة) مثلاً، و الطالب دا عنده نباتات مهتم بها، و حياته كلها في حب الزراعة، المهم في المدرسة، قالوا لهم إنهم هيحضروا حصة في كل نشاط على مدار اليوم عشان يشوفوا أنهي نشاط هيشتركوا فيه، المهم راح الزراعة، لقي المدرس بيقول معلومات هو عارف اكرمنها، حس بملل في الوقت!.

راح حصة الرسم، لقي إنه مش بيعرف يرسم و حس أن الموضوع صعب و أن فيه ناس شاطرة في الرسم، وهو مش عارف يرسم أي شيء. لما راح الموسيقى، لقي المدرس نشيط و العزف و الموسيقى لطيفة و شغالة، حس كدا أن الموضوع كيوت، المهم كتب أنه هيشترك في الموسيقى، و بعد ما اشترك بدأ ياخذ السلم الموسيقي والإيقاعات و ما إلى ذلك، اكتشف ان المتعة اللي شافها في البداية كانت مش حقيقية؛ كانت ناتجة عن مشاعر إحساسه بالملل لما دخل حصة الزراعة، و ملقاش معلومة جديدة بالنسبة ليه، و دخل حصة الرسم و معرفش يرسم، و دخل حصة الموسيقى و لقي فرفشة بعد حصص كانت بمقاييسه هو كئيبة، هنا فكرته أن اللي بيحبه و شغفه هو الموسيقى ناتج عن مشاعر، و فكرة إن الزراعة شغفه دي عواطف.

المثال فقط لتوضيح نقطة إزاي إننا ممكن ننخدع من خلال عدم معرفة و فهم المشاعر و العواطف المسيطرة علينا و عدم فهمها بشكل صحيح. عشان كدا فيه بعض الأمور لازم تمارسها بشكل كبير جداً و لمدة كافية، عشان تتحقق إذا كان دا شغفك أو لا؟؟ يبقى الممارسة أساس الأمر، و المحاولة، و أنك تسعى في الطريق للتأكد، محدش هيقدر يتأكد من الشيء إلا لو مارسه فعلاً و مر بتجربة معه.

زرت مرة الدكتورة بتاعتي، و كنت مكتئبة جداً في بداية رحلة الشغف الخاصة بي، و قتلها أنا محتارة أعمل دا و لا أعمل دا، أبدأ هنا و لا أبدأ في النقطة

التانية، قالت لي "محدث هيعرف غير لما يمارس و يخوض التجربة بشكلها الكامل ويفهمها ويعرف معالمها ويكون قادر يستوعبها بكل تفاصيلها".

تظل كل تجربة فريدة بذاتها في مجال بشرتنا، كل شخص مهما حاولنا، سيكون له تجربته الخاصة به، ودي قمة المتعة في عالم البشر، بشرتك سر مهم جداً في الحياة، لا يستطيع أحد أن يتنبأ بنتائج محددة، وهذا من حلاوة ما تقابله في الحياة، عدم القدرة علي التوقع بشكل قطعي يجعلك مطالب بالسعي والتعلم والمحاولة والخطأ والمحاولة مرة أخرى وتقييم المحاولات والخطأ والسعي وهكذا. فهمك ووعيك بسلوكك تجاه الأمور، كمان معرفتك للفرق الكبير بين المشاعر والعواطف وقت حدوثها و بعد حدوثها، حتى لو حصل وتغيروا، ممكن يغير حاجات كثير في حياتك، في لحظة كنت مفكر أنه ممكن مايتغير شيء في عالمك.

تفتكر مرة كانت فيها مشاعرك متحركة فيم تريد؟؟

---

تعليق من الكاتبة: يمكن عشان التجربة البشرية فريدة من نوعها، فكل شخص فينا مطالب إنه يفهم خبرات من قبله أو اللي مر بالتجربة قبل كدا، لكنه في النهاية هو كشخص هيعوض تجربته بشكل كامل، وممكن ياخذ جزء من كل خبرة هو اتعلمها ممن سبقوه ويرسم طريقه بشكل كامل، يعني في النهاية أنت اللي هترسم ملامح الطرق من خلال عقلك وأفكارك ومشاعرك وقيمتك ومعتقداتك ونظرتك للأمر والعديد من الأمور التي تخصك وتخص شخصيتك بالإضافة لخبرات من قبلك اللي تناسبك من أشخاص متعددة عندما تتعلم منهم جميعا. وأيضا تنقل ما تعلمته وتجربتك لغيرك عن وعي وفهم حتى يفهم هو الآخر ويختار ما يناسبه.

## الشغف الرومانسي

من كثر ما الناس شرحت أن الشغف متعلق بالمشاعر، أغلب الناس مفكرة أن الشغف شيء رومانسي وعواطف ومشاعر جياشة، ولو ملقينا ش المشاعر دي يبقى الشغف راح منا.

فكرة المشاعر و العواطف في الشغف هي كأنها فكرة تساعدك علي تليين و تزيت الصواميل الخاصة بالعملية نفسها، زي مثلا السيارة لما بتيجي تشتغل، لازم يكون فيها زيت الموتور و الشحم بين الأجهزة و بعضها، و دا عشان تقدر تتحمل المجهود و الاحتكاك و تستمر في الرحلة رغم صعوبتها.

المشاعر و العواطف وجودها بنسب معقولة و مفهومة تساعدنا علي تحمل ما يحدث و فهمه و حتى القرار هل نكمل الطريق أم لا؟، الحد الزائد على اللازم في المشاعر يجعلنا لا نبذل مجهود عشان احنا عمالين نزيد من المشاعر و نغرق الكون من حوالينا، وأيضا عدم وجود أي نوع من أنواع المشاعر أو العواطف، مش هيكون فيه صبر على الطريق و لا قدرة على المواصلة فيه.

زي مثلا التوبة لله سبحانه و تعالي، الجميع يرى التوبة من باب عاطفي بحت، أن العاطفة هتخليه الشخص التائب يرجعش للذنب و ميحصلش أي انتكاسة زي ما بيطلع ف الأفلام، الحقيقة أن دا مش صحيح، التوبة فيها مشاعر تساعدك على المحاولة للاستمرار فيها، هتفضل بتعافر فيها و تبذل مجهود مستمر و تغلق كل الطرق الممكنة حتى لا ترتكب الذنب مرة أخرى، و ممكن مرة من المرات ترتكب الذنب تاني، فتحاول التوبة تاني و تحاول استعادة الطريق الخاص بالتوبة تاني و تحارب أعداء متعددين مثل الشيطان و هو النفس و ما إلي ذلك، و تنتصر مرة و تخسر مرات حتي تصل للبعد التام عن هذ الذنب، فيظهر ذنب جديد تحاربه و تتوب عنه، و تستمر العملية،

المشاعر هنا ليست جياشة و فياضة ولكن وجودها من خلال الخوف من الله و الرجاء في رحمته- يجعلك تحاول في طريق التوبة؛ لأن المشاعر تُخفف من حدة الأمر و صعوبته.

و كذلك المشاعر و العواطف في عملية الشغف، تكون موجودة للمساعدة في تخفيف حدة الطريق و صعوبته، تساعدك على تقبُّل ما يحدث في الطريق و محاولة الاستمرارية و المثابرة علي الطريق، لكن ما يساعد علي التطوير و الاستمرارية و المثابرة هو العمل المنتظم حتى لو لم يكن هناك رغبة للعمل في هذا الوقت، فلا بد من الإجبار الداخلي لأنفسنا على الاستمرار، و التهذيب النفسي حتى نستمر في الطريق و نبذل المجهود المناسب حتى نسعى و نحصل على نتائج مناسبة.

إذن المشاعر و العواطف موجودة تجاه الشيء أو الشخص أو العملية، لتساعدنا علي تقبُّل مصاعب الطريق و محاولة فهمه، و أحيانًا تزيد و أحيانًا تقل أو تخبو تمامًا، عليك أن تشعلها و تجعلها مستمرة عشان تخفف من حدة الطريق و تجعلك تقبل المصاعب التي عليه.

رأيك في العلاقة بين الشغف و المشاعر و العواطف؟

---

---

---

---

## أُمُورٌ لَا بُدَّ مِنْ تَعْلَمُهَا وَفَهْمُهَا

زي ما مكتوب في العنوان، فيه أمور أو تكنيك لما بنعرفه و نبدأ نستخدمه، بيفرق معنانا جدًّا في طريق الشغف، ممكن نكون بنستخدمه أو بنعمل الأمور دي واحنا محرجين منها جدًّا عشان الناس هتقول كلام يجرحنا، في السطور اللي جاية هنوضح النقاط دي.

### Just Ask

الكلمات دي معناها باختصار اسأل، قاعدة (Just Ask) دي قالها ستيفن جوبز في أحد تسجيلاته، بالمناسبة قبل ما يقولها ستيفن جوبز، ذكرها الرسول(صلى الله عليه وسلم) قبل 1440 سنة في حديثه الكريم،

رَوَى أَبُو دَاوُدَ فِي سُنَنِهِ مِنْ حَدِيثِ جَابِرِ بْنِ عَبْدِ اللَّهِ قَالَ: «خَرَجْنَا فِي سَفَرٍ فَأَصَابَ رَجُلًا مِنَّا حَجَرٌ، فَشَجَّهُ فِي رَأْسِهِ، ثُمَّ اخْتَلَمَ، فَسَأَلَ أَصْحَابَهُ فَقَالَ: هَلْ تَجِدُونَ لِي رُخْصَةً فِي التَّيَمُّمِ؟ قَالُوا: مَا نَجِدُ لَكَ رُخْصَةً، وَأَنْتَ تَقْدِرُ عَلَى الْمَاءِ، فَاغْتَسَلْ، فَمَاتَ، فَلَمَّا قَدِمْنَا عَلَى رَسُولِ اللَّهِ أُخْبِرَ بِذَلِكَ، فَقَالَ: قَتَلُوهُ قَتَلَهُمُ اللَّهُ أَلَا سَأَلُوا إِذَا لَمْ يَعْلَمُوا؟ فَإِنَّمَا شَفَاءُ الْعِيِّ السُّؤَالُ إِنَّمَا كَانَ يَكْفِيهِ أَنْ يَتَيَمَّمَ وَيَغْصِرَ- أَوْ يَغْصِبَ- عَلَى جُرْحِهِ خِرْقَةً ثُمَّ يَمْسَحُ عَلَيْهَا، وَيَغْسِلُ سَائِرَ جَسَدِهِ.» فَأَخْبَرَ أَنَّ الْجَهْلَ دَاءٌ، وَأَنَّ شِفَاءَهُ السُّؤَالُ.

بنخاف نسأل عشان بنقول في نفسنا حد هيقول على السؤال تافه أو يمكن عيب نسأل عشان محدش يألش علينا، أو عشان محدش يقول إزاي شخص كبير كذا ومش عارف إجابة السؤال، الحقيقة مفيش سؤال تافه وسؤال مش تافه، لكن فيه أنواع أخرى من السؤال زي:

**Empower question & Dis-empower question**

## Empower question

سؤال محفز يجعل الأمور تختلف، سواء أمكننا الإجابة عليه أو لم يمكننا الإجابة عليه، لأنه سيساعدنا نلاقي حلول أو نشوف الأمور بشكل مختلف، و ممكن يغير وعينا تجاه الأمور ويحفز دماغنا للبحث المستمر عن الإجابة

## Dis-empower question

سؤال غير محفز ولا يضيف شيئاً أو يساعدنا علي تغيير رؤيتنا، سواء أمكننا الإجابة عليه أو لم يُمكننا الإجابة عنه؛ لأنه لا يغير من الأمر شيئاً، ويمكن لهذا السؤال أن يزيد الأمر تعقيدا.

و دا بيخلينا نعرف أن الزمن اللي جاي مش ه يكون مين الشاطر اللي عنده معلومات أكثر من الآخر؛ لأن المعلومات متوفرة علي النت بكثرة غير متوقعة، و لا حتى مين ه يكون المدير الشاطر اللي عارف أكثر من الموظفين اللي تحت ايده، لكن مين الشاطر اللي عنده القدرة علي طرح Empower questions أسئلة محفزة و يقدر يستخدم أدوات الاستفسار ببراعة فيحفز أذهان الأشخاص حتى يقودهم لإيجاد الحلول ومعرفة الأسباب، والوصول للأهداف.

من خلال كذا بنعرف أن العالم اللي احنا عايشين فيه، ناتج عن شغل ناس سبقونا، و لم يكونوا مميزين عنا غير بأنهم حاولوا و أطلقوا قدراتهم الإبداعية ضمن نفس القوانين والحدود اللي خلقها الله في الكون، لكن نحن أخفينا قدراتنا خوفا من الحسد أو من الألش أو عدم ثقة في أهميتنا أو قدراتنا.

خافين نسأل الناس مرة و اتنين و ثلاثة، و نقول في أنفسنا: يمكن ميردش علينا! ويمكن يحرجننا!، السؤال هنا: هل ايدك هتبتتر أو عقلك ه يخف و تبقى مجنون لو حد قالك آسف مش فاضي لك؟؟ هل حياتك هتدمر لو حد رفض يساعدك ف حاجة؟؟ مش هتخسر كتير لو الرد كان سلبي، لكن الخسارة

هتكون أكبر لو كان الرد ممكن يكون إيجابي والشخص ممكن يرد عليك وأنت محاولتش تسأله.

إحنا اللي بنفرض أن الرد هيبكون سلبي قبل ما نسأل حتى، طيب ليه تفرض شيء أنت متعرفوش بدون ما تحاول، مش ممكن الشخص يرد عليك وتكسب من خبرته وتبقوا أصحاب وتتعلم منه؟؟؟.

على الأقل لازم تسأل عدة أشخاص، مش تقول أنا سألت فلان و مردش عليّ يبقى خلاص، على الأقل لازم تحاول تبحث عن ٢٠ شخص تسأله في الموضوع اللي عايز تعرف عنه.

إيه السؤال اللي لو سألته ممكن يغير تفكيرك أو حياتك أو ينقلك خطوة جديدة في الشغف الخاص بك؟

---

---

## Just Google it/ Search for it

البحث في الإنترنت مهارة مهمة جدًا Just Google it/ Search for it، المهارة دي لا بد يكون عندك الحد الأدنى منها علي الأقل، يعني مش أي حد يقول كلمة تجري تصدقها، تقدر تعمل سيرش أو بحث ببساطة، عايز تعرف معلومة بكل سهولة، شغلك واقف، تقدر تدور علي قصص نجاح مماثلة، الأمر أسهل مما يمكن.

ليه تعطل دنيتك، و أنت واقف و كمان الإنترنت بقى موجود في كل بيت، فتقدر بكل سهولة تعمل بحث و تلاقي إجابات سؤالك، ليه تفضل واقف منتظر تلاقي كيس ملح عشان تأكل، و أنت ببساطة ممكن تأكل مخلل جنب الأكل غير المملح، و تلاقي حلول متعددة للموقف. المعلومة مصداقيتها شيء مهم، الكورس و تعليمك و تطويرك شيء مهمك، و الموضوع بسيط جدًا لو اتبعت، Just Google it ( search)

إيه الحاجة اللي ممكن تساعدك في شغفك و محتاج تبحث عنها؟

---

## ظهور الخطوة الثانية

الحياة في المجمال، هي عبارة عن أن طريقك مليان ضباب، عمرك ما هتقدر تشوف المتر اللي قدامك غير لما تقطع المتر اللي قبله، عمرك ما هتعرف الخطوة اللي جاية غير لما تمشي الخطوة الحالية، من قوانين الله في الكون إنك لما تمشي الطريق يبدأ يظهر لك واحدة واحدة، سؤال طيب ليه؟؟ لأن دي مكافأة للشخص اللي تعب في السعي، اللي تعب و اجتهد بيظهر له الطريق، و المستريح



على الكرسي بدون ما يعمل شيء استحالة يعرفه، وإلا كنت لاقيت ناس وهي قاعدة علي الكنبه بتحقق نجاح بدون ما تبذل مجهود يُذكر أو تسعى للنجاح. لا يستوي أبدا من يجتهد حتى يعرف شغفه ويحوله لشغل يفيد به الناس و يستمتع به ويفيد به نفسه، مع من يجلس بالساعات في انتظار الفرج لذلك، أو عايش بيفكر بس بدون ما ينفذ، صعب إنك تعرف الخطوة الجاية غير لما تمشي الخطوة الحالية، توكل على الله و امشي. امشي و ابدأ الطريق بالسعي، ربنا هيحاسبك علي السعي وليس علي النتيجة، ربنا في الآخرة يحاسبنا على أننا حاولنا وأخذنا بالأسباب و توكلنا عليه و حاولنا نسعى، ربنا بفضله لن يحاسبنا علي النتيجة النهائية وإلا كنا من الخاسرين. تفكر إيه الخطوة الثانية الي أنت عايز تعرفها؟

---

---

تفكر لو كان ربنا بيحاسبنا على النتيجة النهائية للعمل، كان إيه ممكن يحصل؟

---

---

## لما تسأل أسأل الشيف

سؤال و محتاجة رد منك عليه، مرة واحدة حبت تعمل كيكة كريم كراميل، و لما عملتها فشلت فيها جامد جداً، فقررت إنها تسأل عم محمد الترزي على مقادير الكيكة؟؟؟

إيه رأيك؟ تسأل عم محمد الترزي و لا تسأل الشيف غادة التلي صاحبة برنامج زعفران وفانيلا؟؟

الغريب إنك هتقول أنها تروح تسأل غادة التلي، رغم إنك لما بتحب تعمل شيء بتحبه، بتسأل ناس فشلت في إنها تعرف هي بتحب إيه؟؟ و لما بتحب تفتح مشروع جديد و عايز ناس تشجعك بتروح تسألوا ناس عمرها ما نجحت في إنها حتى تفكر تفتح مشاريع خاصة بها.

و لما تحب تمارس شغفك بتروح تسأل ناس عمرها ما سمعت عنه، و لما تحب تعيش حياتك صح بتروح تاخذ نصيحة من الناس الغلط، العيب في مين في الكيكة ولا في اللي عملتها ولا عم محمد الترزي؟

الحقيقة إنه عشان تنجح و تبقى صاحب بيزنس لازم تسأل و تتعلم من حد فتح بيزنس قبل كدا، مش تسأل شخص عمره ما عمل بيزنس و لا يعرف في الحياة أي أعمال أخرى. الموظف له عقلية ناجحة و هي عقلية الموظف، و لمن يريد أن يكون موظف، يستطيع أن يستفيد من خبرات الموظف، و البيزنس له عقلية خاصة به و هي ناجحة و لا بد أن ينقلك وصفة النجاح فيها من قام بالممارسة للبيزنس من قبل.

## أغرس في أرضك والعب بقوانينك

كان فيه قصة بنقراها دايمًا ومشهورة قوي، قصة الأرنب و السلحفاة بتاع السباق، فاكربنها، هنزلكم الأجزاء بتاعتها في الجزء التالي رغم إني أنا مهمني نقطة معينة فيها، يلاً، مش خسارة نحكمها كلها "بصوت (هاني رمزي) 😊 "

كان يا ما كان يا سادة يا كرام كان فيه أرنب و سلحفاة، الأرنب حب يتنطط على السلحفاة، فقالها تسابقيني؟ قالت له السلحفاة: موافقة، المهم حددوا خط النهاية وبدأ السباق، الأرنب جري وبعدين بص وراه لقي الست سلحفاة هانم لسه بعيدة جدًّا، قال هنام شوية على ما الأستاذة سلحفاة توصل؛ دي يومها بسنة، المهم الأرنب راحت عليه نومة تحت الشجرة (مش عارفة إيه الشجرة الغربية اللي فجأة ظهرت في المسابقة 😊 ما علينا) المهم راحت عليه نومة وصحي لقي السلحفاة وصلت لخط النهاية، وفازت.

و من هنا نعرف إن الحكمة بتقول، أهم شيء الثبات و التكرار حتى لو كانت السرعة بطيئة، حتما هتوصل، وكمال لا تستهون بالرحلة أو بالخصم. القصة دي مخلصتش عند النقطة دي، الحقيقة إن القصة دي لها تكملة مهمة جدًّا، وهي أن الأرنب رفض أنه يحس أنه خسران، فقرر يلعب الأمر بذلك، عمل إيه الأرنب؟؟!!!!

عرف غلطه، وقرر يصلحه وعرف إنه كان عنده ثقة مزيفة، وإنه قلل جدًّا من قدرات الخصم، المهم تحدى السلحفاة للمرة الثانية، والسلحفاة قبلت التحدي، المهم بدا السباق وجري الأرنب وكسب فعلاً،

وهنا اتعلمنا شيء مهم، أن الثقة اللي في محلها، والسرعة في الأداء والرؤية الممتازة للهدف، وكمال تحديد المعدل، وفهم نقاط قوة و ضعف الخصم، أساس مهم من أسس النجاح، والأمور دي تتفوق على البطء والأداء الثابت.

هل القصة خلصت هنا؟ لأ طبعاً، السلحفاة حست إن كرامتها وجعتها جدّاً، و إزاي الأرنب يغليها؟ فقررت تتحدى الأرنب، وقالت له إنها عايزة تسابق الأرنب للناحية الثانية من الغابة، و فعلاً الأرنب وافق بشكل جامد؛ لأنه عارف اللي فيها، المهم بدأ السباق و الأرنب جري بأقصى سرعة وفجأة لقي قدامه النهر، و السباق المفروض ينتهي الناحية الثانية وبكل بساطة السلحفاة نزلت البحر و سبحت و عدت الناحية الثانية و سابت الأرنب يرن و يأكل في بعضه و مقدرش يكمل السباق.

و الخلاصة هنا، تفكروا إليه؟؟ بعد ما روحنا ورا منهم؟؟

دا الجزء اللي كنت عايزة أوصله و أوضحه

أنك لازم تعرف قيمتك و تعرف قدراتك و ما تؤمن به، تعرف مهارتك و تعرف أرضيتك بشكل قوي عشان تعرف تحدد اللعبة اللي تناسبك، و تعمل القوانين للحياة بتاعتك بما يتناسب معاك و مع قدراتك و شخصيتك، و بكدا تكسب في أرضك اللي بتعرفها شبر شبر، و هي دي النقطة اللي عايزة أوصلها هنا، متلعبش في أرض مش أرضك؛ لأن النتيجة هتكون عجز مش صحيح، بيخليك تحكم من خلال هذا العجز الذريع المزيف علي قدراتك الهائلة بالفشل، و دا مش حقيقي، مينفعش تخلي سمكة تطير، و تعاقبها أنها لو مطارتش هتقول عليها فاشلة!، و مينفعش تخلي فيل يمشي علي الحبل (بالمناسبة هو ينفع لو الحبل محطوط علي الأرض ☺)، لكن لو عملت سباق بين سمكة و بين طيارة تحت المياه، السمكة هتكسب و الطيارة هتغرق، و لو عملت نفس السباق بين سمكة و بين طيارة في الهواء، الطيارة هتكسب و السمكة هتموت.

اعرف أرضيتك كاملة و افهمها و اعرف ما تملك تماماً و احصره و لعب بما تملك، تفوز لأنها أرضك و قوانينك و قدراتك.

## إضافة من الكاتبة:

بالمناسبة القصة لم تنته عند هذا الأمر، الأرنب والسلحفاة طلبوا سباق للمرة الأخيرة بعد ما أصبحوا أصحاب، المرة دي حصل تعاون، الأرنب شال السلحفاة وجري بها، لحد ما وصل للنهر، والسلحفاة شالت الأرنب وعدت به النهر، طبعا الأرنب مضحكش عليها وغدر بها وطلع كمل الطريق لوحده، مش عشان هو مش عارف، لأ طبعا، لكن لأنه عرف إن عصور البطل الأوحده مش موجودة وأن أي نجاح لازم له شراكة وتعاون، وانه يمكن عشان تنجح على أرضك وأرض غيرك هحتاج منك يكون عندك فريق يساعد؛ كل في مجاله، نجاحك ونجاحهم كفريق واحد هو الأساس.

الأمثلة علي كذا كتير، يعني لو مش موهوب في الكتابة لكن عندك شخص موهوب، إيه المانع يستفيد من معلوماتك وتستفيد من خبرته وتعملوا كتاب بتعاون مشترك، مديع وشخص بارع في المونتاج، أو مصور ليه ميكونش تعاون كل واحد في أرضه.

يبقى اعرف شخصيتك ومهاراتك وقيمك ومعتقداتك وكل ما يميزك واتعلم تبني تعاون مشترك دايمًا، والعب وسط تيم يساعدك.

## الشغف والتغيير

التغيير سنة من سنن الحياة، ومن أهم ما يجب أن يتعلمه الإنسان، الإنسان يفتكر أن التغيير يتم فجأة، زي مثلا يصحى الصبح يحس أنه عجز أو شعره كله أبيض، أو يقف قدام المرايا ويقول "ياه، أنا تغيرت جامد"، أو ابنه مثلا يقول "أنا يوم ميلادي الخميس الجاي، و حَ تم ٢٠ سنة"، يقوم الأب و الأم ينظروا نظرة استنكار تدل على أنه كيف مر الزمن هكذا ولم نشعر به، والولد كبر فجأة، الحقيقة أن مفيش حد كبر فجأة.

التغيير وجوده مهم؛ لأنه يعطي للحياة المذاق و الطعم اللي يجعلها مختلفة، و الشغف من الممكن أن يتغير، و من الممكن أن يكون هو نفسه مع تغيير ما تمارسه و شكل ما تمارسه.

من أشهر الأمثلة لاعب كرة القدم، لنفترض أن هناك لاعب كرة قدم موهوب في مجاله و هذا شغفه، مع الوقت لازم هيكون هناك وقت لاعتزاله، فهل يترك المجال لمجرد اعتزاله رغم انه شغفه؟ الحقيقة أن هناك لاعبين لم يتركوا المجال و انخرطوا في سلك التدريب و تنمية المهارات و التحكيم و التعليق الرياضي، و حتى العمل لإنتاج المنتجات التي يتم استخدامها في مجال كرة القدم، و منهم من دمج بين المجال و مجالات أخرى مثل العمل كمراسل و مصور لأحداث رياضية و موثق و مؤرخ و ما شابه.

لازم نتعلم نفهم التغيير و نفهم الانتقالية التي يحدث بها التغيير؛ لأن دا هيساعدنا ننقل و نعدل و نغير في صور إظهار شغفنا بمنتهى السلاسة و التقبل لشكل الشغف و شكل وجوده في حياتنا مع كل تغيير و تطوير يحدث فيها. فهناا للتغيير و لفكرة الانتقالية أيضا هتعلمنا أن الشغف مش بينطفي فجاءة.

## الوقت المناسب للبداية وقرار التغيير

دائما لما بتكلم حد عن الوقت في أي موضوع، أو مثلا عشان يبدأ يعمل بحث عن شغفه، يقولك و يرد عليك الرد الشهير " الوقت مش مناسب أو خلاص راحت علينا"، لما تقول لحد ممكن تغير الكاريير أو تطويره، و ممكن تشتغل في شيء بتحبه، يقولك "خلاص بعد ما شاب ودوه الكتاب"، الحقيقة الفعلية أن مفيش وقت مناسب للبداية، و مفيش وقت مناسب لقرار التغيير. في مقولة صينية فيما معناها بيقول " أفضل وقت لزراعة الشجرة وقتين: الأول كان المفروض يكون من كام سنة فاتوا، و الثاني هو دلوقتي عشان تصلح ما كان المفترض أن يتم عمله"

تطلع مليون جملة تقول "لأ"، لو الوقت المناسب أتأخر معدش ينفع الأمر، مش هعارض اللي بيتبنى الرأي دا، مش لعدم القدرة على المعارضة و لا شيء، لكن فعليا أنا مؤمنة بأن المحاولة و البداية و التغيير شيء هيحصل سواء بدأنا فيه بدري أو متأخر، و مش عشان فيه جزء مينفعش فيه البداية أو القرار فيه هيكون خلاص مش وقته، يبقى الكل مينفعش فيه القرار أو البداية، و ارد أن جزئيا الأمر ينفع و نقدر نبداً.

مثال، الهجرة مع الرسول(صلى الله عليه وسلم) كانت تسمى هجرة لحد ما تم فتح مكة في عام ٨ من الهجرة، يبقى اللي هيسافر لمكة بعد فتح مكة لن يسمى مهاجراً، لكن هل دا منع الناس من الدخول في الإسلام حتى لو لم يكن مهاجراً، ينفع حد بيعي يقول خلاص مادام مش هكون مهاجر مش هبقى مسلم، أكيد لأ؟؟ الفكرة إنه في جزء من الأمر مبقاش وقت صالح للبداية له فقط، لكن دا لا يمنع أن فيه أجزاء أخرى في نفس الشيء تنفع كبداية و كقرار للتغيير. هل دا يمنع أنك تكون من الصحابة. فيه أمثلة كتير في هذا البند لا يتسع المقال لشرحها، حاول وابدأ مهما حصل.

مثال ثاني، واحدة كان نفسها تدخل كلية الطب (القصة حقيقية)، وبعدين في الثانوي العام جابت مجموع دخلها كلية آداب، لكن فضل حلمها أنها عايزة تدخل كلية طب، السؤال، هل ينفع بعد ما بقى عمرها ٤٠ سنة وأولادها في ثانوية عامة، تدخل كلية طب؟؟!!  
رأيك وتوقعك لهذه القصة؟؟

---

بالمناسبة هي فعلا دخلت ونجحت و بقت طبيبة، رغم الصعوبات اللي مرت بها. القصة حقيقية.

قرار التغيير و قرار البداية مش محتاج لوقت صحيح، قد ما هو محتاج لشخص قوي عايز ياخذ القرار المناسب؛ لأنه بيحب الشيء وشايفه مناسب، و كمان محتاج لشخص مُصر و مثابر و مستمر، التغيير سنة الله في الكون كل يوم بيحصل التغيير، لكن عمرنا ما بناخد بالناس منه؛ لأنه بيحصل من خلال شيء اسمه مرحلة انتقالية، و بنشوفها بشكل معتاد، و فجأة لما بنصل للشكل النهائي أو التغيير بيكون بالشكل النهائي نتفاجئ بالتغيير و نستنكره رغم إنه حصل قدامنا علانية عن طريق المرحلة الانتقالية.

---




## التغير Change والانتقالية Transition

دايما بنسمع أن التغير سنة الله في الكون، لكن عمرنا ما بنعترف؛ أبدا ودايما بنبدي دهشتنا من التغير، لما بنشوف نفسنا لما بنتم الخمسين و نقول هو فترة الشباب راحت فين؟؟ لما بنشوف ولادنا في التخرج و نقول ياه كل السنين دي عدت علينا و العيال كبرت و إحنا عجزنا؟؟!!

و فجأة بنندهش و لا أجده ممثل و هو بيمثل مشهد في فيلم رغم أنه بيكون قرأ الدور (١٠٠) مرة وأعاد المشهد (١٠٠) مرة، و مع ذلك بيندهش بصدق شديد و بيخلينا نندهش معه و هو بيمثل المشهد الخاص بالاندهاش.

الحقيقة أن في شيء اسمه تغير، و فيه شيء اسمه مرحلة انتقالية، التغير هو تغير مكان لمكان أو شيء لشيء، أما المرحلة الانتقالية هو العملية اللي حصل خلالها التغير و الانتقال من مكان لمكان.

مثال لو أنت دلوقتي عند باب غرفتك (الشكل رقم ٤)، و بعدين مشيت بالطريقة اللي هوصفها دي، ( تضع رجلك اليمين قدام رجلك الشمال مباشرة "كدا دي الخطوة البسيطة رقم ١"، و بعدين تضع رجلك الشمال قدام رجلك اليمين مباشرة " كده دي الخطوة البسيطة رقم ٢"، و تفضل تكرر الخطوة رقم "١" و الخطوة رقم "٢"، لحد ما توصل لأقرب حيطه، التغير هو إنك غيرت مكانك من عند الباب و رحت عند الحيطه " دا اسمه تغير"، أما الخطوات (الخطوة رقم "١" و الخطوة رقم "٢") دي هي Transition الانتقال، اللون الأحمر في الصورة بيدل علي التغير، و اللون الأسود دي بيكون الانتقال بينهم، الانتقال غير مهم للشخص، (مش عشان إنه مش مهم؛ لكن الحقيقة لأننا اتعلمنا نهمله و لا نركز عليه، و لأنه بيحدث بطريقة متراكمة، حاجات بسيطة جدًا تراكمها يؤدي لتغير كبير)، التغير بيكون واضح.



الشكل رقم ٤: شرح الفرق بين التغيير والانتقالية

أول وآخر شخص هم التغيير والأشخاص في النص هم الانتقالية التي يتحدث بين مراحل التغيير، عارفين فيه قصة قريرتها علي صفحة دكتورة نادية العوضي، كانت بتحكي عن قصة صعودها جبل الكليمنجارو، المرشد أو الدليل الخاص بالجبل التي يساعدكم للوصول للأعلى كان دائما يركز على الخطوة الانتقالية الثانية مش علي النقطة الأخيرة في الوصول (نهاية الجبل)، وبيقول على الخطوة الواحدة البسيطة "بولو-بولو"، التي هي خطوة بخطوة، بيقول ركز على عملية الانتقال، انبسط بها وركز عليها، هتلاقك وصلت في النهاية بكل راحة و بساطة، (ليس المقصود هنا إنك متعرفش أنت رايح فين و لا تشوف باقي كام في الرحلة أو حتى تقيمها، عليك أنك تعرف و تقيّم بس مش كل دقيقة وكل لحظة، يعني كل ١٠٠ خطوة بولو-بولو- أقف و شوف بقيت فين وإيه التي حصل (رقم ١٠٠ دي علي سبيل المثال) التغيير في الحالة دي هو إنك كنت في أسفل الجبل، و بعدين وصلت أعلى الجبل، طيب و عملية الانتقال هي " بولو-بولو" عشان تركز على الخطوة. يبقى متفاجئش بالتغيير و تقول حصل إزاي و عمري راح فين؟ لكن ركز على الخطوات التي بتمشها و استمتع بها، عادي يبقى عندك خطة وهدف طويل المدى و حلم ناوي تحقيقه، اكتبه و كل يوم امشي فيه خطوة، بس متعقدش كل شوية تحزن لأنك موصلتش. أنت بتمشي خطوات عشان توصل، الالتزام مهم، و الزمن علاج ما لا علاج له، الزمن يستطيع تغيير كل شيء لو التزمنا بالتنفيذ والاستمرارية.

## النجاح والفشل والعجز

النجاح والفشل، مقدرش أضع لهم تعريف محدد، مش لأن مفيش تعريف، أو لأن فيه تعريف وأنا مش عايزة أذكره؛ لأن تعريفهم يختلف على حسب رؤيتك وفهمك وتقبلك للنجاح والفشل والعجز، وقيمك ومبادئك لها كمان عامل في الأمر، وتأثرك برأي الناس، أكاد أجزم أنه له ثقل في تعريفك للنجاح والفشل.

لكن أنا عايزة أشرح لك في البداية لعبة كلنا أو أغلبنا لعب اللعبة دي وهو صغير، اللي هي لعبة الرفة أو لعبة العملة أو لعبة ملك وكتابة، ( اللعبة لو حد ميعرفهاش، هي عبارة عن إنك ترمي العملة لفوق وبعدين تمسكها وتخبيها وتقول "ملك ولا كتابة"، "كتابة ولا صورة")

تخيل و أنت بتلعب اللعبة دي، إنها كانت ملك بس أو كتابة بس اللي بتظهر طول الوقت، تهتس أن اللعبة مالهاش طعم، صح كده؟!

الحقيقة إن النجاح والفشل همّ الملك والكتابة، ومفيش كتابة بدون ملك و مفيش ملك بدون كتابة، العجز هيكوّن في إنك مش هتلعّب اللعبة أو هتبطل تلعبها. أقبل قوانين الحياة، ان النجاح والفشل هم الاثنين مكملين لبعض، لا بد من وجودهم في الحياة مع بعض، وأن العجز هو المضاد لكلمة النجاح وكلمة الفشل.

عارفين في التجارب العلمية، لما عالم بيعمل تجربة علمية، أو بيحل معضلة، إذا الحل طلع غلط أو فيه مشكلة ناتجة عن محاولة أو فرضية ما من العالم، العلم والعلماء بيعتبروا ان دا نجاح له شكل مختلف؛ لأنك مش هتكرر الفرضية الغلط أو الطريق دي تاني وبكدا هتحاول بشكل مختلف.

يبقى الفشل ما هو إلا نجاح لكن شكله مختلف عن النجاح اللي أنت وضعت له شكل محدد مسبقا في دماغك قبل ما تبدأ الطريق.

النجاح وال فشل يعتمد علي رؤيتك و معاييرك، مثال واضح هو حصان السباق و الحصان العادي، لو فرضنا أن فيه حاجز ارتفاعه متر، و طلبت من حصان سباق ينط و يعديه، أكيد هو فاهم داخليا إنه لو عدّى الحاجز يبقى هو كدا ناجح، طيب لو حصان عادي و طلبت منه يعدي الحاجز، مش هيعديه! و دا لأنه مش فاهم إيه الأهمية اللي هتخليه يعدي الحاجز، و هو شايفه فقط على أنه سور للإسطنبول الخاص به، و دا الطبيعي أنه يكون موجود من وجهة تفكير الحصان العادي.

البعض يعرف الشخص الناجح على أنه من يبدأ الطريق، و أنه أخذ قرار البداية و الانطلاقة، و في ناس بتعرفه على إنه الشخص الذي وصل لنهاية الطريق و حقق النتائج، و ناس بتعرفه على إنه الشخص الذي قام بالسعي. طيب لو قلنا مثال ثاني؛ دائما بيقولوا لنا، (بص على نص الكوباية المليان و متبصش على نص الكوباية الفاضي)، الحقيقة أن النص الفاضي، هو مليون بس بحاجة ثانية لها خصائص مختلفة، الكوباية نصها هوا و نصها مياه، مميزات النص الفاضي، مش واضحة لينا؛ لأننا مركزين على مميزات بشكل معين و طالبين شيء محدد، و إذا المميزات دي مكانتش موجودة في الكوباية كلها، بنعتبر أن نص الكوباية وحش و نعيش في حالة عدم تفاؤل. نص الكوباية اللي مليون هوا (الفاضي من وجهة نظرنا، لو تسرب له ملوثات، أصبح نص الكوباية المليان غير صالح للشرب أو للاستخدام.

يبقى لازم نفهم إن العجز هو مضاد النجاح و التقدم و الفشل، و أن الفشل جزء من عملية النجاح؛ لأنه هو عبارة عن نجاح لكن له مميزات و عيوب مختلفة عن الحاجات اللي إحنا عايزينها، و إنك ناجح لو بدأت بس.

إيه هو تعريفك للفشل؟

---

---

إيه هو تعريفك للنجاح، هتعرف امتى إنك نجحت؟

---

---

إيه هو تعريفك للعجز، وإمتى ممكن تقول أنا عجزت فعلا؟

---

---

ناوي تعمل إيه بعد التعريف الجديد للنجاح والفشل؟

---

---

مجموعة مختارة من مقالات للكاتبة قامت بنشرها على عدة  
مواقع أونلاين عن الشغف



## الانطلاق في الرحلة

هنمشي في رحلة الشغف، علي حلقات و أشكال مختلفة من كل حلقة نركز و نحاول نوصل، أهم شيء نحاول، و عشان تعرف موهبتك أو شغفك خصوصا لو انت بقالك كتير مشغول ومضغوط، لازم الأول الجلوس مع نفسك وتصفية ذهنك؛ يعني تقعد ولو ٥ أو ١٠ دقائق مع نفسك وتسترخي تماما وتتنفس بهدوء وتراقب تنفّسك لما تركز على تنفسك، كذا بتوقف أفكارك بكل هدوء، وأي فكرة تجيلك تخيل إنها كورة و انت بتمشها لحد ما توصل للحظات من الصمت وتوقف الأفكار. اللحظات دي بتفيد مخك وذهنك وجسمك جدّا، وبتساعدك ترجع لروح الطفولة والفطرة وتقدر بعد ممارستها الدائمة إنك ترجع لذاتك وبسهولة تكتشف شغفك وموهبتك.


يعني دي عادة يومية ضرورية جداً، أنصح بها، وأنصح بممارستها:  
رياضة التأمل و عبادة التفكير، مهمة جداً، بتساعدك علي تصفية الذهن،  
بالإضافة للكتابة كثير.

الكتابة هنا مقصود بها إنك تقعد تكتب مع نفسك عن كل اللي مربك في اليوم قدر الإمكان، أو لو في حاجة في ذهنك أو ذكرياتك أو حاجات بتقلقك. اكتب وبعدين تقدر تمسح اللي كتبته أو تحرقه لو أنت مش بتحب حد يعرف عنك شيء، الأهم ممارسة الكتابة بشكل يومي من ٥ ل ١٠ دقائق، عشان دا هيساعد على تصفية ذهنك وهيفرق معاك كتير.

**يلاً نبدأ الحلقات،،،،،**

## الحلقة الأولى (أنا موهوب ولا مش فاهم)

دايما بنسمع أصل مش موهوب، أصل معرفش، أصل مش فاهم، أصلها صعبة، أصله نجح عشان عنده موهبة، لو كنت موهوب كانت فرقت. الموهبة ممكن نكون مولودين بها (وكلنا مولودين بمواهب مختلفة ) ممكن تموت منا في الطريق، مثال بسيط، لو أعطيتك كوباية مياه فيه حبة مياه صغيرين، وقلت لك كل شوية لازم تنقط مياه في الكوباية وبالراحة، لحد ما الكوباية تمتلئ، بس خلي بالك أنت كمان واقف في الشمس وهي حرنار، يعني احتمال كبير المياه اللي معاك تبخر.



### السيناريو الأول:

أنت قعدت تنقط مياه بمعدل كويس جداً، تفتكر إيه اللي هيحصل، المياه ترتفع!! صح كذا؟؟!!، وبكدا حافظت على الكوباية و المياه، ومليت الكوباية فعلا، رغم إنك عرقان من كتر صهد الشمس وأنت تحاول تملئ الكوباية.



## السيناريو الثاني:

أنت قعدت تنقط مياه بمعدل قليل، تفتكر إيه اللي هيحصل، المياه مش هتزيد!! صح كدا؟؟!!، وبكدا لم تحافظ على الكوباية ولا على المياه، مستوى المياه لم يرتفع ولكنه ظل ثابت، وكدا كدا أنت عرقان من كتر صهد الشمس وأنت تحاول تملئ الكوباية.

## السيناريو الثالث:

أنت منقطتش في الكوباية ولا نقطة مياه أصلا، تفتكر إيه اللي هيحصل، المياه تنشف في الكوباية!! صح كدا؟؟!!، وبكدا لم تحافظ على الكوباية ولا على المياه، وكدا كدا أنت عرقان من كتر صهد الشمس وأنت قاعد برضو في الشمس.

## التوضيح

الكوباية هي حياتك، والمياه هي شغفك وموهبتك وخبراتك وكل ما تملك في حياتك و الشمس هي الدنيا اللي انت عايشها.. كدا كدا هتعيش في صهد الشمس، فتعلم تحافظ على كوبايتك وموهبتك وكل ما تملك (المياه اللي هي أصل من أصول حياتك ورسالتك)

الموهبة، بعض العلماء قالوا فطرية وبعضهم قالوا مكتسبة بجانب بعض العناصر الفطرية، وأنا من وجهة نظري، إن ربنا خلق جونا بذور تناسب رسالتنا (مواهب مختلفة الألوان)؛ ولذلك يمكن تطويرها واكتسابها وتعلمها، الشغف هو الحاجة اللي انت بتحب تعملها وتستمتع بها والوقت بيمشي ومش بتشعر به (الموهبة والشغف مرتبطين مع بعض؛ الموهبة جزء من الشغف، (العكس غير صحيح )، ممكن تكون موهبة واحدة / شغف واحد، و تقوم بإكمالهما وتنميتها فتكون النتيجة إنك رائع جداً وشخص موهوب ومميز،

وممكن تكون عندك عشرين موهبة وشغف متعدد لحاجات كثير ومش بتعمل بهم حاجة أبدا.

المثل بيقول "سبع صنایع والبخت ضایع" مثل صحیح، بس الناس بتستعمله خطأ للأسف؛ لأن الناس بتستعمله عشان تنیم نفسها باللیل وتقول شفتوا أنا مالیش ذنب خالص، دا البخت هو اللي مايل رغم اني مميز، حياتي صعبة رغم إني موهوب، عشان تعيش في عالم المظلومية.

(قوله تعالى: ) { من عمل صالحا فلنفسه ومن أساء فعليها وما ربك بظالم للعبيد }، سورة "فُصِّلَتْ"، الآية ٤٦.

مثال: لو المدير ادالك غرفة وقالك الغرفة دي بتاعتك وكل اللي فيها بتاعك ومش من حق حد يقعد على أي كرسي من العشر كراسي اللي فيها، كل الكراسي بتاعتك، انت هتعمل إيه؟ غالبا هتقعد على كل كرسي شوية وتقول أنا مش مستريح هنا، طب أروح هنا، طيب مش مستريح هنا، أروح هنا، وهتفضل تنقل بين العشر كراسي وعمرك ما هتستريح؛ لأنك مركزتش على كرسي أو اثنين وضبطت قعدتك عليهم كبداية و انطلاقة لك، طيب لو المدير اداك كرسي واحد بس، تعمل إيه؟؟ هتضبطه وتنظمه وتعدله على عدلة ضهرك وتطوره

يبقى السبع صنایع بختك هيضيع؛ لأنك معرفتش تركز، ولم تبدأ في الطريق حتى سواء وصلت أو لم تصل. إحدى صديقاتي اشتكيت لها إني اخدت بدل الدبلومة الواحدة، أخذت ٥٠ دبلومة ومع ذلك مش عارفة أنا عايزة إيه؟؟

قالت لي جملة بعفوية، هتعرفي لما تبدئي، هل بدأت؟؟!!

القاعدة بتقول (When focus goes, energy flows)

التركيز ينطلق في اتجاه معين، تلاقي طاقتك و مجهودك هناك، أهم شيء تبدأ بالتركيز؛ لأن دول من عوامل وصولك للي أنت عايزه، وتمشي في الطريق، ولو

الطريق ظهر لك بعد فترة إنه غلط، يبقى اتعلمت خبرة جديدة، و اتعلمت طريق جديد مش هتمشي فيه تاني، و نجحت إنك تعرف أنك تبدأ في طريق جديد.

#### سؤال الحلقة

اكتب إيه العمل اللي لما بتقوم به الناس حواليك بتستغرب عملته إزاي؟؟  
يعني، مثلاً "أنا الناس بتستغرب إنني ممكن أكلم أي حد مثلاً وأقنعه، فيه ناس بتستغرب من إنني بعمل حلويات شكلها كويس، فيه ناس بتستغرب من إنني بكلم الأطفال ويعرف أسكتهم.

---

---

اسأل اللي حواليك إيه أحلى عمل / حاجة بعرف اعملها من خلال معرفتهم بك؟؟

---

---



## الحلقة الثانية ( أسباب غطاء وأسباب حقيقة)

البعض مش مصدق إنه موهوب و دايمًا شايف إنه معندوش موهبة أصلاً، أو النجاح دا أصلاً مش في دماغه؛ لأنه وللأسف شايف نفسه فاشل، وأبدا مش بيفكر أو حتى يحلم بالنجاح، الحلم بالنجاح لا يعني إنك تعيش في الحلم لدرجة تخليك مش عايش على الأرض وفي الواقع عشان تبدأ تحققه.

العيش في الحلم الخاص بالنجاح والمحاولة أشبه بإنك بتدخل للحظات عالم الخيال تشوف أنا فين دلوقتي، دا أنا قدامي ٥٠ متر و هوصل لنص الجبل، اخرج برّه عالم الحلم و اجري في أرض الحقيقة و على أرض الواقع عشان تخلص ال ٥٠ متر دول، دا زي لما بنتفرج على فيلم بيدمج بين عالم الخيال و الحقيقة، البطل أو البطلة بيحلم حلم، و بعدين يفوق للحظات في عالم الواقع و يمشي فيه، و بعدين يرجع يدخل للحظات عالم الخيال وهكذا.

مهما كان مبررك ومهما كان اللي بتقوله جوا نفسك، أنا مش بغير حد، ولا ناوية أغير حد، محدش في الدنيا يقدر يغير حد، أنا بعمل الجزء اللي بحس باستمتاع وأنا بعمله، بمارس شغفي، شغفي دا وصلك وساعدك تاخد القرار يبقى كويس، لكن القرار مش كافي، التغيير دا نابع من جواك أنت، اتعلم تساعد نفسك الأول.

بعد المقدمة دي لازم نفهم مبرراتنا لما حد بيتكلم مع حد إنه ليه ما يتغيرش، عندنا في حياتنا أسباب عشان نعمل الشيء أو عشان نمعملوش، والأسباب في حياتنا بتنقسم لأنواع مختلفة لكن خلوني أقولكم العناوين الكبيرة وأهم قسمين فيها من وجهة نظري:

## أسباب غطائية & أسباب فعلاً حقيقية

أسباب غطاء (زي غطاء الحلة بتاعة الطبخ)، و دي عشان نريح ضميرنا و نريح اللي حوالينا و نخدر نفسنا بها، و كمان البني آدم مش بيعجب حد يكشفه و يحاول يتغطى و يغطي نفسه قدام الغير.

و أسباب حقيقية، ممكن نعرف بها بينا و بين نفسنا (دي لو كان الشخص من النوع اللي بيواجه نفسه)، و ممكن نفضل كاتمين صوتها و دافنيها في التراب (بقصد الأسباب الحقيقية).

مثال بسيط، سعاد و نيرمين واقفين في المطبخ، و سعاد بتطبخ محشي و حطت الحلة على البوتاجاز، و بعدين سمية جارة سعاد خبطت على الباب ( وللاسف سعاد نسيت باب الشقة مفتوح) فالباب انفتح، و دخلت سمية، المهم سعاد بسرعة قامت مغطية الحلة بالغطاء، و قالت أهلا يا سمية، معلش كنت بغطي الحلة عشان الحاجة تستوي، فلما مشيت سمية، سعاد قالت ل نيرمين أنا غطيت الحلة صحيح عشان الحاجة تستوي، بس الحقيقة أنا خائفة تحسد أكلي،

تفكروا فين الأسباب الغطائية و فين الأسباب الحقيقية في القصة دي؟

---

أما تقول أصل مفيش وقت، هقولك ممكن صحيح يكون سبب حقيقي، لكن في معظم الأحوال هو سبب غطا، لأن لو الموضوع في أولويتنا نخلي له وقت بأي تمن مهما حصل.

لازم تتعلم إنك تكون واضح مع نفسك جدا، وإذا مقدرتش لازم تروح لحد متخصص في الكوتشنج زي طبعا (عشان يساعدكم 😊)

بخصوص موضوع الوقت، فيه جملة دايمًا بقولها لنفسي، (اللي معملتيهوش و أنت مشغولة، عمرك ما هتعمليه و أنت فاضية)؛ لأن إنك تكون فاضي أو مشغول مش سبب لعدم عمل شيء، السؤال هل هو أولوية عندك و أنت حاسس بأهميته فعلاً؟ هل عمرك كنت شايف انه مهم في حياتك؟

سؤال الحلقة

شيء بتحس بسعادة و أنت بتعمله؟

---

---

اكتب الأسباب الغطا اللي منعتك من ممارسته؟؟!

---

---

اكتب الأسباب الحقيقة اللي منعتك من ممارسته؟؟!

---

---



## الحلقة الثالثة ( أنا مش unique )

محتاجين نتكلم عن شيء جديد النهاردا وهو أنا مش unique  
أو أنا فيه مني كثير، أو فيه غيري كثير، أنا أصلا مش فارق.. عادي يعني، ما  
هو غيري عمل، هو أنا لازم أعمل، ياريت متقدفش وترمي ربنا بالباطل " حاشا  
لله " إننا نكون بنعمل كدا ☹

أيوة للأسف أنت بتعمل كدا، أوريك إزاي؟؟  
لما بيكون فيه مصنع بيعمل الأيفون/ سامسونج لو منزلش جديد في السوق  
ومطورش بنقول عليه مصنع فيه مشكلة، صح كدا، وبالتبعية بيخرج خارج  
منافسة السوق المالي، وكمان من حياة الناس اللي كل يوم بتتطور.  
الدليل علي كدا نوكيا، أظن خرجت برّه المنافسة العالمية. شركة سامسونج  
بتعمل من كل موبيل ملايين النسخ، ليه مش زعلان إن فيه ملايين النسخ من  
نفس الموبيل اللي أنت شايله، ليه مقلتش أن دا تقليد؟ لأنك غالبا فاهم إن  
الفرق بين الموبيلات هتكون في البرامج الموجودة على الجهاز وكيفية استخدام  
الجهاز.

ربنا لو خلق منك اتنين على الأرض، بعقلك البشري هل دا دليل علي قدرة ربنا  
ولا دليل علي عدم قدرته " حاشا لله " إنه يطور وينوع في الخلق الإنساني  
والحيواني وغيره من بديع خلقه سبحانه وتعالى!! ( خليك واضع في دماغك  
كلمة واحدة -النقص في ذات الله محالة-)، أن الله على كل شيء قدير، وفوق  
كل ذي علم عليم " هوربي جل وعلا.

نتشابه في الظروف، نتشابه في الأفكار، نتشابه في الكثير، لكن نختلف في  
الفعل ورد الفعل، نختلف في قوة التحمل وقوة التغيير، نختلف في الاستسلام

والمحاولة والوقوع والوقوف، نختلف في التمسك بثقتنا في الله وفهمنا لمراد الله، نختلف في قُربنا وُبُعدنا عن الله، نتشابه ونختلف كثيرا.

طيب ربنا خلقنا ليه؟ عشان نعبد بس كدا، وكلنا حافظين الآية الكريمة عن ظهر قلب، هي دي الكلمة العامة اللي حضرتك دايمًا بتخدر بها ضميرك عشان محدش يعمل حاجة، ربنا خلقنا عشان نتعبد له سبحانه باختلافنا وقدراتنا المتفاوتة، بفهمنا المتفاوت، بمواهبنا المختلفة، مهما كان حجم موهبتك كبيرة أو ضئيلة، أنا اعرف واحدة مش بتعرف تعمل في حياتها غير ترتيب البيت وتنظيمه فقط، ومع ذلك نزلت فيديوهات وعملت مجموعات وعلمت غيرها، واليوم بعد ما ماتت كان دا عملها الوحيد الذي تعبدت به لله بجانب الأساسيات والنوافل في العبادات.

طبعا مش معنى كلامي نسيب العبادات والأساسيات كل واحد من الصحابة فهم صيغة التعبد لله (بجانب أنه أداء العبادات الفروض بشكل كامل والسنن والنوافل وغيرها علي قدر الاستطاعة)، أنه أيضا التعبد بالعمل بمواهبه وبما يتقنه، و نوع شخصيته و نقاط قوته و نقاط ضعفه، سيدنا أبو هريرة تعبد لله بإيه (بتعليم الناس سنة الرسول صلى الله عليه وسلم) ورواية الأحاديث)، سيدنا خالد بن الوليد، تعبد لله بقدرته علي التخطيط والإدارة و إتقان فن إدارة الحروب ( اللي بيتم ذكره اليوم)، التعبد ممكن يكون أصلا بإنك تساعد ابنك إنه يتعلم حاجة جديدة في يومه فقط، أو يعرف شيء جديد، أو يأكل أكلة تعينه على الحياة، أو إنك تكون زوج صالح لزوجتك وتساعدوها على الحياة بإنك تعينها علي الرضا بها.

طيب بلاش، لودا مش أقنعك!

مين يعرف سنان الرماح في جيش خالد بن الوليد، ولا حد فيكم!، هل يعتبر الشخص دا لم يتعبد لله بإتقانه الحرفة البسيطة، دا اللي هو بيعرفه وعملها



لوجه الله، وسن الرماح أو سن السيوف للقتال المميز ولنجاح المسلمين.. مين يعرف قادة الأفرع و الجنود في أي جيش إسلامي من غزوات الرسول(صلى الله عليه وسلم)، طيب عدد الصحابة وصل لما يفوق ١٠٠ ألف صحابي، مين شاطر يقدر يعددهم؟؟ ممكن تكون عارف منهم ٥٠ أو أكثر لكن مش عارفهم كلهم، لكن الأكيد أن كل واحد تعبد لله بالموهبة و المهارة التي يحبها، بقدراته على العمل و شخصيته؛ لأن الرقي في الحضارات لا يأتي من خلال أشخاص كارهة لما تفعل، أو شخص مجبر فوق الوصف.

ربنا أمر إن يكون فيه طائفة تقعد في المدينة ولا تخرج للحرب عشان تعلم غيرها، فهل يعتبر وجودها لتعليم الناس عدم تعبد، و الناس اللي خرجوا للحرب تعبدوا لله بشكل أحسن، أكنت الصحابييات تجلسن في بيوتهن بلا أي شاغل يشغلن و لا كانت هموم الأمة تشغلن، و هنا في بعض الصحابييات كانت تعلم أن قدراتها فقط أنه تعين زوجها و نفسها و أولاده، فقامت بفعل ذلك، وكانت هذه منطقة تميزها.

مين يعد لي ٥ وظائف للسيدة عائشة رضوان الله عليها، حبيبة حبيبي رسول الله(صلى الله عليه وسلم)!!؟؟، أمهر النساء في علم الطب، أمهر رواة الأحاديث، أمهر من تم أخذ المعاملة الزوجية وما فيها عنها، عالمة بأنساب العرب، تفتي وتحدث عن الرسول، تراعي الأيتام والنساء وغيرهم، علمت أنها خُلقت لتعلم كيف تتعبد لله.

محدث بيقول للسيدات اخرجي من بيتك، قطعي السكك، ولا تراعي أي شيء، لكن تعليمي وعلمي، أبدعي وتفنني، فقد خُلقت؛ لأنك مختلفة، وجود نسخة أخرى منك على الأرض نقص في ذات الله وهو محال "ربي على كل شيء قدير".

محدث يقول للراجل لو معملتش أثر كبير فأنت لم تعبد الله سبحانه وتعالى، كونك قادرًا على اتقان عملك وتحبه وقادر على مساعدة أهل بيتك والوقوف معهم والتعلم كيف تتعامل معهم، فهذا تميز لا تقلل من شأنه.

خلقت لتترك أثرا، ومن الأثر تخلق الأسطورة، لم يكن عمر بن الخطاب يسعى ليكون أسطورة، ولكنه ترك أثرا واضحا، جعلنا نشعر بعظمة الأثر ونجعله أسطورة. لم يكن خالد بن الوليد يسعى ليكون أسطورة، ولكنه أتقن موهبته وجعلها فعالة وترك أثرا، فذكرنا الأثر، وتحول الأثر إلى أسطورة. لقد آمن الجميع أنه لا يمكن أن يكون هناك عمر بن الخطاب آخر أبدا، مهما حصل، والحقيقة انه سيكون سواء أردنا هذا في هذا العصر أم لا، وهذا مصداقا لكلام ربنا.

قال تعالى

{ (9) وَالسَّابِقُونَ السَّابِقُونَ (١٠) (أُولَئِكَ الْمُقَرَّبُونَ (11) فِي جَنَّاتِ النَّعِيمِ (12) ثُلَّةٌ مِّنَ الْأَوَّلِينَ (13) وَقَلِيلٌ مِّنَ الْآخِرِينَ (14) } سورة الواقعة، { (37) لِأَصْحَابِ الْيَمِينِ (٣٨) ثُلَّةٌ مِّنَ الْأَوَّلِينَ (٣٩) وَثُلَّةٌ مِّنَ الْآخِرِينَ (40) } سورة "الواقعة"

هيدخل الجنة، نوعين مذكورين في السورة، السابقون ( و دول الرواد والي بيهمدوا الطريق لغيرهم وبيكون لهم السبق في الطريق، إذن حتى لو مُت على الطريق ولم تصل، يكفيك أنك كنت سباق، و السابقون "أكثرهم من أوائل المسلمين الي دعموا الرسول(صلى الله عليه وسلم)، يبقى قليل من الآخرين، و القليل دول مش معلوم عددهم و مش معلوم لما ربنا قال عنهم قليل (كانوا قليل نسبة لإيه بالضبط، محدش يعرف)، لكن ربنا ذكر أن قدامنا فرصة إننا نكون من السابقين، سؤالنا ليه متكونش منهم، ليه أنا مكونش منهم؟، والنوع الثاني، هم أصحاب اليمين، ثلة من الأولين و ثلة من الآخرين، و دول كتير سواء من كانوا أول عهد بالإيمان أو من كان آخر من آمن في نهاية الزمان، تفتكر لسه

قدامك فرصة تعقد النية وتتمتع بموهبتك وتمارس شغفك وتحوله لشغل متقن تتعبد به لله، ولا فات الوقت؟؟

أنا مش هذكر أمثلة تانية، لكن هقولكم أن فعل الصحابة إذا كان فيه غيري يعمل، فلماذا لا أبدأ أنا، أنا أولى بصناعة الخير، وإذا كان أيضا فيه كثير يعمل؟ ليه ميكونش متخصصين هناك أكثر وأكثر في نفس مجالك عشان نفيد أكثر الناس؛ لأن شخص واحد لن يسد، ولماذا لا أطور ما أفعله، وإذا كان هناك الكثير لماذا لا يكون هناك أكثر حتى يكون التنوع والاختلاف موجود. فيه مقولة كان المسلمين في عزهم يستخدموها، كانت منهج حياة ودا اللي خلاهم عظماء، أنهم علموا إنه مهما صغر عملهم فهو عظيم فكانوا عظماء ولم يستصغر أحدهم فعل الآخر مهما حدث (أنا بتكلم عن أغلب الصحابة)، و لذلك عظمتهم؛ لأنهم عظماء. صاغها الصينيون في مقولة "إذا تحرك جناح فراشة في كوريا قلبت موازين البورصة في الصين"، دا اسمه "نظرية تأثير جناح الفراشة"، معناها الأفعال الصغيرة جدًا تقلب الموازين مع التراكم. احنا فضلنا نستصغر أعمالنا وأعمال غيرنا لما صرنا أقزام في نظر غيرنا ونظر أنفسنا، من كان قزما فلن يرتقي لمستوي العمالقة إلا بفعل التفكير والعمل مهما كان صغيرا. وليس المقصود هنا التفكير الكثير و قلة العمل، لكن أن تفكر و تنظر لكل عمل على أنه كبير مهما كان صغيرا؛ لأنه أفادك وأفاد غيرك

سؤال: ليه مفترض دايما أنك فاشل؟؟ إيه اللي مخوفك من النجاح؟؟؟

---

---

## الحلقة الرابعة (أفضل (أ))

مفيش أفعل تفضيل، أنت أفعل لوحذك مش مقارن مع غيرك، أنت أفعل، عليك عمل لازم تنهيه، أنت افعل مميز بنفسك لغيرك، مش أفعل مميز عن غيرك.

كل دي نقاط مهمة لازم تفهمها  
دايما عمالين نتكلم بلغة لازم أبقى (أ) أحسن، (أ) أميز، (أ) أجمل، (أ) أحلى..  
رائع لكن مصرين نضع حرف الجر (عن) أو حرف الجر (من)  
فالجمله بتكون، أنا أحسن من جارتنا في الطبخ، أنا أميز من صحبتي في  
المذاكرة

المقولة الشهيرة للأباء والأمهات، اعمل أفضل حاجة عشان متفضحناش، لازم  
تكون أحسن من ابن عمك عشان ما تفضحناش  
فهمنا كلنا الكلام دا على انه لازم غيرنا يكون خسران عشان نكسب، حطمننا  
أحلام غيرنا عشان نكسب، قللنا من غيرنا عشان نرضي غرورنا ونحس أننا (أ)  
أفضل، خيفة إن بنتي تتغرأ أو تشوف نفسها يبقى لازم أكسر مناخيرها، تقولي  
ماما أنا حلوة أقولها لأ هو أنت مفكرة نفسك شاطرة.

أو خائفة الناس تكسرهما أقوم أقولها اللي تقولك إنها حلوة، قول لها "أنا أحلى  
منك"، وحاولي تلاقي فيها عيب عايرها به، ألا يستقيم أننا نكون كلنا ناجحين  
وفينا مليون شخص مميز؛ كل واحد في منطقته، ألا يستقيم أن نكون جزءاً  
من بناء مهدهش بعضه، ليه ماكونشي أنا نفسي مميز في الرسم وأنجح وغيري  
ينجح والشاطر هو اللي يتعلم اكتر واکتروياصل الطريق.

و نتيجة لما سبق، حصل عندنا لخبطة، أنا (أ) أنجح حد في الفصل و ماما  
بتقولي كده و ترجع تقولي هو أنت فاكر نفسك شاطر، و نشعر بالخبطة هل

احنا شاطرين لا مش شاطرين؟!، بالتبعية لازم غيري يحس بالارتباك في المشاعر؛ لأنني مش عارف أفهم الدنيا، و بالتبعية الفكرة اللي هتغلب أكثر هستخدمها لصالحني و أثبت فشل الناس الثانية عشان أفضل محافظ على الفكرة.

عشان الأمم تنحدر، الأمم اتعلمت أن أي عمل استحققه، أي ميزة ولو بسيطة أستحقها، عشان الأمم تنحدر، الأمم اتعلمت إن لازم أكسب على جث الآخرين، ألا يستقيم أني أنجح وغيري ناجح برضو، ألا يستقيم أن لو غيري ناجح أساعده إنه يحافظ على نجاحه وأنا أطور شغلي أكثر واعمل وأنجح أكثر بمجهودي بدون ما اشوه غيري.

كل الناس لها بدايات مختلفة.. اللي اتولد فقير واللي اتولد غني وحاجات كثير والنهايات واحدة وهي الدفن، ما بين البداية وما بين النهاية رسالتك في الكون ومكانك اللي حتى لو كان صغير مينفعش حد يلعب فيه.

عمركم شفتوا فريق كرة فيه لاعب واحد بيلعب كل حاجة، الإعلام العالمي هو اللي صور لنا إن الهدف مهم، وإن اللاعب اللي سجل هو اللي شاطرو بس، و حضرتك الناس اللي ساعدته في تسجيل الهدف، دول إيه؟؟ هواء، ناس مالهاش لزوم، الهدف دا محتاج حد يشوط الكرة ويضبطها، و محتاج حارس ينقذ الفريق، و محتاج حد يمرر الكرة من عند مرمى فريقك لحد ما توصل مرمى الفريق الأخير وتحرز الهدف، تفتكر الهداف هو اللي عمل دا بمفرده؟؟ رغم أن الألعاب الجماعية كثير، و منها كرة القدم الأكثر شعبية، فإن عقلية الناس بتعاملها معاملة الألعاب الفردية، لسه مش مستوعبين فكرة الفريق، (كلنا كذلك ولا أستثني أحدا- بصوت أحمد زكي-)

الإعلام و الناس و الأفكار القديمة مصرين على فكرة البطل الأوحده و بس، حتى فكرة اللعب كفريق، مش بي فهموا إزاي يتعاملوا معاها، ولما بيعملوا لقاءات مع

لاعبي الكرة بيعملوا لقاءات ميجا ستار مع الهداف فقط مع أن فيه ناس تانية مهمة، ولما بيقابلوا باقي اللاعبين، مش بيعملوا لقاءات مهمة معاهم، ممكن بيعتوا أي مذيع صغير أو لسه بيبدا حياته المهنية أو حتى لقاء على التلفون، و عشان الناس مش عارفة تحط الناس في مكانها الصح بأسلوب صح، فاخترعوا حاجة اسمها الصف الثاني و الثالث و العاشر من الناجحين، مع أن كل واحد هو بطل في حياته و صراعاته الخاصة و بطل رقم اثنين أو ثلاثة أو عشرة في حياة غيره حسب قريهم من بعض في التأثير.

ولأن الناس شايفة أن النجاح من خلال النتيجة النهائية، فلا تعترف بأي شغل للفرق، وإذا اعترفت فيكون علي استحياء.

لو فرضنا أن الدنيا على هيئة بيت وجدران عمركم شفتهم كل الناس بتشتغل في البناء طيب مين اللي هيدهن ويزين ويركب اللمبات ويعمل السباكة، مين هيكون لمبة، و مين هيكون حطة الاسمنت، و مين اللي ممكن يلون ويدهن البيت ويركب الإكسسوار؟.

لو افترضنا إن الكون و الدنيا شبه الصورة دي، الغرز المتشابهة عملت شيء مهم و الغرز المختلفة تناغمت، هل ممكن تكون انت و جارك نفس الغرزة؟ هو مينفعش تكون انت نوع مختلف من الغرز، ألا يستقيم إنك تكون نفس الغرزة لكن لون مختلف، أنت عبارة عن غرزة بسيطة مقارنة بعمر البشرية اللي راح و الجاي، فاعمل غرزتك صح، و أنت أسطورة في نفسك لو فهمت عملك، أسطورتك من أترك و إتقانك و إحسانك.



كل واحد فينا ربنا خلقه عشان رسالة ونوع عبادة خاص به، ونوع العبادة  
اللي بتكلم عنه هنا ليس الصلاة والصيام... إلخ (هذه العبادات ليس فيها فصال  
أو بمعنى أصح مش نازلة في اختيارات نعملها أو لأ؟ دي أمور مسلمات لا بد من  
عملها)، بتكلم عن عبادة العمل وعبادة الدعاء وعبادة إعمار الأرض... إلخ.  
ربنا خص كل واحد فينا بمنطقة هو مميز فيها والناس لما بتشوفه بتستغرب  
جدًا هو عمل كده إزاي؟؟؟ حتى لو كانت إزاي ينيم طفل، الفكرة أننا مصريين  
نلاقي الحاجة الكبيرة في عيون الناس ونحاول نركز عليها عشان نتميز فيها.



لو عندنا رقعة شطرنج زي اللي في الصورة، وتخيل أن كل الناس اللي في الكون قررت إنها هتقف في مكان الطابية اللي واقفة دي (آخر خانة على اليمين أو الشمال في أول صف خالص)، تفتكروا هتقولوا على الناس دول إيه؟؟؟ هل تقدرى تخلي كل الناس اللي في الكون واقفين في المربع الخاص بالطابية؟؟ بالعقل كدا لو حد قالك إننا هنعمل كدا هتقول عليه إيه؟؟؟

الحقيقة موضوع الشطرنج و ذكره كان عشان تعرفوا إنه من الجنون إننا نتجمع في مكان واحد ونعمل نفس الشغلانة، ودا بيكون سوء توزيع، ربنا خلقنا كل واحد فينا وله منطقة نجاح حتى لو كانت في نظر الناس هايقة ومالهاش لازمة.. لازم تتعلم إنك مهم حتى لو كان كلام الناس بيقول عكس كدا. حتى لو كان دورك طابية وتشابه مع ناس تانية فأكيد أنت ليك رقعة شطرنج خاصة بك، ومنطقة خاصة بك، مثلاً لو عندك منطقة سكنية فيها ٥٠٠ ألف إنسان، هل ٤ دكاترة قلب كافيين عشان العدد دا كله؟ أكيد لأ، و أكيد عايزين أكثر، يبقى أحياناً التشابه تميز.

الرسول الكريم(صلى الله عليه وسلم) لما شبه علاقته بالأنبياء صلوات الله وسلامه عليهم أجمعين، و تبليغهم الرسالة و كيف تواجدوا في خلال الزمن، قال إيه:



(مثلي ومثل الأنبياء قبلي كمثل رجل بنى دارًا فأكملها وأتمها إلا موضع لبنة منها، فجعل الناس يطوفون بها ويعجبون منها، ويقولون: هلاً وضعت تلك اللبنة فكنت أنا تلك اللبنة)

يعني الرسول لم يتحدث عن الأنبياء بقوله إنه هو الأوحد و فقط، رغم علمه بأنه خاتم الأنبياء والمرسلين، وعلمه أنه سيكون من يفتح أبواب الجنة وتميزه بالكثير، وهذا كله من فضل الله عليه، ثم إنه كان يطور نفسه ويتعلم ويُعلم. كل الأنبياء أدوا الرسالة و فعلوا الكثير، وبعضهم سيظهر يوم القيامة وليس معه إلا نفسه، هل معنى ذلك أنه قصر في عمله؟!، بالطبع لا، لم يقصر أحد منهم في رسالته.

كان الرسول (صلى الله عليه وسلم) يتعامل مع الصحابة بمبدأ فوز-فوز، وكان يعلم أن لكل شخص قدرات، ولكل شخص مهمة على الأرض أتى لكي ينفذها، فرسم لأصحابه الرؤية العظيمة النهائية، وهي إرضاء الله ودخول الجنة ولكن الطرق حتى تذهب لهذه الرؤية العظيمة هي أهدافك التي خلقت لكي تنفذها و موهبتك التي تحملها بين قلبك حتى تقوم بها و تشعرك بنجاحك، و منطقة تميزك التي تساعدك علي إتمام المهمة والرسالة.

بالمناسبة ممكن يكون عملك بسيط جدًا ويؤثر و يغير موازين، تعرف سلاكة الودان اللي مفيش عنها غنى لأي بيت؟ اللي عملتها واحدة ست كانت مهمة بنظافة أولادها جدًا، الكوريكتور corrector اللي بتستخدمه عشان ما تهدرش الورق اللي عملته سكرتيرة، دي اختراعات بسيطة جدًا من أعمال لستات شافوا في أنفسهم مميزات، تفكر حياتنا هيكون إيه شكلها من غير الحاجات البسيطة؛ ATM اللي بتصرف منها اللي لو قارون عرف بوجودها مكنش اتفشخ بمفاتيح خزائنه، صاحبة الفكرة واحد ست عاملة بسيطة كانت محتاجة تقبض وتسحب فلوس وقت ما تحب. الأمور دي بسيطة جدًا، بتحط

بطاقة البنك في المحفظة و تمشي، بطريقة تظهر أنها عادية، لكن الحقيقة اختراع مهم جدًا، وفر على الناس الكثير.

النحلة الصغيرة دي طول عمرها بتعمل فقط ٣/١ معلقة عسل صغيرة يعني إنجازها في حياتها بحالها كاملة هي ملعقة الشاي بتاعتك؛ تلتها فقط عسل هو دا إنجازها، هفترض ان كل نحلة وزها الشيطان ونفسها وإحساسها الداخلي بالدونية وأنها قليلة ومش مهمة قالت في نفسها دا عمل صغير سيب غيرك يعملته تفتكر إيه اللي هيحصل؟؟

يبقى المشكلة أن لو شخص واحد فقط قلل من قيمة العمل الخاص به، مش هيكون هناك تأثير كبير لهذا الأمر، لكن لو هذا التقليل من الأمور والتصغير من شأن كل شخص-لو أصبح السمة العامة للمجتمع، يبقى الكل يخسر.

يعني لو نجمة واحدة في السماء قالت أنا مش هظهر النهاردا لأنني مش مؤثرة، دي مشكلتها على الصعيد الشخصي؛ لأنها مؤثرة، لكنها هي مش فاهمة دي بشكل صحيح، طيب لو مجتمع النجوم (جزء منه) قرر أنه فجأة مالوش لازم ظهوره وإنه عمل بسيط وفاشل، يبقى الكل يخسر.

تبقي المشكلة لو العقل بتاع شخص واحد تخيل كدا، يبقى محتاج يفهم الصح، لكن لو كان عقل المجتمع كله فكر كدا، يبقى الكل هيكسر.

لو علمت أن دي آخر ٦ أشهر في حياتك على الأرض، ما هو العمل الذي ستقوم بعمله، مع فرض أنك مش هتقصر في العبادات وكل الفروض والنوافل، لو سمحت (استثني العبادات مثل الصلاة والصيام وما إلى ذلك " حضرتك دا مش أوبشن أعملهم أو لا، دول أساسيات يعيش الإنسان عليهم مثل الماء والهواء في كل يوم من أيام حياته)، إحنا بتحاول نعرف هدفنا إيه في الحياة، وإيه هو اللي ممكن أنجح فيه بسهولة وأفيد نفسي والناس من حوالي.

مشكلة السؤال دا إن الإنسان مش بياخد باله إنه أول ما بيعرف إنه خلاص معدش عنده وقت، وأإنه أول شهر أو اتنين فعلا، هيعمل كل العبادات و هيجبر نفسه و هيتذكر في كل لحظة، لكن بعد شهر و اتنين هيرجع جزئيا لكونه إنسانًا يمارس الحياة بشكل معتاد؛ السؤال يقصد لو فرضنا إنك عملت كل ما يقربك لله، إيه العمل اللي سهل عليك عمله، و تقدر تعمله و شايف إنه ممتع ليك و مفيد ليك و يسعدك و بيعطيك إحساس بأهميتك، و هيكون نافع للغير (الغير هنا تعني أقرب الدوائر ثم أبعدھا، في ناس كل قدرتها إنها تتعلم كظم الغيظ و إنها متغضبيش، دا عمل عظيم و هایل و رسالة مهمة.

---

---

## الحلقة الخامسة (يا فكرة مميزة يا بلاش واحدة عادية متلزمناش)

كلنا نبحت عن المميز، يعني أنا عايز فكرة محدش فكر فيها قبل كدا.. حاجة مميزة، عشان الكل يقول إن "فلان صاحب السبق فيها" مشغلش فيها غيري قبل كده

سؤال يجنن، إزاي هتكون مميز في شيء انت أصلا لم تعمل فيه، هتعرف إيه مشاكله بدون ما تعيش فيه؟؟ لم تمارسه مطلقا، لم تتقنه؟؟؟

---

مثال في الأكل، مين يعرف كيكة الكريم كراميل، أكيد فيكم ناس كتير، تفتكر اللي اخترعت الفكرة أو اللي اخترعها، عملها إزاي؟؟؟ كان قاعد كدا وشخص مالوش علاقة بالحلويات مطلقا وفكر فيه كدا؟؟ واحد حب الكيكة وحب الكريم كراميل قام صحي الصبح خلطهم مع بعض وهو لم يمارس الحلويات أبدا ولم يطبخ الحلويات أبدا؟؟؟، كان صاحي الصبح من النوم وقال ليه الستات الفاشلين مفكروش يعملوا الكيكة مع الكراميل؟؟

ولا مراته واقفة بتعملها قالها إزاي يا حاجة مش بتحطي الكيكة مع الكراميل، أصلها هتبقى كدا بقدرة ربنا؛ الكيكة فوق والكراميل تحت وتحطها في حمام مائي؟؟؟ وظبط درجة الحرارة إزاي؟؟

دا شخص حاول وفكروعمل كتير من المحاولات عشان يوصل للمنتج دا؟؟ حد يعرف صاحب المنتج دا؟ "غالبا لأ" لكن كلنا نعرف المحلات اللي بتطور وتتفنن في الأمر وبنروح نجيب منها والمحل اللي بيطور أكثر بيكون عليه إقبال أكثر؟؟ صح ولا لأ؟؟

طبيب مين يعرف سلاكة الودان؟ السبب في اختراع سلاكة الودان إن فيه أم كانت مهتمة بنظافة ابنها جدا، وكانت بتحاول تنضف ودانه فكانت بتجيب الخلطة وتضع عليها قطنه وتبدأ تنضف ودان ابنها بحذر، و مع الوقت تطور الأمر.

جرير الأكل اللي بيتعرض للأطفال في المحلات وأغلب الناس تسمع عنه، تعرفوا مين صاحبتة؟؟ إنسانة كان عندها طفلة، عايزة تأكلها ودا كان بعد ما حدث طلاق بينها وبين زوجها، و سافرت بالطفلة، و كانت بتفكر تأكل الطفلة أكل طبيعي من البيت، بدأت تعمل أكل من خلال الفواكه الموجودة في حديقة المنزل و اللي قامت بزراعتها، فشل عرضها للمنتج للناس بدل المرة مليون مرة، و فضلت مصرة لحد ما نجحت في تقديم الأمر لشركة ما و تم عرض المنتج و التسويق له.

مثال آخر، ذا بودي شوب "The body shop" اللي حضرتكم تجيبوا منه طلباتكم وتبأهوا أنكم بتشتروا وانه منتجات شيء مختلف وإنها طبيعية وإنه متطور، عارفين وراه مجهود من الممارسة قد إيه؟؟ لحد ما تطور وبقى المحلات العالمية ذات الماركات اللي إحنا نشترى منها.

كتاب (Eat, Pray, Love) الكاتبة بتاعته، مصحيتش من النوم فجأة قالت أنا هألف كتاب، وتاني يوم نشرته وبعدين اتحول لفيلم شهير، الكاتبة فضلت عشرين سنة تشتغل في مجال الكتابة وتحاول وتعرض ما تملك و دور النشر ترفض، وتفشل، ٢٠ سنة بتحاول.

مممكن حد يوحى بفكرة لحد، لكن مفيش حد هينفذ فكرة و هو غير مقتنع بها، أو هينفذ فكرة و هو مش عارف الطريق لها، فكرتك محدش هيسرقها منك إلا إذا نجحت وأصبحت عملاً يُمارس والناس منبهة به، والناس لن تنهر بأي فكرة إلا بعد إتقانها.

لن تكون فكرتك مميزة جدًا إلا إذا مارستها يوميًا، وبعد الممارسة اليومية تعيش في كيفية تطويرها بعد الإتقان وكيفية تحويلها لفكرة تساعد الناس بها وتكسب منها أكل عيش. الناس لا تسرق فكرة من أحد إلا إذا كان ناجحًا، الناس تنهر بقصة الفكرة و تشتري منها؛ لأنها عاشت في مجهود صاحبها المبذول.

تعلم أن المميز لم يكون يوما إلا شيئًا معتادًا عاش فيه صاحبه و أتقنه حتى جعله مميزًا.

هل تعلم أن عالم الصم و البكم، الإشارات الخاصة بهم صعبة و لم يتم تطويرها، هل تعلم أن في أسئلة كثير عن الكون لم يتم الإجابة عنها، هل تعلم أن في أمهات لا تفقه شيئًا في التربية، هل تعلم إن فيه أشخاص متعرفش (A, B, C) ببنس، لو دققت النظرهتعرف ان فيه ملايين محتاجين غرزتك عشان البلوفر الدينويي يكمل و يكون قدرالإمكان أفضل مما نتخيل.

إيه الفكرة اللي انت فعلا متقنها بعد العمر دا كله؟؟؟ إيه المجال اللي أنت أتقنته بشكل قوي جدًا و ما هي أهم مشاكله اللي تعتقد إنه يمكن حلها؟؟

---

الناس عمالة تحكي عن الشخص العادي و كأنه شخص مش مهم، الحقيقة أنه أحيانًا أهمية الشخص تأتي من كونه معتادًا، يعني علي سبيل المثال، الإمام الشافعي كان يتيم، واللي ربته أمه، أمه سيدة عادية، و دا سر وجود الإمام الشافعي، و يمكن كانت وظيفة الأب أنه يوفر الأكل لهم، و بعد فترة تحمل زوجته في ابنه و يموت، أبو الرسول الكريم، كان سيد من سادة قريش، ماذا كان فعله الشهير غير أنه شخص تزوج و أنجبت زوجته الرسول صلى الله عليه وسلم، الفكرة إنك لو كنت عاديًا، تتعلم أن تطور نفسك و أفكارك و وعيك و

نضجك الإنساني، و أن تتقن ما تفعل و أن تسند غيرك وتقف معه حتى يستطيع أن يصل، أن تكون إنسانًا صالحًا أن تحب نفسك و تحب الخير لغيرك.

أن تكون عاديًا ليس بُعبًا، ولكن يجب أن تكون متقنًا ومحسنًا و أن تعلم أن لوجودك سببًا، و أن تتقن ما تفعل و تطور نفسك، و ألا تقف جامدًا في الحياة و ألا تكون تابعًا لجملة "هذا ما وجدنا عليه آباءنا فقط"، دون أن تتطور و تساعد الغير.

في ناس اعتادت الصلاة، ليس لأن من ساعدها على ذلك شيخ أو إنسان مشهور، لكن لأن من ساعدها إنسان عادي يحاول أن ينتظم باستمرار في الصلاة، كلنا بشر عاديون، إلا من كان لفعله وجود و أثر أكبر يستفيد منه الناس أكثر، ولسبب ما "لا بد أن يظهر هذا الأثر في هذا الكون" و يعلم عنه الناس، و الحكمة من ظهوره للناس، نعلم منها جوانب و ستظل جوانب أخرى في علم الله.

لكن لا تركن و تترك نفسك لمجرد أن تلف في دائرة لا تخصك، و تعلم ان العادي، إنسان له صراعاته الداخلية التي يحاربها و يحاول أن يلتزم و يتغير، حتي كون إنسان عاديًا مختلف لنفسه في الأول و لغيره فيما بعد.

فكرة الحياة تقوم على فكرة أن تترك بصمتك في نفسك و فيمن مروا في حياتك، حتى لو كان عبور هذه الأشخاص مجرد لحظات في حياتك، أحسن الأثر و أحسن البصمة حتى لو كانت ضئيلة من وجهة نظرك. تخيل كذا معايا أن إنسانًا عاديًا كتب كتابًا عاديًا، قرأه شخص واحد فقط و لم يقرأ الكتاب الملايين من الناس، و هذا الشخص تغير جزء في روتينه و حياته، ثم تغير روتين و حياة ابنه، ثم ورت الحفيد هذا التغير، تخيل ما شكل الحياة لهذه الأسرة، و كيف سينتقل تأثير الأسرة للأسر الأخرى من حولهم.

نحن العاديون نغير ونؤثر في حياة وقرارات ورؤية وأفكار كل من مرّ في حياتنا و عدد من يمر في حياتنا بشكل يومي أو أسبوعي و سنوي في متوسط عمر الفرد، يصل عدد الناس لمليون شخص وأكثر، تخيل، ماذا فعلت فهم أنت كشخص عادي؟.

الإنسان شخص عادي، يطمح للوعي و النضج الإنساني، ويتطور ويغير في نفسه وفي حياته حتى يكون دائما نسخة أفضل، و في طريقه يتغير الناس عندما يشاهدون أنه تغيير يمشي أمامهم على الأرض.

سؤال: ما رأيك عن الشخص العادي؟

---

---

---

---

---

---



جميع الأسئلة التي تم تجميعها بواسطة الكاتبة واستخدمتها  
لاكتشاف شغفها، و تم عملها مع العملاء



## أُسئلة لمعرفة شغفك وأحلامك وموهبتك

الأسئلة التي جاية كلها ليك أنت، مش ليك والجيران، لما تجاوب، جاوب بأنانية مفرطة، ركز علي نفسك أنت إيه اللي يساعدك أنت؟ إيه اللي يريحك و يسعدك؟ ابعد عن الأجوبة المثالية والمحفوظة، ابعد عن الأمثلة المحلولة، اكتب كل اللي نفسك فيه، اكتب وكن صريحًا مع نفسك؛ لأنك بتحاول تلاقي حياتك ووجودك وهدفك وأنت جاي ليه الأرض؟.

نقطة للتوضيح: فيه فرق كبير بين معرفة الشغف عشان تعرف رسالتك في الحياة وتفهم أنت عايز تعمل إيه؟ وبين معرفة منطقة تميزك، وبين تحويله لشغل يُدر عليك المال، و فرق بين إيجاد فكرة لعمل مشروع مناسب عشان تبدأ حياتك و تشتغل و يكون معاك فلوس، لكل واحدة من دول خطوات منفصلة و أحيانًا متصلة في بعض النقاط و أحيانًا بتكمل بعض و بتعاون، خيلنا هنا نركز فقط على معرفة شغفك و أنت بتحب إيه؟، و بعد كدا عايز تمارسه كهواية، عايز تحوله كbizنس، مش عايز تشتغل به، دا قرارك.

و الأمر الثاني المهم، طول ما أنت واضح أن الأصل في الموضوع الحصول علي الفلوس، البوصلة بتاعتك مش هتكون صحيحة، هتكون عامل زي اللي وضع البوصلة الخاصة به في مجال مغناطيسي، فكل مؤشرات البوصلة مش هتكون صحيحة و هتدخل في متاهات، انسى تماما و أنت بتمشي في رحلة شغفك في البداية موضوع الفلوس، و لما بنذكر سؤال زي لو معاك فلوس كتير مش بتخلص، دا معناه أنك هتستخدم الفلوس دي في أكلك و فواتيرك و تعيش مرتاح ماليًا مش خايف أنك لازم تشتغل عشان تسد فواتير المدارس والكهرباء و الحاجات اللي تجعلنا جميعا نقبل بأي حاجة خوفا من قلة الفلوس.

دي أمور لا بد من توضيحها في البداية عشان نفهم إحنا بنبحث عن ماذا؟ و  
كمان قدر الإمكان نلاقيه بطريقة صحيحة، الأسئلة هتكون أحياناً مكررة  
بأكثر من صيغة، ودا عشان العقول و الأفهام مختلفة، و هذا الاختلاف ظهر  
بشكل واضح خلال رحلتي مع العملاء، يلاً نبدأ الرحلة:

١. حاجة كنت بتحب تعملها و أنت صغير؟

---

٢. لو مثلك الأعلى هيعمل شيء دلوقتي و هتكون مستمتع و أنت معه و  
تعملوا الشيء دي سوا، تفتكر ما هذا الشيء؟

---

٣. ما الذي يرسم الابتسامة على وجهك؟ إيه اللي يجعلك تضحك لما بتعمله  
أو بتشوفه؟

---

٤. ما الذي تعشق الحديث عنه؟ حاجة بتحب تتكلم عنها كثير جداً، و  
تستطيع أن تقنع الناس به؟

---

٥. لو انقطعت على جزيرة مهجورة، وفجأة وجدت الغذاء والماء والمأوى وكل  
شيء موجود، لكنك عايش لوحدة، ما الذي قد تشتاق إليه أكثر و  
تفتقده؟

---

٦. لو انقطعت على جزيرة مهجورة، وفجأة وجدت الغذاء والماء والمأوى وكل شيء موجود لكنك عايش لوحده، ما العمل الذي ممكن أن تمارسه و يجعل وقتك يجري بسرعة وسعادة؟؟

---

---

٧. تخيل، إذا رأيت طردًا على البحر وأنت على هذه الجزيرة المهجورة، ما الذي تأمل أن تجده في ذلك الطرد؟؟

---

---

٨. لو قابلت نفسك وأنت صغير تقول لها إيه؟؟ تنصحتها تشتغل إيه، بفرض أنك مستريح ماليا وعندك فلوس مش بتخلص و مش قلقان ولا محتاج فلوس عشان تدفع فواتيرك؟؟

---

---

٩. إذا تم إجبارك علي قضاء شهر واحد في مكان مع شخص (من حقك تختاره)، فمن تختار؟

---

---

١٠. لماذا تختار هذا الشخص، المقصود الشخص في السؤال السابق؟

---

---

١١. عند زيارة المكتبة، أي قسم يثير اهتمامك، إيه نوع الكتب اللي بتحب تقرأ فيها؟

---

١٢. لماذا هذا النوع تحديدًا من الكتب؟

---

---

١٣. كنت بتزور المكتبة و مسموح لك بكتاب واحد و هو كتاب لحياتك،  
تفتكري هيكون إيه و في مجال إيه؟؟

---

---

١٤. لو معاك فلوس تكفيك تعيش غني و متقلقش مش هتزول من معاك  
مطلقا، و هتدفع فواتيرك و كل حاجة، و ممنوع تستخدمها في أي  
مشروع، ممكن تشتغل إيه لو مستريح ماليا تماما، و بنبه للمرة الثانية  
الفلوس الكثير مش هتستخدمها في أي مشروع؟؟

---

---

١٥. لو كان النجاح و الشهرة وكل اللي عايزه هيكون معاك، ممكن تعمل إيه  
في حياتك، ممكن تشتغل إيه؟؟

---

---

١٦. لو جالك مصباح علاء الدين، و قالك ليك طلب واحد في حاجة بتحيا هعملها  
لك، إيه الحاجة اللي بتحيا و تختار أنه يساعدك فيها؟؟

---

---

١٧. لو جالك مصباح علاء الدين، وقال لك ممكن أجعلك ناجح في الحاجة  
اللي أنت بتحبها وأشهر شخص فيها، هتكون إيه الحاجة اللي بتحبها و  
نفسك تشتغل فيها؟؟

---

---

١٨. لما بتتفرج على التليفزيون إيه اللي بيشدك فيه، وما هو أكثر نوع برامج  
بتنجذب له؟

---

---

١٩. تفتكر ليه نوع البرامج دي بيجذبك؟؟

---

---

٢٠. لما بتتفرج على التليفزيون إيه أكثر نوع أفلام بيشدك فيه، ما هو أكثر نوع  
أفلام بتنجذب له؟

---

---

٢١. تفتكر ليه نوع الأفلام دي بيجذبك؟؟

---

---

٢٢. لو هتتكلم عن شيء تعشقه وتشرحه للأطفال، تفتكر تكون إيه؟؟

---

---

٢٣. موضوع لو الأطفال أتعلموه و أنت علمتهم الموضوع دا بنفسك، حياتهم  
هيحصل فيها تغيير ولو بسيط؟

---

---

٢٤. لو فاضل ليك في الدنيا ٦ شهور، هتعمل فيهم إيه (ملحوظة هتصلي  
وتصوم وتعبد ربنا وتحضن ولادك و هتعمل كل الفروض والنوافل، وبعد  
شهرين من معرفة الخبر وعمل كل الفروض، هتشتغل في إيه عشان  
تشعر بالسعادة وأن اللي فاضل ف عمرك ما راحش هدر)؟؟

---

---

٢٥. لو تخيلت أن دخول الجنة بعد ما تعمل الفروض وكل حاجة وقبل ذلك  
رحمة ربنا، هتكون عن طريق شيء واحد تعمله و تكون بتحبه و  
بيسعدك، و بيخليك تحس بأهميتك، تفتكر ما هو هذا الشيء؟(السؤال  
فقط للتخيل البعيد، و مستوحى من أحد أحاديث الرسول صلي الله  
عليه وسلم (عن أبي هريرة رضي الله قال: قال رسول الله صلى الله عليه  
وسلم لبلال عند صلاة الغداة: يا بلال حدثني بأرجى عمل عملته عندك  
في الإسلام منفعة؟ فإني سمعت الليلة خشف نعليك بين يدي في الجنة.  
قال بلال: ما عملت عملاً في الإسلام أرجى عندي منفعة من أني لا أتطهر  
طهوراً تاماً في ساعة من ليل ولا نهار إلا صليت بذلك الطهور ما كتب الله  
لي أن أصلي". رواه البخاري، و مسلم)؟

---

---

٢٦. حاجة لما بتلاقي حد بيعملها بتشعر بالغيرة و الغبطة، و تقول في نفسك أنا اقدر اعملها بطريقة أحسن منه، تفتكر ما هو هذا الشيء؟؟

---

---

٢٧. لو ممكن تكون شخصية أنت تختارها، تختار مين؟

---

---

٢٨. لماذا اخترت هذه الشخصية، ما الذي يجذبك نحو هذه الشخصية؟؟

---

---

٢٩. تخيل ان دي آخر لحظة في حياتك و بتكتب (أنا ندمت عشان معملتش.....) أكمل الجملة، هنا نقصد بعد ما عملت الفروض و النوافل و حضنت الأولاد و طلبت السماح من الناس، نقصد عمل أو شيء يخصك أنت، و تحب فعله، مش شيء تعمله عشان ترضي الناس؟

---

---

٣٠. إيه الحلم اللي لو حلمته، الناس تقول عليك مجنون أو مخبول؟

---

---

٣١. إيه الشغلانة اللي ممكن تعملها بدون فلوس عشان بتسعدك و بتحياها؟

---

---



٣٢. لو روت مكان و طلبوا منك تتكلم عن موضوع لمدة ١٥ دقيقة و إلا المكان هيفتفي من الوجود، ممكن تتكلم عن إيه؟

---

---

٣٣. موضوع بتحب تتكلم عنه، و مش بتشبع من الكلام فيه؟؟

---

---

٣٤. إيه الأنشطة اللي بتحب بسعادة و الأهمية و أنت بتعملها؟

---

---

٣٥. الناس لما بتجيلك و تتطلب المساعدة منك، بتطلب منك إيه؟؟

---

---

٣٦. مين مثلك الأعلى، اكتب الأسماء كلها، ممكن تكتب أشخاص بتشعر أنهم مميزين؟؟

---

---

٣٧. ليه اخترت الأسماء دي؟ كل اسم اكتب قصاده الأسباب اللي جعلتك تختاره..

---

---

٣٨. إيه الحاجات اللي بتشعر أنها ممكن تكون في الأشخاص دي و أنت بتحبها و ممكن تكون فيك؟

٣٩. لو جالك شغل تطوعي، تفتكر ممكن يكون إيه و تعمله بسعادة (كن محدد في الاختيار، حتى لو كانت النقطة بسيطة)؟؟

---

---

٤٠. إيه الموضوع اللي ممكن تتكلم فيه، و تدافع عنه بشكل كبير جداً و بقوة و حماس؟؟

---

---

٤١. حاجة خائف منها على الجيل القادم، و عايز تنبه الجيل دا و تعلمه يعملها صح، أو يفهمها بطريقة صحيحة؟

---

---

٤٢. إيه أكثر حاجة نفسك تغيرها في العالم كله، حاسس إنها ممكن تعمل فرق بسيط جداً؟

---

---

٤٣. لو ممكن تؤولف كتاب من ٢٠ صفحة تكتب عن إيه؟

---

---

٤٤. موضوع عندك أفكار كثيرة فيه؟

---

٤٥. موضوع عندك فضول تفهمه أكثر وتعرفه؟

---

---

٤٦. موضوع أو شيء بتحب تبحث عنه كثير على الإنترنت؟

---

---

٤٧. مشكلة ساعة ما تظهر ليك، تشعر إنك متحمس وبتعافر عشان تحلها؛ لأنك شايف أنها مهمة وأنت بتكون مستمتع وأنت بتحلها؟

---

---

٤٨. إيه الشيء الذي تفعله و يجعلك تشعر بأنك على طبيعتك، و براحتك (انسى الناس من حولك)؟

---

---

٤٩. تفتكر إيه المواهب بتاعتك من وجهة نظرك؟

---

---

٥٠. الناس شايفاك موهوب في إيه؟ (اسأل الناس من حولك، اختار ناس مختلفة حتى لو كنت عارف إنهم مش بيجبوك، شوف إجابات متنوعة، و اطلب منهم الصدق والأمانة في قولهم)

---

---

٥١. إيه الشيء اللي لما بتعمله، بتفكر إن كل الناس عارفة و بتعرف تعمله بسهولة؟

---

---

٥٢. لو جتلك فرصة ليوم واحد تعمل فيه الشيء اللي نفسك تعمله، تفتكر ماذا سيكون هذا الشيء؟

---

---

٥٣. إيه الشيء اللي لما بتعمله مش بتحس أبدا إن الوقت خلص، و بتقول "ياه الوقت خلص بسرعة جدًّا"؟

---

---

٥٤. لو تخيلنا (بعد عمر طويل) إنك ميت و الناس بتقول في حقك كلام حلو، بتقول "الله يرحمه، كان شغوف (كان محب)، لعمل....."، (أكمل الجملة)؟ للإجابة عن هذا السؤال (يفضل إنك تكتب إجابة من عندك، وإجابة من الناس اللي حولك)

---

---

٥٥. لو تخيلنا (بعد عمر طويل) إنك ميت و الناس بتقول في حقك كلام حلو، بتقول "الله يرحمه، كان شاطر في....."، (أكمل الجملة)؟ للإجابة عن هذا السؤال (يفضل إنك تكتب إجابة من عندك، وإجابة من الناس اللي حولك)

٥٦. إيه الشغلانة / العمل اللي عندك أحلام كتير عنه، حتى لو لم تمارسه؟

---

---

٥٧. إيه العمل اللي ممكن الناس تقول أنت مبدع فيه لو عملته؟

---

---

٥٨. لو فرضنا أن في حد هيتكفل بكل مصاريفك و عملك، و كل شيء أنت ممكن تقلق عليه، مقابل إنك تقعد سنتين تعمل شغل بتحبه، و تمارس عمل بيسعدك، تفتكر إيه هو العمل دا؟

---

---

٥٩. إيه الشيء / العمل اللي لو معملتوش ممكن تندم عليه؟

---

---

٦٠. أهم ٣ أشياء بتحب تساعد الناس فيهم؟

---

---

٦١. لو عايز تختار ٣ كتب يساعدوا الناس؟

---

---

٦٢. ليه اخترت الكتب دي؟

---

---

٦٣. لو حد مشهور قالك، أنا هعلمك أي حاجة بتحياها، تحب تتعلم عن إيه؟

---

---

٦٤. ليه اخترت الشيء / الموضوع دا، شعورك إيه ناحيته؟

---

---

٦٥. لو قدامك ٥ سنين فقط في حياتك، ممكن تعمل فهم إيه؛ شرط تكون بتحبه وبيديك الأهمية وبيغير حياة غيرك، حتى لو هتتعلمه؟

---

---

٦٦. لو عايز ابنك يعمل اللي بيحبه، يبقى لازم يشوفك أنت كمان بتعمل اللي بتحبه، إيه اللي بتحبه، و هتعمله عشان تكون قدوة لابنك؟

---

---

٦٧. حياتك هتكون في قمة الروعة و المثالية لو كنت بتشتغل في الحاجات التالية، اكتب الحاجات و الأعمال اللي تخلي حياتك مثالية؟

---

---

٦٨. الأعمال التي تجعلك عايش بدون ضغط؟

---

---

٦٩. إيه اللي نفسك تحققة في حياتك؟

---

---

٧٠. إيه هي الاهتمامات و الأنشطة اللي لما بتعملها بتشعر براحة و سعادة و  
اهمية وقوة؟

---

---

٧١. إيه الأشياء اللي بتسعدك لما تعملها؟

---

---

٧٢. بتحس إنك عندك فضول شديد لما.....، كمل الجملة؟

---

---

٧٣. بشعر بنشاط و حيوية لما.....، أكمل الجملة؟

---

---

٧٤. لو كانت عندك قوة هائلة، وتقدر تعمل أي حاجة بدون ما تفشل، ممكن تعمل إيه؟

---

---

٧٥. لو عايز حد يرشدك في حياتك عشان تعمل حاجة بتحها، هيكون مين؟

---

---

٧٦. إيه الشيء اللي عايزه يرشدك فيه؟

---

---

٧٧. ليه اخترت الشيء دا تحديدا؟

---

---

٧٨. فاكر مرة في حياتك كنت حاسس بإنك قوي و بتعمل حاجة مفيدة و بتشعر ناحيتها بالسعادة، تفتكر إيه هو الشيء/ النشاط/ العمل دا؟

---

---

٧٩. لو كلام الناس مش موجود و مش فارق معاك، ممكن تشتغل إيه، أو تعمل إيه؟

---

---



٨٠. مشهد لما بتشوفه في أي مكان بتشعر إنك في قمة الحماس و الإثارة و السعادة والفرح؟

---

---

٨١. شيء/ حاجة لما بتعملها بتشعر إنك زي الطفل اللي بيتنطط من الفرح؟

---

---

٨٢. اكتب لسته ب ٢٠ حاجة عايز تعملها قبل ما تموت و تكون سعيد و أنت بتعملهم؟

---

---

---

---

---

---

---

---

٨٣. لو الأطفال بتشاور عليك في الشارع و تقول أنا نفسي أكون زيك، تفتكر هتكون بتعمل إيه عشان يتمنوا يكونوا زيك؟

---

---

٨٤. إيه الشيء اللي نفسك تعمله و تشتغل فيه و خائف من الناس و أهلك؟

---

٨٥. إيه الشيء/ النشاط/ العمل اللي لو عملته ممكن تنسى النوم؟

---

---

٨٦. إيه الأشياء اللي انت عملتها و متقن لها، (عد مالا يقل عن ١٠ حاجات)،  
ممكن تستعين بالناس من حولك؟

---

---

---

---

---

٨٧. إيه العمل اللي لما بتمارسه، يجعلك تشعر أنك غير قابل للهزيمة؟

---

---

٨٨. لو معاك ملايين مش هتخلص، و موجودة عشان تعيش سعيد بدون  
قلق، ممكن تشتغل إيه، بدون ما تستخدم الفلوس دي؟

---

---

٨٩. إيه الشيء اللي الناس بتمدحك و تقولك انت مميز في.....، أكمل  
الجملة؟

---

---

٩٠. تفتكر إيه الموهبة وإيه اللي ميزك به ربنا سبحانه وتعالى؟ اكتب ما يزيد على حاجتين

---

---

٩١. تخيل انك كسبت مبلغ يزيد على ١٠٠ مليون دولار، وبعد ما عملت كل حاجة تسعدك و اتبسطت، بعد سنة من المكسب دا، هتكون بتشتغل إيه؟

---

---

٩٢. شيء في العالم يجعلك تشعر بالحزن و القهر طول ما هو مش صح من وجهة نظرك، ما هو؟

---

---

٩٣. هتعمل إيه عشان تخليه صح؟ إيه العمل/ النشاط؟

---

---

٩٤. لو انت هتكتب كتاب، ويساعد الناس، و مؤكد إنه هيكون أفضل كتاب في السوق، هيكون عن إيه؟

---

---

٩٥. لو عندك وقت فراغ، تحب تقضيه في إيه، إيه الأنشطة و الاهتمامات  
اللي ممكن تعملها في وقت الفراغ؟

---

---

٩٦. هل مررت بتجربة فيها شغف إيجابي، وقمت بعمل اختيارات خاصة بك،  
اكتب عنها؟

---

---

٩٧. ما هي مشاعركم بعد هذه الرحلة؟

---

---

الفكرة من التمارين السابقة، إنك تلاقي كلمات و أشياء تتكرر كثير، و تلاقي  
أشياء بينها عوامل مشتركة، جمّعهم و جمّع المتشابه و شوف إيه المشترك بين  
كل اللي تم ذكره و أنت توصل لأنواع متعددة في شغفك  
الكلمات التي تم تكرارها في التمارين السابقة

---

---

---

---

---

---

---

التمرين الأخير و يعتبر أكبر تمرين ممكن عمله و أصعبهم، هو تمرين كتابة ١٢٠ حلم و هدف نفسك تحققهم في حياتك، مطلوب منك إنك تكتب ١٢٠ حلم و هدف و عمل نفسك تحققهم أو تشتغلهم أو تكون لك بصمة فيهم، صعوبة التمرين في أنك تجبر نفسك على أنك تقعد و تركز، بعد ما تكتب ١٢٠ نقطة، شوف إيه أكثر الكلمات اللي اتكررت، و خليها على جنب، و بعدين عيد ترتيبهم ثاني حسب قريهم من قلبك، و شوف إيه اللي تقدر تحققه فعلا و تبدأ تنفذه، يلّ نبدأ و نكتب في النقاط التالية:

- ١- .....
- ٢- .....
- ٣- .....
- ٤- .....
- ٥- .....
- ٦- .....
- ٧- .....
- ٨- .....
- ٩- .....
- ١٠- .....
- ١١- .....
- ١٢- .....
- ١٣- .....
- ١٤- .....
- ١٥- .....
- ١٦- .....
- ١٧- .....
- ١٨- .....

.....	-۱۹
.....	-۲۰
.....	-۲۱
.....	-۲۲
.....	-۲۳
.....	-۲۴
.....	-۲۵
.....	-۲۶
.....	-۲۷
.....	-۲۸
.....	-۲۹
.....	-۳۰
.....	-۳۱
.....	-۳۲
.....	-۳۳
.....	-۳۴
.....	-۳۵
.....	-۳۶
.....	-۳۷
.....	-۳۸
.....	-۳۹
.....	-۴۰
.....	-۴۱
.....	-۴۲
.....	-۴۳

.....	- ٤٤
.....	- ٤٥
.....	- ٤٦
.....	- ٤٧
.....	- ٤٨
.....	- ٤٩
.....	- ٥٠
.....	- ٥١
.....	- ٥٢
.....	- ٥٣
.....	- ٥٤
.....	- ٥٥
.....	- ٥٦
.....	- ٥٧
.....	- ٥٨
.....	- ٥٩
.....	- ٦٠
.....	- ٦١
.....	- ٦٢
.....	- ٦٣
.....	- ٦٤
.....	- ٦٥
.....	- ٦٦
.....	- ٦٧
.....	- ٦٨

.....	-٦٩
.....	-٧٠
.....	-٧١
.....	-٧٢
.....	-٧٣
.....	-٧٤
.....	-٧٥
.....	-٧٦
.....	-٧٧
.....	-٧٨
.....	-٧٩
.....	-٨٠
.....	-٨١
.....	-٨٢
.....	-٨٣
.....	-٨٤
.....	-٨٥
.....	-٨٦
.....	-٨٧
.....	-٨٨
.....	-٨٩
.....	-٩٠
.....	-٩١
.....	-٩٢
.....	-٩٣



.....	- ٩٤
.....	- ٩٥
.....	- ٩٦
.....	- ٩٧
.....	- ٩٨
.....	- ٩٩
.....	- ١٠٠
.....	- ١٠١
.....	- ١٠٢
.....	- ١٠٣
.....	- ١٠٤
.....	- ١٠٥
.....	- ١٠٦
.....	- ١٠٧
.....	- ١٠٨
.....	- ١٠٩
.....	- ١١٠
.....	- ١١١
.....	- ١١٢
.....	- ١١٣
.....	- ١١٤
.....	- ١١٥
.....	- ١١٦
.....	- ١١٧
.....	- ١١٨

- ..... -١١٩
- ..... -١٢٠

الكلمات التي تم تكرارها في التمرين السابق

---



---



---



---



---

إعادة ترتيب أكثر ٢٠ حلم وهدف تقدر تنفذهم وقريين من قلبك

- ..... -١
- ..... -٢
- ..... -٣
- ..... -٤
- ..... -٥
- ..... -٦
- ..... -٧
- ..... -٨
- ..... -٩
- ..... -١٠
- ..... -١١
- ..... -١٢
- ..... -١٣
- ..... -١٤
- ..... -١٥

-----	- ١٦
-----	- ١٧
-----	- ١٨
-----	- ١٩
-----	- ٢٠

## كلمة أخيرة

رحلة البحث لم تنته بعد، منتظراك في رحلة خاصة بك تسعدك و تكون  
فرحان معها وفي خلالها،  
لقد قرأت الكتب المتعددة لمعرفة سر وجودنا و سر الشغف و مناطق التميز و  
كيف نقوم بعمل تغيير في المهنة و الحياة و مارست بشكل فعلي و هذا الكتاب  
خلاصة لتجربتي الشخصية و القراءة المتعددة حتى أستطيع أن أصل لطريقي.  
أن شاء الله تصدر باقي السلسلة و نكمل الطريق سوا.  
شكرا لأنك وصلت لنهاية الكتاب  
أتمنى تكون استفدت و ركزت و قدرت تغير نقاط ف حياتك.

إلى اللقاء في الكتاب القادم



## في الكتاب القادم

نتعرف إلى:

أنواع الشخصيات في الشغف؟

القوة المحركة للشغف؟

أنواع الشغف؟

مكونات المنطقة المميزة لك؟

كيف تجد منطقتك بكل سهولة؟

الخوف والشغف؟

المجتمع والتعليم والمال وعلاقته بالشغف؟

الكاريير وتعب السنين؟

كيف توجد منطقة التمييز بين الشغف والخبرات والقيم والمعتقدات وغيرها

من الأمور التي تحير الشخص الذي يسعى لمعرفة شغفه.

الفرق بين الأثر والنتيجة والأسطورة



## المراجع

المرة دي أنا هقدم شكل مختلف للمراجع مع وضع اللينكات لبعضها أيضا.  
من السهل كتابة أسماء المصادر، وإن شاء الله هيثم أرفقها قدر المستطاع في  
المراجع، لكن في البداية أحب أكتب أكثر المصطلحات التي تم استخدام أغلبها  
للبحث عن الشغف وفهمه.

السؤال، لماذا أضع الكلمات المفتاحية الخاصة بالبحث؛ لأنها ممكن تساعد  
أشخاص تريد التعمق والقراءة بشكل أفضل، وأيضا لأن البحث على الإنترنت  
مهارة مهمة يجب على الجميع تعلمها، وبذلك أكون قدمت فائدة أكثر لمن يريد.  
الكلمات المفتاحية التي تم استخدامها:

Passion, شغف

How to find Passion?

Books to know my passion

Questions to know passion

Find my passion

Discover your passion

Passion Work books / Steps to know passion / The element

Passion questions / Passion, purpose, Ikigai

جزء بسيط من المصادر التي تمت قراءتها وفهمها والاستعانة بها في الكتاب (قدر المستطاع سيتم وضع لينكات البحث

- <https://www.psychologytoday.com/us/blog/passion/201803/37-questions-help-you-identify-your-passions>
- E-book "5 steps to finding your passionate purpose"; by Gregory B. Knapp, M.A.
- E-book, "7 Keys to discovering your passion"; by Jonathan Mead
- Online- paper; "Don't follow your Passion"; by Mike Rowe
- E-book; " 10 strategies to discover your Passion"
- E-book; School of Life's Guide to " Realising your potential"
- <https://www.youtube.com/watch?v=6MBaFL7sCb8>
- <https://www.youtube.com/watch?v=6pgajb2Wwhs>
- Online-Paper; "The power of Passion"
- Online-Paper; "Identify Your Passion", by Ministry Coaching International
- <https://www.udemy.com/activate-your-passion-more-wealth-better-relationships/>
- <https://www.udemy.com/do-what-you-love-wake-up-every-day-loving-what-you-do/>
- E-Book; "Live your Passion", by Martijn Raaijmakers
- E-book; "How to find your Passion", by Ben Rosenfeld

## متابعة الكاتبة

الحساب الشخصي

<https://www.facebook.com/Shaymaa.Alokaily2018>

الصفحة الرسمية الخاصة

<https://www.facebook.com/ShaymaaElokaly/>

صفحتي علي UdemY

<https://www.udemy.com/user/shaymaaalokaily/>

صفحتي علي اللينكدان

<https://www.linkedin.com/in/shaymaa-alokaily-74611984/>



## Contents

٥	من هو الكاتب؟
٧	إهداء
٨	اعتذار واجب
١٠	نصيحة مخلص لك
١٢	كيف أستفيد من هذا الكتاب
١٦	قبل بداية الرحلة
١٨	أنت وسواق التاكسي والرحلة
٢٠	البحث في الشارع
٢٢	النمر والصفور، قصة حلم وعمل وشغف
٢٦	الجمل وأمه والسؤال اللي مش بيتسأل
٢٩	ما هو الشغف؟
٣٢	الشغف وتصنيف المهام
٣٦	الشغف وما أحب وما أكره
٣٧	تعريف الشغف بالعربي
٣٨	تعريف الشغف بالإنجليزي
٤٠	الشغف الإيجابي والسلبي
٤١	الشغف الإيجابي Positive Passion
٤٣	الشغف السلبي Obsessive Passion
٤٧	الشغف وظاهرة (Mirror-Neuron)
٥١	الشغف والإحسان والتطوير
٥٧	الشغف والإيقان والنضارة
٦٠	الشغف وسبب وجودنا Reason to live
٦٦	لماذا نسعى لمعرفة الشغف؟
٧٢	الرحلة ومن أين تبدأ؟

٨٥٧٦.....	Comfort zone vs. Known Zone
٨٩.....	Transition Zone/ Unknown Zone
٩٢.....	May be Riziq Zone/ Change Zone
١٠٠ .....	الإجابة النموذجية و القرار الصحيح
١٠٢.....	غير تفكيرك، تغير حياتك
١٠٤ .....	المشاعر و العواطف
١٠٧.....	الشغف الرومانسي
١٠٩ .....	أمور لا بد من تعلمها وفهمها
١١٨ .....	الشغف و التغيير
١٢٧ .....	الانطلاق في الرحلة
١٢٨ .....	الحلقة الأولى (أنا موهوب ولا مش موهوب)
١٣٢ .....	الحلقة الثانية ( أسباب غطائية و أسباب حقيقية)
١٣٥ .....	الحلقة الثالثة ( أنا مش unique)
١٤٠ .....	الحلقة الرابعة ( أفضل (أ))
١٤٨ .....	الحلقة الخامسة ("يا فكرة مميزة يا بلاش واحدة عادية متلزمناش")
١٥٤ .....	أسئلة لمعرفة شغفك و أحلامك و موهبتك
١٨٠ .....	كلمة أخيرة
١٨١ .....	في الكتاب القادم
١٨٢ .....	المراجع
١٨٤ .....	متابعة الكاتبة